



This is a digital copy of a book that was preserved for generations on library shelves before it was carefully scanned by Google as part of a project to make the world's books discoverable online.

It has survived long enough for the copyright to expire and the book to enter the public domain. A public domain book is one that was never subject to copyright or whose legal copyright term has expired. Whether a book is in the public domain may vary country to country. Public domain books are our gateways to the past, representing a wealth of history, culture and knowledge that's often difficult to discover.

Marks, notations and other marginalia present in the original volume will appear in this file - a reminder of this book's long journey from the publisher to a library and finally to you.

Usage guidelines

Google is proud to partner with libraries to digitize public domain materials and make them widely accessible. Public domain books belong to the public and we are merely their custodians. Nevertheless, this work is expensive, so in order to keep providing this resource, we have taken steps to prevent abuse by commercial parties, including placing technical restrictions on automated querying.

We also ask that you:

- + *Make non-commercial use of the files* We designed Google Book Search for use by individuals, and we request that you use these files for personal, non-commercial purposes.
- + *Refrain from automated querying* Do not send automated queries of any sort to Google's system: If you are conducting research on machine translation, optical character recognition or other areas where access to a large amount of text is helpful, please contact us. We encourage the use of public domain materials for these purposes and may be able to help.
- + *Maintain attribution* The Google "watermark" you see on each file is essential for informing people about this project and helping them find additional materials through Google Book Search. Please do not remove it.
- + *Keep it legal* Whatever your use, remember that you are responsible for ensuring that what you are doing is legal. Do not assume that just because we believe a book is in the public domain for users in the United States, that the work is also in the public domain for users in other countries. Whether a book is still in copyright varies from country to country, and we can't offer guidance on whether any specific use of any specific book is allowed. Please do not assume that a book's appearance in Google Book Search means it can be used in any manner anywhere in the world. Copyright infringement liability can be quite severe.

About Google Book Search

Google's mission is to organize the world's information and to make it universally accessible and useful. Google Book Search helps readers discover the world's books while helping authors and publishers reach new audiences. You can search through the full text of this book on the web at <http://books.google.com/>

Æsopi Phrygis

VITA ET FABVLÆ A VI-
ris doctiss. in Latinam linguam con-
uersæ.

APOLOGI EX Chiliadibus Adagiorum
Erasmi,
EX Lamia Politiani, Crinito, Iohanne An-
tonio Campano, Gellio, Gerbellio, Mantua-
no, & Horatio.

FABVLÆ Aniani, Hadriano Barlando, &
Guilelmo Hermannio interpretibus.

FABVLÆ item Laur. Abstemii.



P A R I S I I S.

Ex officina Roberti Stephani.

M. D. XXXVII.

Æsopi fabula-

TORIS VITA, È GRAECO
Maximi Planudis Latina facta.

Ærum humanarum naturam persecuti sunt & alii, & posteris tradiderunt. Æsopus verò videtur non absque diuino afflatu cum moralem disciplinam attigisset, magno interuallo multos eorum superasse. etenim neque definiendo, neque ratiocinâdo, neque ex historia, quam ante ipsius ætatem tulit tempus, admonendo, sed fabulis penitus erudiendo, sic audientium venatur animos, ut pudeat ratione præditos facere aut sentire, quæ neque aues, neque vulpes: & rursus non vacare illis, quibus pleraque bruta tempore prudenter vacasse finguntur: ex quibus aliqua, pericula imminencia effugerunt, aliqua maximam vtilitatem in opportunitatibus consecuta sunt. Hic igitur qui vitam suam philosophicæ Reip. imaginem proposuerat, & operibus magis quam verbis philosophatus, genus quidem traxit ex Ammorio oppido Phrygiæ, cognomento Magnæ, sed fortuna fuit seruus. Quare & magnopere mihi videtur Platonis illud in Gorgia pulchre simul

A.ii.

& vere dictum, Plerunque enim hæc, inquit, contraria inter se sunt, natura simul ac lex. Nā AESopi animū natura liberū reddidit: sed hominū lex corpus in seruitutem tradidit. Potuit tamen nec sic quidem animi libertatē corrumpere. Sed quanuis ad res varias, & in diuersa loca transferret corpus, à propria tamen sede illū traducere non potuit. Fuit autem non solum feruus, sed & deformissimus omnium suæ ætatis hominum. nam acuto capite fuit, pressis naribus, depresso collo, prominentibus labris, niger, vnde & nomen adeptus est, (idem enim AESopus, quod AETHiops) ventrosus, valgus, & incuruus, fortasse & Homericum Thersiten turpitudine formæ superans. Hoc vero omnium in eo pessimum erat, tardiloquētia, & vox obscura simul, & inarticulata. Quæ omnia etiam videntur seruitutem AESopo parasse. Etenim mirum fuisset, si sic indecenti corpore potuisset seruiētium retia effugere. Sed corpore sane tali, animo vero solertissimo natura extitit, & ad omne commentum foelicissimus. Possessor igitur ipsius tanquam ad nullum domesticum opus commodum, ad fodiendum agrum emisit. Ille vero digressus alacriter operi incubebat. Profecto vero aliquando & hero ad agros, vt inspectionem operarum faceret, agricola quidam ficus egregias decerptas dono tulit. ille vero fructus delectatus pulchritudine, Aga

thopodi ministro (hoc enim erat nomen pueri) seruare iussit, vt sibi post balneum apponeret. Cum vero ita euenisset, atque AEsopus ob quandam necessitatē ingressus esset in domū, occasione capta Agathopus consiliū huiusmodi conseruo cuidam offert, Impleamur, si placet, ficibus heus tu:& si herus noster has requisierit, nos contra AEsopum testificabimur ambo, quòd in domum ingressus sit, ficusque clām comederit:& super vero fundamento, videlicet quòd domum ingressus sit, multa mendacia struemus. neque enim quicquam poterit vnus contra duos, præsertim cum sine probationibus ne mutire quidem audeat. Viso vero hoc, ad opus accesserunt, & ficus deuorantes dicebant in singulis cum risu, Væ tibi infœlix AEsope. Cum igitur herus rediisset à lauacro, & ficus petiisset, audiuiisset autem quòd AEsopus eas comediisset: AEsopum cum ira iubet vocari, & vocato ait, Dic mihi ô execrande, ita me contempsisti, vt in penarium ingredereris, & paratas mihi ficus comederis? Ille audiebat quidem & intelligebat, loqui autem nullo modo poterat ob linguæ tarditatē. Cum iam verberandus esset, & delatores vehementiores instarent, procumbens ad heri pedes, vt sustineret se parum, orabat. Cum autem cucurrisset, & tepidam aquam attulisset, eam bibit:& digitis in os demissis, humorē solum reiecit. non-

A.iii.

dum enim cibum attigerat. Orabat igitur ut idem & accusantes facerent, quo manifestum fieret, quisnam ficus dissipasset. Herus autem ingenium hominis admiratus, sic facere & alios iussit. Illi autem deliberauerant bibere quidem aquam, non tamen demittere in guttur digitos, sed per obliqua maxillarum eos circumferre. Vix dum autem biberant, cum tepida illa aqua, nausea potis inducta, effecit ut sponte fructus redderetur. Tunc igitur ante oculos posito & maleficio ministrorum & calumniam, herus iussit eos nudos flagris caedi. illi vero cognouerunt manifeste dictum illud, Qui in alterum dolos struit, sibi inscius, malum fabricat. Sequenti vero die hero in urbem reuerso, Æsopo vero fodiente, quemadmodum iussus fuerat, sacerdotes Dianæ, siue alii quipiam homines cum à via aberrassent, Æsopum nacti, per Iouem hospitalem obsecrabant hominem, ut quæ in urbem duceret, viam ostenderet. Ille cum sub umbram arboris viros adduxisset prius, & frugalem apposuisset coenam, inde & dux factus ipsis, in quam quærebant viam, induxit. Illi autem tum ob hospitalitatem, tum quod dux eorum fuisset, mirum in modum viro deuincti, manus in cælum eleuarunt, & precibus benefactorem remunerati sunt. Æsopus verò reuersus, inque somnum lapsus ob assiduum laborem & æstum, visus est

videre Fortunam astantem sibi, & solutionem linguæ sermonisque cursum, & eā, quæ fabularum est, doctrinam, largiri. Statim igitur excitat⁹ ait, Papæ vt suauiter dormiui: sed & pulchrum somnium videre visus sum. ecce, expeditè loquor, bos, asinus, rastrum. Per deos intelligo vnde mihi bonum accesserit hoc. quoniā enim pius fui in hospites, propitium numen cōsecutus sum. Ergo benefacere, bona plenum est spe. Sic igitur AEsopus lætatus factō, rursum cœpit fodere. Præfecto agri (Zenas erat ipsi nomen) ad operarios profecto, & horum vnum, quoniam leniter errauerat in opere, virga verberante, AEsopus statim exclamauit, Homo, cuius gratia eum qui nulla iniuria affecit, sic verberas, & omnibus temere plagas ingeris quotidie: omnino renuntiabo hæc hero. Zenas autem hæc ab AEsopo audiens, obstupuit non mediocriter, secūmq; ait, Quod AEsopus loqui cœperit, nulla mihi vtilitas erit: præuertam igitur ipse, & accusabo eum coram domino, antequā hoc ipsum faciat, & me herus procuratione priuet. His dictis, in urbem vectus est ad dominū. Cæterum turbatus cum accessisset, Salue, inquit, here. Ille vero, Quid perturbatus ades, inquit? Et Zenas, Res quædam monstrosa in agro contigit. At herus, Nunquid arbor præter tempus fructū tulit? aut iumentū aliquod præter naturam genuit? Et ille,

A.iiii.

Non ita, sed Æsopus, qui antea erat mutus, nunc loqui cœpit. Ad hæc herus, Sic tibi nihil boni fiat hoc existimanti monstrum esse. Ille autem, Sane, inquit: nam quæ in me contumeliose dixit, sponte prætereo here: in te autem & deos intolerabiliter cōiutatur. His ira percitus herus, Zenæ ait, Ecce tibi traditus est Æsopus, vende, dona, quod vis de eo fac. Cū Zenas autem in potestate sua accepisset Æsopū, quodque in eum haberet imperium ei renuntiasset: ille, Quodcunque visum tibi fuerit, inquit, effice. Accidit autē, cum vir quidam iumenta vellet emere, & propterea per agrum illum iter faceret, Zenam rogauit. Ille, Iumentum, inquit, mihi vendere non licet, sed mancipiū masculum: quod si vis emere, adest. Cum ~~vero~~ mercator iussisset ostendi sibi seruulum, & Zenas Æsopum accersisset, mercator vidēs ipsum, & cachinnatus, Vnde tibi, inquit, ad Zenam, hæc olla? vtrum truncus est arboris, an homo? hic nisi vocem haberet, ferme videretur vter inflatus. Quare mihi iter interrupisti huiusce piaculi gratia? His dictis, iter suū prosequēbatur. Æsopus vero insecutus ipsum, Mane, inquit. Ille autē conuersus, Abi, inquit, à me sordidissime canis. Æsopus autē, Dic mihi, cuius rei causa huc venisti? Et mercator, Sceleste, vt aliquid boni emerem: tui q̃ inutilis & marcidus sis, non egeo. Æsopus cōtrā, Eme me, & si qua

est fides, multū te iuuare potis sum. Ille, Qua in re à te iuuari possem, cum sis odiū penitus? Et AEsopus, Nonne adsunt tibi pueruli domi turbulenti & flentes? his præfice me pædagogum: omnino eis pro larua ero. Ridens igitur de hoc mercator, inquit Zenæ, Quāti, malū, hoc vēdis vas? Ille vero, Tribus, inquit, obolis. Mercator autem statim tres obolos soluit, dicens, Nihil expendi, & nihil emi. Cum igitur iter fecissent, ac peruemisset in suā domū, pueruli duo, qui adhuc sub matre erant, AEsopo viso perturbati exclamauerūt. AEsopus autem statim mercator, inquit, Habes meæ pollicitationis probationem. Ille vero ridēs ingressus, inquit, Sclēta cōseruos tuos. Introgressum autem adstantē videntes illi, Quodnam malū nostro hero, inquit, cōtigit, vt seruulū adeo deformem emerit? Sed, vt videtur, pro fascino domus hunc emit. Nō multo vero post, mercator ingressus apparari res ad iter seruis iussit, quod postridie in Asiam profecturus esset. Illi igitur statim vasa distribuebant. At AEsopus rogabat leuissimū onus sibi concedi tanquam nuper empto, & nondū ad hæc ministeria exercitato. His autē etsi nihil tollere velit veniam præbentibus, ille non oportere dixit omnibus laborantibus, se solum inutilem esse. His quod attollere vellet permittētibus, huc & illuc cum circūspexisset, & vasa cōgregasset diuersa, fac-

cos, & stramenta, & canistros, vnum canistrum panis plenum, quem duo baiulare debebant, sibi imponi iubet. Illi autem ridētes, & nihil esse stultius vili hoc scelesto inquierentes, qui cum paulo antē leuissimum postularat tollere onus, nunc omnium grauissimum elegit. oportere tamen desyderium eius explere: sublatum canistrum imposuerunt AEsopo. Ille verò humeris onere grauatis huc & illuc dimouebatur. Hunc vidēs mercator, admiratus est, & inquit, AEsopus cum ad laborandum promptus sit, iam suum pretium persoluit, iumentum enim onus sustulit. Cum vero hora prādii diuertisset, AEsopus iussus panes dispensare, semitiacuum canistrum multis comedentibus fecit. Vnde etiam post prandium leuiore onere facto alacrius incedebat. Verum vespere quoque illic, quò diuerterāt pane distributo, postera die vacuo omnino in humeros sublato canistro, primus omnium ibat: vt & conseruis, qui hunc animaduertērent præcurrētem dubium faceret, vtrum putridus esset AEsopus, an quis alius: & illi cum cognouissent eum esse, admirarentur quòd denigratus homuncio solertius omnibus fecisset: quoniā qui facile absumerentur panes, sustulisset, cum illi stramenta, & reliquā supellectilem baiularent, quæ ea non sit natura vt sic absumatur. Mercator itaque cū esset Ephesi, alia quidem mancipia cum lucro vendidit: re-

manferunt autem ei tria, Grammaticus, Cátor,
& AEsopus. Cum vero quidam ex familiari-
bus ei suafisset in Samū vt nauigaret, tanquam
ibi cum maiore lucro diuendituro feruulos,
persuadet. Cum autem mercator peruenisset in
Samum, Grammaticum quidem & Cátorem,
vtrunque noua veste indutū statuit in foro: sed
AEsopū quoniā nulla ex parte poterat ornare
(totus enim erat mendosus) veste ex sacco ei
circumposita, mediū inter vtrunque cōstituit,
vt & videntes stuperēt, dicentes, Vnde hæc ab-
ominatio, quæ & alios obscurat? AEsopus au-
tem quanuis à multis morderetur, stabat tamē
audacter in ipsos intuens. Xanthus verò phi-
losophus habitans tunc Sami, profectus in fo-
rum, & videns duos quidē pueros cum ornatu
astantes, mediū vero horum AEsopū, admira-
tus est mercatoris commentū. nanque turpem
in medio collocauerat, vt appositione defor-
mis, pulchriores seipsis adolescentuli appare-
rent. Propius autē astans, percontatus est Can-
torem, cuius esset. Et is, Cappadox. Tum Xan-
thus, Quid igitur scis facere? Hic, Omnia. At-
que ad hæc AEsopus risit. Discipuli verò, qui
cum Xantho vnà erant, vt viderunt ipsum ri-
sisse, & ostendisse dentes, statim aliquod mon-
strum videre arbitrati sunt. Vno autem dicēte,
Certe hernia est, dētes habēs: Alio vero, Quid-
nam videns, risit? Alio, non risisse, sed riguisse:

omnibus autem volētibus cognoscere cur risisset, vnus ipsorum accedens, AEsopo inquit, Cuius rei gratia risisti? Et is, Abscede marina quis. Ille vero cōfuso funditus eo sermone, repentēque secedēte, Xanthus inquit mercatori, Quanto pretio cantor? Illo autem mille obolis respondente, ad alterum iuit, immenso audito pretio. At qui & hunc rogitante philosopho, cuiusnā foret: & audito Lydum esse: rursusque rogante, Quid ergo scis facere? & illo dicete, Omnia, Iterum risit AEsopus. Ex scholasticis autem quodam dubitante, Quidnā hic ad omnes ridet? Alius ei dixit, Si vis & tu marinus hircus vocari, roga. Xanthus autem rursus rogauit mercatorem, Quāto pretio grammaticus? Et ille, Tribus millibus obolorum, respondit. AEgre tulit philosophus immensum pretium, & auersus discedebat. Scholasticis autem petentibus, annon placuerint ei seruuli, Næ inquit: sed decretum est, non emere mancipium pretiosum. Vnus autem ipsorum dixit, Si hæc ita se habent, igitur turpem hunc quin emas, nulla lex vetat: idem enim & hic ministerium afferet, & nos pretium huius impendemus. Ad hæc Xanthus ait, Ridiculum esset, vos soluisse pretium, me autem seruū emisse: alioqui & vxor mea munditiæ studiosa, non ferret a deformi seruulo serui sibi. At scholastici rursus dixerunt, In promptu est sententia, ne pa-

reatur foeminæ. Tunc philosophus, Faciamus prius periculum, an sciat aliquid, ne & pretium incassum pereat. Adiens igitur AEsopum, Gau-
de, inquit. Et ille, Numnam tristabar? Et Xan-
thus, Saluto te. Ille autem, Et ego te. Xanthus
vnâ cum aliis inexpectato, & prompto respõ-
so stupefactus rogauit, Cuias es? Ille, Niger. Et
Xanthus, Nō hoc inquam, sed vnde natus sis.
Et is, Ex ventre matris meæ. Nō hoc dico, sed
in quo loco natus sis. Et ille, Non renuntiauit
mihi mater mea, vtrum in sublimi loco, an in
humili. Et philosophus, Quid vero facere no-
sti? Ille, Nihil. Et Xanthus, Quomodo? Quoniā
hi omnia nosse professi sunt, mihi autem reli-
querunt nihil. Atque his scholastici vehemen-
ter delectati, Per diuinam prouidentiam, dixe-
runt, valde bene respondit. nullus enim est ho-
mo, qui omnia norit: & propterea scilicet risit.
Rursus igitur Xanthus inquit, Vis emam te?
Et AEsopus, Me hac in re cōsultore eges? vtrū
tibi videtur melius aut emere, aut non, fac. nul-
lus enim quicquam vi facit. hoc in tua positū
est volūtate: & si volueris, crumenæ ianuam a-
periens, argentum numera: sin vero minime, ne
cauillare. Rursus igitur scholastici inter se di-
xerunt, Per deos, superauit præceptorem. Xan-
thus vero cum dixisset, Si emero te, fugere vo-
les? ridens AEsopus ait, Hoc si voluero facere,
nullo modo vtar te cōsultore, vt & tu paulo

ante, me. Et Xanthus, Bene dicis, sed deformis es. Et ille, Mentē inspicere oportet, ô philosophē, & nō faciem. Tūc mercatorē adiens Xanthus, inquit, Quanti hūc vendis? Et ille, Vt vituperes meas merces ades, quoniam te dignis omissis pueris, deformem hunc eligis. alterum horum eme, hunc autem auctarium accipe. Et Xanthus, Nō certe, sed hūc. Et mercator, Sexaginta obolis eme. At scholastici confestim collatos exposuerūt: Xanthus autem possedit. Itaque publicani venditione cognita, aderant indagantes quis vendiderit, quis emerit. at cū puderet vtrunque se pronuntiare propter vilitatem pretii, Æsopus stans in medio exclamavit, Qui venditus est, ego sum: qui emit, hic: qui vendidit, ille. si verō tacuerint, ego igitur liber sum. Publicani vero diffusi gaudio, donato Xantho vestigali, abierunt. Æsopus igitur sequebatur in domum euntem Xanthū. Cum meridianus autem æstus esset, Xanthus inter deambulandum, pallium trahendo mingebatur. Quod videns Æsopus, vestibis illius apprehensus retro, ad seipsum traxit, atque inquit, Quā celerrime me vende, quoniam fugiam. Et Xanthus, Quamobrē? Quoniam, inquit, non possem tali seruire hero. si enim tu, qui herus es, & neminē times, tamen relaxationem non præbes naturæ, sed cundo mingis: si obtigerit seruum me ad aliquod mitti ministe-

riū, & inter eundū tale quid exigit natura, necesse omnino fuerit volando cacare. Et Xanthus, Hoc te turbat? tria mala volens cuitare cūdo mingo. Et ille, Quæ? Et hic, Stanti mihi, caput perussisset sol: pedes vero, terræ solum torridū: lotii autem acrimonia, olfactum offendisset. Tūc AESopus, Vade, persuasisti mihi. Postquā autem domi fuerūt, Xanthus iubens AESopo manere ante vestibulū, quoniam elegantiusculam esse sibi mulierculā sciebat, neque oportere ilico talem turpitudinē ei ostendi, antequām aliquis ipsi vrbana diceret, ipse ingressus dicit, Domina non etiā posthac obiiicies mihi sterium quod mihi tuæ pedisequæ præstāt iam enim & ego puerū tibi emi, in quo videbis pulchritudinē, qualem nūquam vidisti, qui & iam ante vestibulum stat. & ille quidem hæc. Pedisequæ autem vera existimantes, quæ dicta fuerant, inter se nō mediocriter cōtendebant, cui nam ipsarū sponsus nuper emptus futurus sit. Xanthi vero vxore intrō vocari nouitium iubēte mancipiū, vna ex aliis magis accelerans, & vt arrhabonē vocationē arripiens, nouitiū seruū egressa accersebat. Et illo dicente, Ecce ego adsum: stupefacta, Tu, inquit, es? Et hic, Næ. Et illa, Sine inuidia, ne ingrediaris intrō, omnes alioqui fugiēt. Alia tamē egressa, cūmq; intuita, Cædatur tua, inquit, facies, & huc ingredi, sed ne appropinques mihi. Ingressus stetit corā

domina. quæ cum eum vidisset, oculos auertit ad virum, inquit, Vnde mihi hoc monstrum attulisti? abiice ipsum à facie mea. Et ille, Satis tibi domina: ne meum submorde nouitiū seruū. Hæc autem, Videris Xanthe me perosus, aliam inducere velle: & fortè dum pudet dicere mihi vt tua domo abscedam, canicipitē mihi hunc apportasti, vt eius ægre latura ministeriū, fugiam. Da igitur mihi dotem meam, atque ibo. Ad hæc Xantho increpante Æsopum tamquam in itinere vrbana quædam locutum de mictu inter eundem, nunc vero mulieri nihil dicentem, Æsopus ait, Proiice ipsam in barathrum. Et Xanthus, Tace scelus, an nescis me hanc, vt meipsum, amare? Et Æsopus, Amas mulierculam? Et ille, Admodū quidem fugitiue. Ad hæc Æsopus pulsato medio pede, valde exclamauit, Xanthus philosophus vxorius est. Et versus ad suam dominam ait, Tu ô domina velles philosophum emisse tibi seruū iuuenem, bono habitu, vigentē, qui te nudam in balneo spectaret, & tecum luderet in dedecus philosophi? O Euripides, aureū ego tuum inquam os, talia dicens, Multi impetus fluctuum marinorum, multi fluminū, & ignis calidi flatus. dura res paupertas, dura & alia infinita: tamen nihil æque durum vt mulier mala. Tu vero ô domina philosophi vxor à pulchris adolescentulis tibi vt ministretur noli, ne quo pa-

&to contumeliam viro tuo inflixeris. Ista hæc audiens, cum nihil contradicere posset, Vnde vir, inquit, pulchritudinem hæc venatus es? sed & loquax putridus hic videtur & facetus, reconciliabor igitur ei. Tum Xanthus, AEsopo, recōciliata est tibi tua hera. Et AEsopus ironice loquens, Magna res, inquit, placare mulierē. Et Xanthus, Tace posthac: emi enim te ad seruiendum, non ad contradicendū. Postera die Xanthus AEsopo sequi iussu, ad hortum quēdam iuit empturus olera. Cum vero olitor fasciculum olerum messuisset, accepit AEsopus. Xantho autem soluturo iam hortulano pecuniam, hortulanus, Sine, inquit, here, vnū problema à te desydero. Et Xanthus, Quidnam? Tū ille, Quid ita, vt quæ à me plantantur olera, quanuis diligenter & fodiantur, & irrigentur, tardum tamē suscipiunt incrementum: quibus vero spōtanea è terra pullulatio, etsi nulla cura adhibetur, iis tamen celerior germinatio? Xanthus igitur (licet philosophi quæstio foret) cū nihil aliud sciret dicere, A diuina prouidentia & hoc inter cætera gubernari inquit. AEsopus vero (aderat enim) risit. Ad quem philosophus, Ridēsne, an derides? Et AEsopus, Derideo, inquit, sed non te, verum qui te docuit. Quæ enim à diuina prouidentia fiunt, hæc à sapientibus viris solutionem sortiuntur. oppone itaque me, & ego soluam problema. interim ita-

B.i.

que Xanthus cōuersus inquit olitori, Minime omnium decens est ô amice, me, qui in tantis auditoriis disceptauerim, nunc in horto soluere sophismata. puero autem huic meo, qui cōsequentia multorum callet, si proposueris, solutionem consequêris quæsit. Et olitor, Hic turpis literas nouit? ô infœlicitatem. Sed narra ô optime, si quæsit declarationem nosti. Et AEsopus, Mulier, inquit, cum ad secundas nuptias iuerit, liberis ex priore viro susceptis, & virum quoque inuenerit filios ex priore vxore genuisse, quos ipsa filios adduxit, horum mater est: quos inuenit penes virum, horum est nouerca. multam igitur in vtrisque ostendit differentiam. nam quos ex se genuit, amâter & accuratè nutrire perseuerat, alienos verò partus odit, & inuidia vtens, illorum cibum diminuens, suis addit filiis. illos enim natura quasi proprios amat: odio autem habet, qui viri sunt, quasi alienos. Eodem modo & terra, eorum quæ ipsa ex se genuit, mater est: quæ autem tu plantas, horum est nouerca. huius rei gratia, quæ sua sunt, vt legitima magis nutrit ac fouet: à te autem plantatis vt spuriiis non tantum alimenti tribuit. His delectatus olitor, Credideris mihi, inquit, quod me graui solitudine ac garrulitate leuaris. Abi gratis ferens olera, & quoties tibi his opus est, tanquam in proprium hortum vadens accipe.

Post dies aliquot rursus in balneum proficiscitur Xanthus. Quibusdam autem amicis ibi inuentis, ad AEsopum loquitur, ut in domum currat, & lentem in ollam iniectam coquat. Ille abiens granum vnum lentis in ollam iactum coquit. Xanthus ergo vna cum amicis lotus vocauit hos compransuros, praefatus tamen, & quod tenuis esset futura coena, utpote ex lente, quodque non oporteret varietate ferculorum amicos iudicare, sed probare voluntatem. His vero profectis, & in domum ingressis, Xanthus inquit, Da nobis a balneo bibere AEsope. Illo vero ex defluxu balnei accipiente & tradente, Xanthus foetore repletus, Hem quid hoc, inquit, AEsope? Et ille, A balneo, ut iussisti. Xantho autem praesentia amicorum iram compescente, & peluim sibi apponi iubente, AEsopus pelui apposita stabat. Tunc & Xanthus, Non lauas? Tum ille, Iussum est mihi ea facere quae iusseris: tu nunc non dixisti, Inice aquam in peluim, & laua pedes meos, & pone soleas, & quaecunque deinceps. Ad haec igitur amicis Xanthus ait, Num enim seruum emi? nullo modo, sed magistrum. Discumbentibus itaque ipsis, & Xantho AEsopum rogante, an cocta sit lens, cochleari acceptum ille lentis granum tradidit. Xanthus accipiens, ac ratus gratia faciendi periculum coctionis lentem accepisse, digitis conterens ait, Bene cocta est, af-

B. ii.

fer. Illo solum aquam vacuante in scutellas, & apponente, Xanthus, Vbi est lens, inquit? Et is, Accepisti ipsam. Et Xanthus, Vnum granum coxisti? Tum AESopus, Maxime: lentem enim singulariter dixisti, non lentes, quod pluratiue dicitur. Xanthus ergo prorsus consilii inops, Viri focii, ait, hic ad infantiā me rediget. Deinde conuersus ad AESopum ait, Sed ne videar, improbe serue, amicis iniurius, abiens e me pedes porcinos quatuor, & perceleriter coctos appone. Festinus hoc peragit: ac dum pedes coquerentur, Xanthus iure volens verberare AESopum, cum esset in re aliqua ad vsum occupatus, vnum ex pedibus ex olla clanculum auferens occulit. Paulo post autem & AESopus veniens, & ollam perscrutatus, vt tres solos pedes vidit, cognouit insidias sibi aliquas factas: & accurrens in stabulum, saginati porci vnum ex quatuor cultro amputans, & pilis nudans in ollam iecit, ac coxit cum cæteris. Xanthus vero veritus ne AESopus subreptum pedem non inueniens, fugeret, rursus in ollam ipsum iniecit. AESopo autē in patinam pedes euacuante, ac quinque his apparentibus, Xanthus, Quid hoc, inquit, AESope? quomodo quinque? Et ille, Duo porci quot habet pedes? Et Xanthus, Octo. Tum AESopus, Sunt ergo hic quinque, & saginatus porcus inferius tripes pascitur. Xanthus admodū moleste ferens,

amicis inquit, Nōne paulo antè dixi, quòd celerrime hic me ad insaniam rediget? Et AEsopus, Here nosti id quod ex additione & subductione in quantitatem secundum rationalem summam colligitur, non esse errorē? Xanthus igitur nullam causam honestam inueniens verberandi AEsopum, quieuit. Postridie autem ex scholasticis quidā sumptuosam apparans coenam, cum aliis discipulis & Xanthū inuitauit. Coenantibus igitur, Xanthus partes ex apposis accepit electas, & AEsopo ponēstanti dedit, Abi, inquit ei, beneuolæque meæ hæc trade. Ille vero decedens, secum cogitabat, Nūc occasio est vlcisci meam dominam, propterea quòd me, cum nouitius veni, cauillata est. videbit igitur an hero meo bene velit. Profectus itaque in domum, sedit in vestibulo: & hera accita sportulam partium coram ipsa posuit, ac inquit, Hera, hæc omnia herus misit, nō tibi, sed beneuolæ. Cūque canē vocasset, atque dixisset, Veni Lycæna, comede, tibi enim herus hæc iussit dari: particulatim cani omnia proiecit. At post hoc ad herum regressus, & rogatus an beneuolæ dederit omnia, Omnia, inquit, & coram me omnia comedit. Illo vero iterum rogante, Et quidnā edens ait? Et is, Mihi quidem nihil quicquam dixit, sed secum tibi gratias habebat. Vxor tamē Xanthi eam re calamitosam esse arbitrata, nepe accusata, quòd

B.iii.

vel caniculæ beneuolentia in virum cederet, ac subdens sese non amplius in posterum cohabitaturam cum eo, ingressa cubiculum plorabat. potu autem procedente, & quæstionibus alternis propositis, ac vno ex ipsis ambigente, quando futura esset ingens inter homines turbatio: AEsopus ponè stans, ait, Cum resurrexerint mortui, repetentes quæ possederint. Et scholastici ridentes dixerunt, Ingeniosus est nouitius hic. Alio verò rursus proponente, quamobrem ouis ad eadem tracta, nō exclamet, sus autem quāmaxime vociferetur, AEsopus rursus ait, Quoniam ouis assueta mulgeri, aut etiam velleris onus deponere, tacite sequitur. ideo etiam pedibus arrepta, & ferrum videns, nihil graue suspicatur, sed illa vsitata & sola videtur passura: sed sus, vt quæ neque mulgetur, neque tondetur, neque nouit ad horum aliquid trahi, sed carnes suas tantum vsui esse, merito vociferatur. His sic dictis, discipuli rursus laudauerunt ipsum versi in risum. Finito conuiuio, & Xantho in domum reuerso, & vxorem pro more aggresso alloqui, illa ipsum auersata, inquit, Ne mihi propinquus fias, da mihi dotem meā, & abibo: non enim manserim tecum posthac. tu autem abiens cani adulare, cui misisti partes. Et Xanthus stupefactus ait, Omnino mali mihi aliquid rursus attulit AEsopus. Et vxori inquit, Domina, num me poto, tu ebria es? cui

partes mihi? nōne tibi? Non per Iouem, mihi quidem minime, inquit illa, sed cani. Xanthus AEsopo accito, inquit, Cui dedisti partes? Et ille, Beneuolæ tuæ. Et vxori Xanthus, Nihil accepisti? Et illa, Nihil. Et AEsopus, Cui enim iussisti, here partes dari? Et ille, Beneuolæ meæ. Et AEsopus cane vocata, Hæc tibi, inquit, bene vult. nam mulier etsi bene vellet dicatur, tamen minima quaque recula offensa contradicit, conuitiatur, abit. canem tamen verberato, expellito, non tamen discedet: sed oblita omnium, statim benigne blanditur & cum gratia hero. Oportebat igitur dicere here, Vxori has partes ferto, & non beneuolæ. Et Xanthus, Vides domina non meam esse culpam, sed eius qui tulit? tolera itaque, nec deerit mihi occasio, qua cum verberem. Illa vero non credente, verum clam ad suos parentes regressa, AEsopus inquit, Non recte dixi ô here, canem tibi magis bene velle, quàm meam heram? Diebus autem aliquot præteritis, & vxore irreconciliata manente, & Xantho affines quosdam ad ipsam, vt reuerteretur domum, mittente: illa, cum cedere nollet, ac proinde Xanthus in moerore esset, AEsopus audiens eum, inquit, Ne te afflictus here, ego enim eam cras venire sponte & citissime faciam ad te. Accepta pecunia AEsopus in forū proficiscitur: ac emptis anserib⁹, & gallinis, & aliis.

B.iiii.

quibusdam ad conuiuium idoneis, ambulans, domos circuibat: transibat igitur & ante domū parentum heræ suæ, ignorare simulans illorum esse, & in ea heram manere. Cūque in quendā ex domo illa incidisset, rogabat, an aliquid ad nuptias vtile domestici possent sibi vendere. Ille autem rogat, cui est opus his? Xanthio, inquit, philosopho. cras enim vxori copulandus est. Eo vero ascendente, & vxori Xanthi hæc, vt audiuit, renuntiante, illa cursim, & propere ad Xanthum ilico pergit, contra ipsum clamat, dicens inter alia & hæc, Non me viuente, ô Xanthe, alteri vxori coniungi poteris. Sicque mansit in domo per AEsopum, quemadmodum propter illū discesserat. Rursus post dies aliquot inuitans Xanthus discipulos ad prandium, AEsopo inquit, I, eme optimum quodque & præstantissimum. Ille inter eundem secum dicebat, Ego docebo herum non stulta mandare. Cum linguas igitur solum suillas emisset, & apparasset discumbentibus, linguam assatam singulis cum salsamento apposuit. Discipulis laudantibus vt philosophicū primum ferculum, propter linguæ ad locutionem ministerium: rursus elixas AEsopus linguas apposuit, atque iterum etiam ferculo alio, atque alio petito, ille nihil aliud quàm linguas proponebat. Discipuli autē eodem subinde cibo repetito indignati, Quousque linguas, in-

quiunt? quippe nos per diem linguas edendo, nostras dolumus. Xanthus inquit iratus, Nihil aliud tibi est AEsopos? Et is, Nō certe. Tum ille, Nōne mandavi tibi sordidissime homule, optimum quodque, & praestantissimum obsonari? & AEsopus, Multas habeo tibi gratias, quod me philosophis praesentibus increpaueris. Quid igitur fuerit lingua melius & praestantius in vita? omnis enim doctrina, & philosophia per ipsam monstratur ac traditur, per ipsam dationes, acceptiones, fora, salutationes, benedictiones, musa omnis. per ipsam celebrantur nuptiae, ciuitates eriguntur, homines seruatur. Et, vt breuiter dicam, per ipsam tota vita nostra consistit: nihil ergo lingua melius. Ob haec discipuli AEsopum recte loqui dicentes, aberrasse vero magistrum, abiire singuli in domum. Postridie rursus accusantibus ipsis Xanthum, ille respondebat, non secundum voluntatem suam haec fuisse, sed inutilis serui nequitia. hodie autem permutabit coenam, & ipse praesentibus vobis cum eo colloquar. Ac vocato eo, vilissimum quodque & pessimum obsonari iubet, quod discipuli secum forent coenaturi. Ille autem nihil mutatus, rursus linguas emit, & apparatus discumbentibus apposuit. Hi inter se submurmurabant, Porcinam rursus linguam. Et mox iterum linguas apposuit. Et valde iterum atque iterum. Xanthus autem iniquo

animo ferēs, Quid hoc, inquit, AESope? num
rursus mandavi tibi optimū quodque, & præ-
stantissimum obsonari, ac non potius vilissi-
mum quodque, & pessimum? Ille autem, Et
quid vnquam peius lingua ô here? nōne vr-
bes per ipsam corruunt? non homines per i-
psam interficiuntur? non mendacia omnia, &
maledicta, & periuria per ipsam perficiuntur?
non nuptiæ & principatus, & regna per ipsam
euertuntur? non, vt summatim dicam, vita o-
mnis per ipsam infinitorum errorum referta
est? Hæc AESopo dicente, quidam ex vnâ dis-
cūbentibus, Xantho inquit, Hic, nisi valde te-
ipsum munieris, non dubia erit insanix causa
tibi. qualis enim forma, talis & anima. Et AE-
sopus ad eum, Tu mihi videris ô homo, prauus
quidam, & curiosus esse, herum irritans
contra seruum. Xanthus autem ad hæc, cau-
sam cupiens verberandi hominem, Fugitiue,
inquit, quoniam curiosum dixisti amicum, o-
stende mihi incuriosum hominem adductū.
Egressus igitur postridie in plateam AESopus,
& eos qui præteribant, circumspiciens, videt
quendam in loco quodam diu sedētem: quem
iudicans secum otiosum & simplicem esse, ac-
cedens, inquit, Herus te inuitat secum pransu-
rum. Rusticus ille nihil sciscitatus, neque quis
esset à quo inuitaretur, ingressus est in domū:
& cum ipsis calceis, vt erant viles, discubuit.

Rogante autem Xantho, Quis hic? AEsopus ait, Incuriosus homo. At Xanthus uxori in aurem dicit ut sibi obsequeretur, & quod ipse iusserit faceret, ut plagas AEsopo honesta ratione inferret. Deinde coram omnibus inquit, Domina, aquam in peluim iniice, & pedes hospitis laua. Cogitabat enim secum omnino hospitem recusaturum: AEsopum vero, quod ille curiosus esset, verberibus caesum iri. Illa igitur iacta aqua in peluim, ibat pedes hospitis lotura. At ille cognoscens hanc esse domus dominam, secum loquebatur, Honorare me omnino vult, atque huius rei gratia suis manibus pedes meos vult lauare, cum ancillis queat hoc mandare. Extēsis igitur pedibus, Laua, inquit, hera. ac lotus discubuit. Xantho autem iubente vinū hospiti dari quod biberet, rursus ille cōsyderabat secū, ipsos antē oportere bibere: sed quia sic ipsis visum est, nō opus mihi hāc inquirere. Accipiens igitur bibit. Prudentibus verò, & ferculo quodam hospiti appposito, atq; illo suauiter comedente, Xāthus cocum, quod male hoc condiuisset, criminabatur, atque etiam nudū verberibus afficiebat. Rusticus autem secum dicebat, Ferculum quidem optime coctum est, & nihil ei deest, quo minus recte paratum sit: si autem absque causa vult suum seruum flagellare paterfamiliās, quid ad me? Xantho autem ægreferēte, neque iucunde af-

fecto, quoniam nihil hospes curiose inquirebat, tandem placentæ allatæ sunt. Hospes vero tanquam nunquā placentam gustasset conuoluens, & accipiens, ipsas ut panes comedebat. Xanthus autem pistorem accusauit, dixitque ei, Curnam ô execrande, absque melle, ac pipere placetas præparasti? Ille inquit, Si cruda est, ô here, placenta, me verbera: si vero non ut oportebat, præparata est, non me, sed heram accusa. Et Xanthus, Si à mea hoc factum est vxore, viuam ipsam nunc comburā. Atque iterum vxori innuit, ut sibi obsequeretur propter AESOPUM. Cum igitur iussisset sarmenta in medium afferri, pyram succendit, & arreptā vxorem prope pyram egit, ut crederetur ipsam in ignem esse immissurus. differebat autem aliquo modo, & circumspeciebat rusticum siquo modo assurgens à tali audacia prohibere ipsum aggrederetur. Sed is secum rursus considerabat, Cum nulla adsit causa, quidnam sic irascitur? Deinde inquit, O paterfamiliās, si hoc iudicas oportere fieri, expecta me parumper dum digressus adducam & ipse meam ex agro vxorē, ut ambas simul comburas. Hæc à viro Xanthus audiens, & huius synceritatem, ac generositatem admiratus, AESOPUS inquit, Ecce vere homo incuriosus, habes accepta præmia victoriæ ô AESOPE. satis est tibi de cætero. dein vero libertatem tuam assequeris. Postridie autem

Xanthus iussit AEsopo in balneas ire, & scrutari, an multa adesset turba, velle enim lauari. Abeunti autem Prætor occurrens, & Xanthi ipsum esse cognoscens, interrogauit quonam iret. Quod cum se is negasset scire, existimans Prætor interrogationem suam floccipendi, in carcerem ipsum adduci iubet. Cum igitur abduceretur AEsopus, clamauit, Vides ô Prætor, quemadmodum recte responderim? quæ enim non expectaui, & occurri tibi, & in carcerem iam trahor. Tum Prætor stupefactus responsi promptitudine, fuit abire. AEsopus autem profectus in balneas, multam turbam in ipsis intuitus est, sed & lapidem videt in medio ingressu positum, in quem singuli ingrediētes, & egredientes offendeabant. hunc autem vnusquispiā ingrediens vt lauaretur, sublatum transposuit. Reuersus igitur ad herum, Si vis, inquit, here lauari, vnum hominē in balneis vidi. Xanthus profectus, ac multitudinem lauantium vidēs, dixit, Quid hoc, ô AEsope? nōne vnū hominem dixisti te vidisse? AEsopus, Certe, inquit, nam lapidem illum (manu ostendens) ante ingressum positum reperi, in quem ingredienti omnes & exeuntes offendeabant. vnus vero quidam antequam illideret, eleuatum transposuit. Illum igitur vūm hominem dixi vidisse, pluris faciens quā alios. Tum Xanthus, Nihil apud AEsopum tardum est ad responsio-

nem. Cum aliquādo Xanthus ex latrina rediret, interrogauit Æsopum, Quid ita homines post cacationem, ventris excrementa aspiciunt? Ille ait, Antiquis temporibus vir quidam delicatius viuens multo tēpore præ deliciis in latrina sedebat, vt & sua illic immorans cacauerit præcordia. Et illo tempore igitur timentes cæteri homines, ventris inspiciunt fordes, ne quo modo & ipsi hoc patiantur. Sed tu here, ne time. non enim sunt tibi præcordia. Die autem quodam celebrato conuiuio, Xanthus cum aliis philosophis discumbebat: & potu iam inualescēte, crebræ quæstiones inter hos versabantur: atque Xantho incipiente turbari, Æsopus adstans, ait, Here, Bacchus tria possidet temperamenta, primum voluptatis, secundum ebrietatis, tertium contumeliæ. Vos igitur poti iam & lætati, quæ reliqua sunt, obmittite. Tū Xanthus iam ebrius, ait, Tace, inferis consule. Et Æsopus, Igitur & in infernum distrahēre. Ex discipulis autem quidam subebrium iam Xanthum videns, &, vt in vniuersum dicam, temulentum, O præceptor, inquit, potestne homo aliquis ebibere mare? Et ille, Admodum quidem: ego enim ipse hoc ebibebam. Discipulus, At si nō poteris, quamnam tibi multam irrogabo? Tum Xanthus, Domū meam depono totam. Atque interim depositis anulis pacta firmauerunt, tum disces-

serunt. Postridie diluculo, excitato Xantho, ac faciem lauante, anulum inter lauandum non vidit. AEsopum de eo interrogat. Ille, Nescio, inquit, quidnam factum fuerit: sed vnum scio tantū quòd à domo decideris tua. Tum Xanthus, Quamobrem? AEsopus, Quoniam heri ebrius pepigisti mare ebibere, atque in pactis deposuisti & anulum. Et is, Tum quomodo maius fide opus potero? verū te nunc rogo, si qua cognitio, si qua prudentia, si qua experientia, præsto sis ac opem porrige, vt vincam, aut pacta dissoluam. AEsopus autē, Vincere quidem haud licet, sed vt soluas pacta, efficiam. Cum hodie rursus in vnum conueneritis, nullo modo videaris timere: verum quæ pactus es ebrius, eadem sobrius quoque dic. Iube itaque stramenta, & mensam in litore poni, & pueros paratos cum poculis porrigere tibi marinam aquam. Cū autem omnem videris turbam currisse ad spectaculum, ipse discumbens iube ex mari impleri poculum: atque hoc accepto omnib⁹ audiētibus, dic pactis præfecto, Quænam apud vos foedera iniuimus? Atq; is respōdebit tibi, quòd pepigeris mare ebibere. Conuersus igitur tu ad omnes, sic dicito, Viri Samii, scitis & vos penitus quamplurimos fluuios prorumpere in mare, ego autē pepigi mare solum ebibere, non etiam exeūtia in ipsum flumina. hic itaque scholasticus prius coerceat

flumina omnia, deinde statim mare solum ebibam. Xanthus autē futuram ex hoc pacti solutionem cognoscēs, vehementer lætatus est. Populus igitur ad litus confluit ad spectaculum eius, quod faciendum erat: cūque Xanthus quæ edoctus fuerat ab Æsopo fecisset, ac dixisset, Samii admirati, acclamarunt, ac ipsum laudarunt. Scholasticus autem Xanthi pedibus obuolutus, & victum se confitebatur, & pacta rogabat dissolui. quod & fecit Xanthus exorāte populo. Profectis autem ipsis in domū, Æsopus audiens Xanthū, inquit, Per omnem vitā tibi gratificatus sum, nōne dignus sum ō here consequi libertatem? At Xanthus obiurgando ipsum repulit, dicens, An nolo ipse hoc facere? sed exi ante vestibulum, & speculari: & si videris duas cornices, renuntia mihi: bonum enim auguriū hoc. quod si vnam videas, hoc malum. Accedens igitur Æsopus, cum duas forte ita cornices super quadam vidisset arbore sidentes, accedens Xantho renuntiauit. Exeunte autem Xantho, altera harum euolauit, & Xanthus alteram solam videns ait, Nōne dixisti mihi execrāde duas vidisse te? Et is, Ita, sed altera euolauit. Tum Xanthus, Deerat tibi fugitiue me vt deluderes? Iubet eum igitur denudatum verberari. At dum Æsopus verberaretur, profectus quidā inuitauit ad cœnam Xanthum, Æsopo inter verbera exclam-

mâte, Hei mihi misero, ego enim qui duas vi-
di cornices, verberor: tu vero, qui vnam tantū,
in cōuiuium abis. vanum itaque fuit auguriū.
Tum Xanthus solertiam eius admiratus, cessa-
re iubet verbera. Non multis autem post die-
bus philosophos & rhetoras cū inuitasset Xan-
thus, iussit AEsopo ante vestibulū stare, & nul-
lum indoctū ingredi sinere, sed doctos solos.
Hora autem prādii clauso vestibulo, AEsopus
intus sedebat. Ex inuitatis autē quodam pro-
fecto, & ianuam pulsante, AEsopus intus ait,
Quid mouet canis? Ille putās canis vocari ira-
tus discessit. sic ergo vnusquisq; veniens reuer-
tebatur iratus, putans iniuria affici, AEsopo ea-
dem omnes interrogāte. Cum autem vnus ex
ipsis ostium pulasset interrogatus quid moue-
ret canis, respōdit, Caudam & aures. AEsopus
ipsum recte iudicans respondisse, aperta ianua
ad herum duxit, ac inquit, Nullus philoso-
phus ad conuiuium tuum venit ō here, prāter
hunc solum. Xanthus igitur valde tristatus est;
deceptum se existimans ab inuitatis. Postridie
cum venissent inuitati ad literarium ludum,
accusabant Xanthum, dicentes, Vt videris ō
prāceptor, cupiebas quidem ipse contemnere
nos: sed veritus, putridum in vestibulo consti-
tuisti AEsopum, vt nos iniuria afficeret, & ca-
nes vocaret. Et Xanthus, Insomniūne id est,
an vera res? Tum illi, nisi stertimus, vera res.

C.i.

Cōfestim accersitus AEsopus, & rogatus cum ira, cuius rei gratia amicos ignominiose amolitus esset, ait, Non tu mihi here mandasti, ne quem vulgarem ac indoctum hominem pmitterem in tuū conuenire conuiuium, sed solos doctos? Tum Xanthus, Et quales hi, nōne docti? Et AEsopus, Nullo pacto. ipsis etenim pulsantibus ianuā, & me intus rogitante quidnam moueret canis, nullus eorū intellexit sermonem. Ego igitur cum indocti omnes viderentur, nullū ipsorum introduxi, nisi hunc, qui docte respōdit mihi. Sic igitur cum AEsopus respondisset, recte omnes dicere ipsum confirmarūt. Ac post dies rursus aliquot Xanthus sequente AEsopo, ad monimenta accessit. & quæ in arcis erant epigrammata legēs, seipsum delectabat. At AEsopo in quadam ex ipsis inscriptas literas has vidente, α. β. γ. δ. ε. ζ. η. θ. ο. π. ρ. σ. τ. υ. φ. χ. ostendentēque Xantho, atque rogante, an hasce nouisset, diligēter ille scrutatus, non potis fuit harum inuenire declarationem, ac fassus est dubitare omnino. Tum AEsopus, Si per hanc columnulam, ô here, thesaurum ostendam tibi, qua re me remunerabis? Et is, Confide: accipies enim libertatem tuam, atque dimidium auri. Tunc AEsopus distans à cippo passus quatuor, & fodiens, accepit thesaurum, & tulit heros, dicens, Da mihi promissum, cuius gratia inuenisti thesaurum. Et Xanthus, Non, si &

ego sapiam, nisi & sensum literarum mihi dixeris: nam scire hoc multo re inuenta mihi pretiosius. Et AEsopus, Qui thesaurum infodit hic, vt vir eruditus, literas inscalpsit has, quæ & inquirunt, α, ἀφράδης. β, ἐρήματα. δ, πᾶσι. ρα. ο, ὀρύξασ. ι, ἀρύσεις. θ, πηγευρόν. χ, χρυσίον.

Id est, recedens passus quatuor, fodit inueniens thesaurum aureum.

Xanthus autem, Quia ita solers es & astutus, non accipies tuam libertatē. Et AEsopus, Renuntiabo dandum aurum, ô domine, regi By-
santinorum: illi enim reconditum est. Et Xanthus, Vnde hoc nosti? Et ille, Ex literis, hoc enim inquirunt, α, ἀπόδος. β, βασιλεῖ. δ, διονυσίω. ο, ὄν. ι, ἄρεις. θ, πηγευρόν. χ, χρυσίον.

Id est, redde regi Dionysio quem inuenisti thesaurum aureum.

hoc præbes, sed qui aurum hic infodit. ac quemadmodum, audi: hoc enim dicunt literæ, α, ἀνελόμυνοι. β, βασιλευς. δ, δέλιω. ο, ὄν. ι, ἄρει. θ, πηγευρόν. χ, χρυσίον. At Xanthus, Venias, inquit, in domū, vt & thesaurum diuidamus, & tu libertatē accipias. Profectis ergo, Xanthus timens AEsopi loquacitatē, in carcerem ipsum iussit iniici. Cum abduceretur AEsopus, sic inquit, Huiusmodi, inquit, sunt promissa philosophorū? non solū enim non accipio meam libertatē, sed & in carcerē iubes iniici me. Xanthus igitur iussit ipsum solui, & ait ei, Nimirum recte inquis, vt parta libertate vehementior sis cōtra me accusator. Tū AEsopus

Id est, acceptū eūtes diuidite quem inuenistis thesaurum aureum.

dixit, Quodcunque potes mihi facere, fac malum: omnino vel inuitus liberabis me. Ea vero tempestate huiusmodi res Sami obtigit. Cū publice festum celebraretur, repente aquila deuolans, & publicum rapiens anulum, in serui sinum demisit. Itaque Samii perterriti, cum ob hoc prodigium incidissent in multum mœrorem, in vnum coacti, cœperunt rogare Xanthum, quod primus ciuium esset, & philosophus, vt sibi iudiciū prodigii manifestaret. At ille omnino ambigens, tempus petiit. Profectus igitur domum, tristis erat admodū, & solitudinibus immerfus, vt qui nihil iudicare posset. Æsopus vero, mœrore Xanthi cognito, adiens ait, Qua causa, ô here, sic perseueras tristari? Mihi committe, vale dicto mœrori. Cras in forum profectus dic Samiis, Ego neq; prodigia soluere didici, nec augurari: sed puer mihi est multarum rerum peritus, ipse vobis quæsitū soluet. Et si ipse consecutus fuero solutionem, here, tu gloriam reportabis, tali vtēs seruo. sin minus fuero consecutus, mihi soli erit dedecus. Persuasus igitur Xanthus, postero die in theatrum profectus, & astans in medio, iuxta monita Æsopi concionatus est iis, qui cōuenerant. Illi vero statim rogabant Æsopum acciri. Qui cum venisset, starétque in medio, Samii facie ipsius cōsiderata, deridentes clamabāt, Hæc facies prodigium soluet? ex

deformi hoc quid vnquā boni audiemus? Ita ridere cœperūt. At AEsopus extenta manu silentio petito, inquit, Viri Samii, quid faciem meam cauillamini? non faciē, sed animū respicere oportet. sæpe enim in turpi forma bonū animum natura imposuit. An vos exteriorem testarum formam consyderatis, ac non potius interiorē vini gustū? Hæc ab AEsopo cum audissent omnes, dixerūt, AEsope siquid potes, dic ciuitati. Ille igitur audacter ait, Viri Samii, quoniam fortuna, quæ contentionis studiosa est, gloriæ certamen proposuit domino & seruo, si seruus inferior videatur domino, verberibus cæsus abibit. sin autē præstātor, nihilo minus & sic verberibus lacerabitur. Si vos per meam libertatem, loquendi mihi fiduciam indulseritis, ego nunc vobis intrepide quæsitum narrabo. Tunc populus vno ore clamabat ad Xanthum, Libertate dona AEsopū, obtempera Samiis, largire libertatem eius ciuitati. At Xantho non annuente, Prætor ait, Xanthe si tibi non placet auscultare populo, ego hac hora AEsopū libertate donabo, & tunc tibi æqualis fuerit. Tunc igitur Xanthus necessario libertatem reddidit: & præco clamauit, Xanthus philosophus liberū Samiis largitur AEsopū. atque interim finem sermo AEsopi accepit, dicentis Xantho, Vel inuitus me libertate donabis. AEsopus itaque libertatem consecutus, stans

C.iii.

in medio, ait, Viri Samii, aquila, vt scitis, regina auium est. Quoniam autem Imperatorium anulum hæc raptū demisit in serui sinum, hoc significare vult, quendam ex iis, qui nūc sunt, regem, velle vestram libertatem in seruitutem redigere, atque sancitas leges irritas facere. His auditis Samii mœrore repleti sunt. Sed non multo post tempore & literæ à Crœso Lydorum rege venerunt ad Samios, iubentes eis vt in posterū tributa sibi penderent: sin minus obtemperassent, vt ad pugnam se pararent. Consultabant igitur vniuersi. Timuerūt enim subditi fieri Crœso, cōducibile tamen esse & Æsopum consulere. Et ille consultus, ait, Cum principes vestri sententiam dixerint de tributo dando obtemperandum esse regi: consilium iam minime, sed narrationem vobis afferam. & scietis quid conducat. Fortuna duas vias ostendit in vita: alteram libertatis, cuius principium accessu difficile, sed finis planus: alteram seruitutis, cuius principium facile, & accessibile, finis autem laboriosus. His auditis, Samii exclamauerunt, Nos cum simus liberi, serui esse gratis nolumus, & oratorem infecta pace remiserunt. His ergo cognitis, Crœsus decreuit bellum in Samios mouere. Sed legatus retulit, Non poteris Samios debellare quandiu est apud eos Æsopus, & consilia suggerit. Potes autem magis, ait, ô rex, legatis mis-

sis petere ab ipsis AEsopum, pollicitus eis & gratias alias relaturum, & remissionem iussorū tributorum. tunc fortè poteris eos superare. Croesus his persuasus, legato misso dedi sibi petebat AEsopum. Samii autem hunc tradere decreuerunt. Quo cognito, AEsopus in media concione stetit, ac inquit, Viri Samii, & ego permulti facio ad regis pedes proficisci: volo autem vobis fabulam dicere. Quo tempore animalia inter se loquebantur, lupi bellum ouibus intulerūt. Vna vero cum ouibus canibus praeliantibus ac lupos arcentibus, lupi, legato misso, dixerunt ouibus si voluerint vivere in pace, & nullum suspicari bellum, vt canes sibi traderent. Ouibus ob stultitiam persuasis, & canibus traditis, lupi & canes dilacerarunt, & oues facillime ceciderunt. Samii igitur fabulae sensu cognito, decreuerūt apud se detinere AEsopū. Ille vero non tulit, sed cū legato vnā soluit, & ad Croesum se contulit. Profectis autem ipsis in Lydiā, rex antè se stātem AEsopū videns, indignatus est, dicens, Vide qualis hominū impedito mihi ad tantam insulam subigendam fuit. Tum AEsopus, Maxime rex, non vi, neq; necessitate coactus ad te veni, sed sponte adsum. sustine autem me parumper audire. Vir quidam cū locustas caperet, occideretq; coepit & cicadam. cū & illam vellet occidere, inquit cicada, O homo, ne me frustra oc-

De lupis &
ouibus.

De homine
& cicada.

C.iiii.

cidas: ego enim neque spicam lædo, neque alia
 in re quapiã iniuria te afficio: motu verò, quæ
 in me sunt membranularũ, suauiter canto, de-
 lectans viatores. præter igitur vocẽ, in me am-
 plius nihil inuenies. Ille his auditis, permisit
 abire. Et ego itaque, ô rex, tuos pedes attingo,
 ne me sine causa occidas, nõ enim possum in-
 iuria quẽquam afficere, sed in vili corpore ge-
 nero sum loquor sermonẽ. Rex autem miratus
 simul & miseratus ipsum, ait, Æsope, nõ ego
 tibi largior vitam, sed fatũ, ergo quod vis, pete,
 & accipies. Et ille, Rogo te, ô rex, reconciliare
 Samiis. Cũque rex dixisset, Recõciliatus fũ:
 procidens ille in terram, gratias ei agebat. Et
 post hæc suas conscripsit fabulas, quas in hunc
 vsq; diem extantes apud regem reliquit. Ac-
 ceptis autem ab ipso literis ad Samios, quòd
 Æsopi gratia eis reconciliatus fuerit, atque
 muneribus multis, nauigauit in Samũ. Samii
 igitur hunc videntes, & coronas ei intulerunt,
 choreasque eius gratia constituerũt. Ille autem
 & regis literas legit, & ostẽdit quòd sibi dona-
 tam à populo libertatem, libertate rursus re-
 muneratus fuerit. Post hæc verò ab insula
 decedens, circuibat orbem, vbique cum philo-
 sophis disputando. Profectus & in Babylonẽ,
 & suam ipsius doctrinam demonstrando ma-
 gnus apud regem Lycerum euasit. Illis enim
 temporibus reges inuicem pacem habentes,

Quãdo cõ-
 scripserit
 Æsopus fa-
 bulas.

atque delectationis gratia quæstiones vicissim sophisticas scribendo mittebant. quas qui solverent, tributa pacta à mittentibus accipiebant: qui verò non, æqualia præbebant. AEsopus igitur quæ mittebantur problemata Lycero intelligens dissoluebat, & clarum reddebat regem, & ipse Lyceri nomine altera itidem regibus remittebat. quæ cum remanerent insoluta, tributa rex quamplurima exigebat. AEsopus autem cum non genuisset filios, nobilem quendam Ennum nomine adoptavit, atque ut legitimum filiū regi allatum commendavit. Non multo autem post tempore Ennus cū adoptantis cōcubina rem habuit. Hoc sciens AEsopus expulsurus erat domo Ennum. qui in illum ira correptus, epistolamque fictā ab AEsopo, scilicet ad eos qui sophismatis cum Lycero certabant, quòd ipsis paratus esset adhærere magis, quàm Lycero, regi dedit AEsopi signatā anulo. Rex & sigillo credens, atque inexorabili ira percitus, statim Hermippo iubet, ut nulla examinatione facta, tanquam proditorem occideret AEsopū. At Hermippus & amicus fuerat AEsopo, & tunc se amicum ostendit. in sepulchro enim quodam nemine sciente occultavit hominē, & secreto nutriuit. Ennus autem regis iussu omnem AEsopi administrationem suscepit. Quodam post tempore, Nectenaborex Aegyptiorum audiens AEsopum mortuū

esse, mittit Lycero statim epistolá, architectos sibi mittere iubentem, qui turrim ædificet, quæ neque cælum, neque terrá attingat, & aliquem qui semper respondeat ad omnia quæcunque rogauerint. quod si fecisset, tributa exigeret: sin minus, solueret. His lectis Lycerus mœrore affectus est, cum nullus ex amicis posset quæstionē de turri intelligere. Rex vero & columnam sui regni dicebat interiisse AESopum. Hermippus autē dolore regis ob AESopū cognito, adiit regē, & viuere illum renuntiavit, addiditque ipsius causa AESopum nō peremisse, sciēs quòd poeniteret aliquando regē sententiæ. Rege autem vehemēter his lætato, AESopus sordens, ac squalens totus, adductus est. Cūque rex ut eum vidit, illachrymasset, atque ut laureretur, aliāque cura afficeretur, iussisset, AESop⁹ post hoc & de quibus accusatus fuerat, causas confutauit. ob quæ cum rex Ennum esset occisurus, AESopus ei veniam petiit. Post hæc autē rex AEgypti epistolam AESopo dedit legendam. At ille statim solutione cognita quæstionis, risit, ac rescribere iussit. cū hyems præterisset, missum iri & qui turrim essent ædificaturi, & aliquem qui responderet ad rogata. Rex igitur AEgyptios legatos remisit, AESopo autem pristinam administrationem tradidit omnē, debitū ei tradens & Ennum. At AESopus acceptum Ennum nulla in re tristitia affectit, sed

vt filium, rursus receptum inter cætera his admonuit verbis, Fili ante omnia cole deum. Regem honora. Inimicis tuis terribilem teipsum præbe, ne te contemnât. Amicis facilem & cōmunicabilem, quò longe beneuolentiores tibi sint. Item inimicos male habere precare & esse pauperes, ne te possint offendere : at amicos in omnibus bene valere velis. Semper vxori tuæ bene adhære, ne alterius viri periculum facere velit. leue enim mulierum est genus, ac delinitum adulatione minus male cogitat. Velocem ad sermonē ne posside auditum. Linguae continens esto. Bene agentibus ne inuide, sed congratulare. inuidens enim teipsum magis offendes. Domesticorum tuorum satage, vt te non solum vt dominum timeant, sed etiam vt benefactorem venerētur. Ne pudeat discere semper meliora. Mulieri non vnquam credas secreta: nam semper armatur, quomodo tibi dominetur. Quotidie in diem crastinum reconde. melius enim mortuum inimicis relinquere, quàm viuentem amicorum indigere. Salutatio facile, qui tibi occurrunt, sciens & cautulo caudam panem comparare. Bonum esse ne poeniteat. Susurronem virum eiice domo tua. nam quæ à te dicuntur, ac fiunt, aliis communicabit. Fac, quæ te non mœstificent. Contingentibus ne tristare. Neque praua incas vnquam consilia. neque mores malorum

Præcepta
quæ dedit
Æsopus
Enno.

imiteris. His ab AEsopo Ennus admonitus, tū sermone, tum sua cōscientia, vt sagitta quadam percussus animū, paucis post diebus ē vita discessit. AEsopus autem aucupes omnes accersuit, atque aquilarum pullos quatuor vt caperent, iubet. sic itaque captos nutriuit, vt dicitur, ac instruxit (cui rei non magnam fidem adhibemus) vt pueros in sportis ipsis appensis gestando in altum volarent, itaque ita obediētes pueris essent, vt quocūque illi vellent, volarēt, siue in altum, siue in terrā deorsum. præterito vero hyemali tempore, ac vere aridente, cum ad iter omnia parasset AEsopus, & pueros accepisset & aquilas, decessit in Aegyptū, multa imaginatione, & opinione ad stupefactionē illorum hominū vsus. Sed Nectenabo, audito adesse AEsopum, Insidiis circumuentus sum, inquit, amicis, quia intellexeram AEsopū mortuum esse. Postridie autem iussit rex vt omnes magistratus candidis circumdarentur vestibus, ipse ὀπίαν induit, & coronam, ac gemmatam κίτριν. Cūque sedens in alto folio, AEsopū introduci iussisset, Cui me assimilas, ingrediēti inquit, AEsope, & eos qui mecum sunt? Et ille, Te quidem soli verno: qui vero te circumstant, maturis aristis. Et rex admiratus ipsum, & donis eum profecutus est. Postero autem die rursus rex candidissimā togam indutus, amicis purpureas iussis accipere, ingrediētē AEsopū

iterum rogauit. Et AEsopus, Te, inquit, comparo soli : hos autem qui stant circū, radiis solaribus. Et Nectenabo, Puto nihil esse Lycerū prae meo regno. Et AEsopus subridens, Ne facile de illo sic loquere, ô rex. nam genti vestrae vestrum regnum collatum, instar solis lucet. ac si Lycero cōparetur, nihil aberit quin splendor hic, tenebrae appareant. Et Nectenabo appositā verborū responsione stupefactus, Attulisti nobis, ait, qui turrim ædificēt? Et ille, Parati sunt, si modo ostendas locum. Postea egressus extra urbem rex in planitiem, ostendit dimensum locum. Adductis igitur AEsopus ad ostensos loci angulos quatuor, quatuor aquilis vnā cum pueris per sacculos appensis, ac puerorum manibus datis fabrorum instrumentis, iussit euolare. illi vero sublimes, Date nobis, clamabant, lapides, date calcem, date ligna, & alia, quæ ad ædificationem apta sunt. Sed Nectenabo visis pueris ab aquilis in altū sublatis, ait, Vnde mihi volucres homines? Et AEsopus, Sed Lycerus habet. tu autem homo cū sis, vis cū æquo diis rege cōtendere? Et Nectenabo, AEsope victus sum: percontabor autē te, tu responde. Et ait, Sunt mihi foeminæ hic equæ, quæ cū audiuerint eos, qui in Babylone sunt, equos hinnientes, statim concipiūt. Si tibi ad hoc est doctrina, ostende. Et AEsopus, Respondebo tibi cras, ô rex. Profectus vero, vbi hospitabatur,

felem iubet pueris comprehendi, & captum publice circūduci verberando. AEgyptii autem illud animal colentes, cum sic ipsum male tractari viderent, concurrerunt, & felem e manibus verberantium eripuerunt, ac rem celeriter renuntiarunt regi. Qui vocato AESopo, Nesciebas, inquit, AESope, tāquam deum à nobis coli felem? quare igitur hoc fecisti? At ille, Lycerum regem iniuria affecit, ô rex, præterita nocte hic felis. Gallum enim eius occidit pugnam & generosum, præterea & horas ei noctis nuntiantem. Cui rex, Non pudet te mentiri AESope? Quonam modo vna nocte felis ab AEgypto iuit in Babylonem? Tum ille subridendo inquit, Et quo modo, ô rex, Babylone equis hinnientibus, hic equæ foeminæ cōcipiunt? Rex autem his auditis, prudentiā AESopi foelicem esse dixit. Posthæc autem cum adciussset ex Heliopoli viros quæstionum sophistarum peritos, atque de AESopo cum eis disputasset, inuitavit vnā cum AESopo ad conuiuium. Discumbētibus igitur ipsis, quidam Heliopolita inquit AESopo, Missus sum à Deo meo quæstionem quādam rogaturus te, vt ipsam solueris. Cui AESopus, Metiris. Deo enim ab homine nihil opus est discere, tu autem nō solum teipsum accusas, sed & Deum tuum. Alius rursus ait, Est templum ingens, & in eo columna, duodecim vrbes continens, quarum

ſingulæ triginta trabibus fulciuntur, quas circuncurrunt duæ mulieres. Tum AËſopus ait, Hanc quæſtionem apud nos ſoluent & pueri. Templum enim eſt hic mūdus. Columna, annus. Vrbes, menſes. Et trabes, horum dies. Dies autem & nox, duæ mulieres, quæ viciffim ſibi ſuccedūt. Poſtridie conuocatis amicis omnibus, Neſtenabo inquit, Propter AËſopū hunc debemus tributa regi Lycero. At ex iis vnus ait, Iubebimus ei quæſtiones dicere nobis ex iis, quæ neque ſcimus, neque audiuiſus. Et ille, Cras hac de re vobis reſpondebo. Decedens igitur, & compoſito ſcripto in quo continebatur, Neſtenabo conſitens mille talenta Lycero debere, mane reuerſus regi ſcriptum reddidit. Regis autem amici prius quàm aperiretur ſcriptum, omnes dixerunt, Et ſcimus hoc, & audiuiſus, & vere ſcimus. Et AËſopus, Habeo vobis gratiam reſtitutionis cauſa. At Neſtenabo confeſſione debiti lecta ait, Me nihil Lycero debente, omnes vos teſtificabimini? Illi mutati dixerūt, Neque ſcimus, neque audiuiſus. Et AËſopus, Si hæc ita ſe habent, ſolutum eſt quæſitū. Ad hæc Neſtenabo, Fœlix eſt Lycerus talē in regno ſuo doctrinā habens. Ergo pacta tributa tradidit AËſopo, atq; in pace remiſit. At AËſopus in Babylonē proſectus, narrauit Lycero acta in AËgypto omnia, & tributa reddidit. Lycerus autem iuſſit ſtatuam auream

AESopo erigi. Non multo autē post tempore, AESopus in Græciam decreuit nauigare. cōpositionēque cū rege facta, discessit, iuratus ei prius, proculdubio rediturū se in Babylonē, atque illuc reliquū vitæ victurū. Peragratis autē Græcis vrbibus, & sua doctrina patefacta, peruenit & Delphos. verū Delphi differentē quidem audiuerunt libenter, sed honore & obseruantia affecerūt nulla. Is autē ad eos excipiens ait, Viri Delphi, succurrit mihi ligno vos cōparare, quod in mari fertur. illud etenim procul vidētes, dū fluctibus agitur, magni pretii esse existimamus: postquam autem proxime aduenit, vilissimū apparet. Et ego itaque cū procul essem ab vrbe vestra, vt eos, qui existimatione digni sunt, vōs admirabar. nunc autem ad vos profectus, omnibus, vt ita dixerim, inueni inutiliores. sic deceptus sum. Hæc cū audiuiſſent Delphi, & timerēt ne aliquo modo AESop⁹ ad alias vrbes accedens, male de se diceret, decreuerūt dolo hominem occidere. Auream igitur phialā ex eo, quod apud se erat, sacello Apollinis accipientes, clam in AESopi absconderunt stratis. Cū AESopus vero ignoraret, quæ ab ipsis dolo facta fuerāt, egressus ibat in Phocidē. At Delphi aggressi, & detinentes ipsum, percontabantur vt sacrilegū. Illo autē negante aliquid fecisse eiusmodi, illi vi stratis euolutis, auream inuenerunt phialam, quam etiā acceptam om-

nibus ciuibus ostenderunt non cum paruo tumultu. Igitur AEsopus cognitis illorū insidiis rogauit eos vt solueretur. Hi autem nō solum non soluerunt, sed vt sacrilegū in carcerē quoque iniecerūt, morte ei⁹ suffragiis decreta. AEsopus autem cū nulla astutia à mala hac fortuna liberari posset, seipsū in carcere lugebat sedens. Ex familiaribus autē ipsius quidā, Damas nomine, ad ipsum ingressus, & videns eum sic lamentari, causam rei rogauit. Ille ait, Mulier quædā cū recenter suū virum sepeliuisset, quotidie profecta ad tumulū, plorabat. Arans autem quidam nō procul à sepulchro, amore captus est mulieris, & derelictis bobus, iuit & ipse ad tumulum, ac sedens vnā cū muliere plorabat. Cū illa rogaret curnam & ipse sic lugeret, Quoniā & ego, inquit, decentē mulierem sepeliui, & posteaquā plorauero, mœstitia leuor. Illa autē, Et mihi idipsum similiter accidit. Et ille, Si igitur in eadē incidimus mala, curnam inuicem nō coniungimur? ego etenim amabo te, vt illam: & tu me rursus vt tuum virum. His persuasit mulieri, & conuenerūt. Interim autē fur profectus, & bones soluens, abegit. Ille autem reuersus, non inuentis bobus, & plangere & lugere vehementer instituit. Profecta est & mulier: & lamentantem inueniens inquit, Iterū ploras? Cui ille, Nunc, ait, vere ploro, & ego itaque multis euitatis periculis, nūc vere fleo,

D.i.

Mus & rana.

solutionem mali necunde inueniens. Post hæc
 affuerunt & Delphi, & extractum ipsum è car-
 cere trahebant in præcipitium. Ille autem eis
 dicebat, Quando colloquebatur animalia bru-
 ta, mus ranæ amicus factus, ad cœnā eam inui-
 tavit, & adducta in penarium diuitis, vbi mul-
 ta edulia erāt, Comede, inquit, amica rana. Post
 epulationem & rana murem in suam inuitavit
 cœnationē. Sed ne defatigare, inquit, natando,
 filo tenui tuum pedē meo alligabo. Atque hoc
 facto saltavit in paludem. Ea autem vrinata in
 profundum, mus suffocabatur, & moriens ait,
 Ego quidem per te morior, sed me vindicabit
 maior. Supernatante igitur mortuo mure in
 palude, deuolans aquila, hūc arripuit, vnā cum
 eo etiam appensam ranam: sicque ambos de-
 uorauit. Et ego igitur, qui vi per vos morior,
 habebo vltorē. Babylon enim & Græcia om-
 nis meam à vobis exigent mortem. Delphi ta-
 men ne sic quidem pepercerunt AESopo. Ille
 autem in Apollinis confugit sacellum, sed ii &
 illinc extraxerunt irati, & in præcipitium rur-
 sus traxerunt, AESopus cum abduceretur, di-
 cebat, Audite me Delphi. Lepus aquila insectā
 te in lustrum scarabei cōfugit, rogans vt ab eo
 seruaretur. Scarabeus autem rogabat aquilam,
 ne occideret supplicē, obtestans ipsam per ma-
 ximum Iouem, saltem ne despiceret paruita-
 tem suā. Illa verò irata, ala percutiens scarabeū,

Lepus &
aquila.

leporem raptum depasta est. Scarabeus autem cum aquila volauit, ut nidum eius disceret, ac iam profectus oua ei⁹ deuoluta dirupit. Illa cum graue existimaret, si quis hoc ausus fuisset, & in altiore loco secundo nidificasset, & illic rursus scarabeus iisdem hanc affecit. Aquila autem inops consilii poenitus, ascendit ad Iouem, (in eius enim tutela esse dicitur) & in ipsius genibus tertiam foeturam ouorum posuit, Deo ipsa commendans, & supplicans ut custodiret. At scarabeus estercore pilula facta, ascendit, & in sinum Iouis eam demisit. Iuppiter assurgens ut simum excuteret, & oua abiectis oblitus, quae & contriuit deiecit. Sed cum didicisset a scarabeo, quod hanc fecisset ut aquilam uisceretur (non enim scarabeum tantum illa affecit iniuria, sed & in Iouem ipsum impia fuit) aquilae reuersae ait, scarabeum esse qui affecit moerore, & certe iure affecisse. Noles igitur aquilarum genus deficere, consulit scarabeo, ut aquilae recociliaretur. Cum hic non paruisset, ille in aliud tempus transposuit aquilarum partum, cum non appareant scarabei. Et vos igitur o viri Delphi, ne despiciat hunc deum ad quem profugi: etsi paruum sortitus est delubrum: neque enim impios negliget. Delphi vero hanc parum curantes, recta ad mortem iterum ducebant. AEsopos nulla re a se dicta videns eos flecti, rursus ait, Viri crudeles, & interfectores audite. Agricola quidam in agro consenuit:

De agrico-
la sene,

D.ii.

cū nunquam ingressus esset in urbē, precabatur domesticos ut eam videret. At illi iūctis asellis, atque in currū eo imposito, solum iusserunt agere. Eūti autem procella & turbine aerē occupatibus, & tenebris factis, aselli à via aberrantes, in quoddam præcipitiū deduxerunt senem. At ille iam præcipitandus, O Iuppiter, ait, qua in re te iniuria affeci, quòd sic inique occidior, præsertim cum neque ab equis generosis, neque à mulis honis, sed ab asellis vilissimis? Et ego itaque eodē modo nūc tristior, quoniam non ab honoratis viris, & elegantibus: verū ab inutilibus, & pessimis interficior. Iamque præcipitandus, eiusmodi dixit rursus fabulam, Vir quidam suā deamans filiam, rus misit vxorē: solam autē filiam receptam violauit. Illa autē, Pater, ait, scelesti facis: optarē tamen à multis potius viris dedecore hoc affici, quā à te, qui genuisti. Hoc nunc & in vos, ô iniqui Delphi dico, quòd eligerē in Scyllam, & Charybdim potius incidere, ac in Africæ Syrtēs, quā per vos iniuste, atque indigne mori. execrōr igitur vestram patriā, & deos testor, me præter omnē iustitiam interire, qui me vlciscentur exaudium. Præcipitem igitur ipsum dederunt de rupe, & mortuus est. Non multo post autem pestilentia laborantes, oraculum acceperunt expiandam esse AESopi mortem. Cui, quòd & conscii sibi essent, iniuste eū interfecisse, etiam

cippum erexerūt. Sed primates Græciæ, ac doctissimi quique, cum & ipsi, quæ in AEsopum facta fuissent intellexissent, Delphos profecti sunt, & cum illis habita inquisitione, victores & ipsi AEsopi mortis fuerunt.

ÆSOPÌ VITAE FINIS.

Ex Aphthonii

SOPHISTAE EXERCITAMENTIS.

Fabula profecta quidē est à poetis, sed & rhetoribus communis facta est admonendi gratia. Est autem fabula, sermo fictus, imagine quadā repræsentans veritatē. Atque alia Sybaritica, alia Cilix, alia Cypria dicitur, accepto ab inventoribus nomine. Verū quoniā AEsopus egregie præter cæteros conscripsit fabulas, euicit vt potius AEsopia diceretur. Ea vero est triplex, Rationalis, Moralis, Mista. Rationalis, in qua aliquid ab homine geri confingitur. Moralis, quæ eorū imitatur mores, quæ sūt rationis expertia. Mista vero, quæ rationale irrationalēque cōplectitur. Eam autē admonitionē, cuius causa fabulam cōstitueris, Ante fabulationē præpositā: postpositam vero, Affabulationē dices.

D.iii.

Fabula qua formicarū & cicadarū exemplo hortantur iuuenes ad laborē.

Cicadæ.
Formicæ. Cicadæ olim æstate assiduis cantibus indulgebant, formicæ vero hyemis memores, laboribus fructibusque colligendis operam dabāt. Verū cum hyems aduenisset, formicæ iis, quæ collegerant, pascebantur. Cicadas autem delectatio illa, & canendi voluptas, eò indigentia, miseriaque perduxit, vt esurirent omnes, & fame conficerentur. Sic iuuentus laborum fugitans, male habet in senectute.

Ex Philostrati imaginibus fabulæ.

Fabulæ se ad AEsopum, sua in eum beneuolentia conferunt, quòd satagat sui. Fabula quippe, & Homero, & Hesiodo, necnon & Archilochō in Lycamben curæ fuit. Sed ab AEsopo humana omnia ad fabellas redacta sūt, sermone brutis non temere impertito. nam & cupiditatem tollit, & libidinem insectatur & fraudem. Atque hæc ei leo quispiā agit & vulpes, & per Iouem equus, nec testudo muta, ex quibus pueri discunt, quæ in vita gerantur. Habentur igitur in pretio fabulæ propter AEsopum. Accedunt ad ianuam docti huius, vittis eum deuincturæ, coronæque oleagina coronaturæ. hic, vt puto, fabulam aliquam textit. risus enim faciei, & oculi in terram defixi id præ se ferūt. Pictorē, fabularū curas remissiore animo in-

digere, non latuit. Philosophatur autem & fabularum corpora. Bruta enim cum hominibus conferens, cœtum circa AEsopum statuit ex illius scena cōfictum. Chori dux vulpes depicta est. Vitur enim ea AEsopus ministra argumentorum plurium, ceu Daou Comœdia.

EX HERMOGENIS EXERCITAMENTIS, Prisciano interprete.

Fabula, est oratio ficta, verisimili dispositione, imaginem exhibens veritatis. Ideo autem hanc primam tradere pueris solent oratores, quia animos eorum adhuc molles, ad meliores facile vias rite instituunt. Vñ sunt ea tamen vetustissimi quoque authores, vt Hesiodus, Archilochus, Horatius. Hesiodus quidem lusciniæ, Archilochus autem vulpis, Horatius muris. Nominantur autem ab inuentoribus fabularum, aliæ AEsopiæ, aliæ Cypriæ, aliæ Libycæ, aliæ Sybariticæ: omnes autem communiter AEsopiæ dicuntur, quoniam in conuentibus frequenter solebat AEsopus fabulis vti. Mendacem quidem esse volunt fabulā, sed ad vitam vtilem, necnō & verisimilem. Est autem versimilis, si res, quæ subiectis accidunt personis, apte reddantur, vtpote de pulchritudine aliquis certat, paulo supponatur hic. Oportet alicui astutiam tribuere, vulpecula est subiiciēda. Imitatores aliquos hominum volumus ostend.

D.iiii.

dere, hic simiis est locus. Oportet igitur modo breuiter, modo latius eas disserere. Quomodo autem hoc fiet? Si nunc narratione simplici proferatur, nunc etiam sermo inductis fingatur personis. Exempli causa, Simiæ conuenerunt, & consilium habuerunt de vrbe condenda: & quia placuit illis, paratæ erant incipere ædificationem, sed vetus simia prohibuit ab incepto, eas docens, quòd facile capiantur, si intra muros concludantur. sic breuiter dices. Si velis producere, sic, Simiæ conuenerunt, & cōfiliabantur de vrbe condenda: quarum vna in medium veniens concionata est, quia oportet ipsas quoque ciuitatem habere. Videtis enim, aiebat, quòd ciuitatem habendo fœlices homines sint, domos etiam habent singuli, & in cōcionem vniuersi, & in theatrum ascendentes delectant animos spectationibus, & auditionibus variis. Et sic proferes orationem in orando, dicens, quòd & plebiscitum scriptum est, & finges etiam orationem veteris simiæ. Expositio autem fabularum vult circuitionibus carere, & iucundior esse. Sed oratio, qua utilitas fabulæ retegitur, quam ἱμνύθιον vocant, quòd nos affabulationem possumus dicere à quibusdā prima, à plerisque rationabilius postrema ponitur. Sciendum vero, quòd etiam oratores inter exempla solent fabulis uti.

L A V R E N T I V S V A L L E N S I S

in signi Arnoldo Fouelledæ S.

Promiseram nuper, me tibi coturnices, quas ipse venatus essem, missurum. Eas capere (vt homo venâdi insuetus) cum non possem, ad venationem meam, id est ad literas me conuerti. Vt forte ad manus venit libellus Græcus ex præda nauali, tres & triginta AEsopi fabulas continens: has omnes bidui labore venatus sum. Mitto igitur ad te, siue fabellas, siue mauis coturnices, quibus oblectare te possis ac ludere. Etenim si Octavianû, Marcûque Antonium, orbis terrarum principes, ludo coturnicum delectatos accepimus: profecto tu vir literarum amâtissimus, literato hoc genere ludendi delectaberis. Et siquis Octauiano aut Antonio pugnacem aliquâ harum auîû dono dedisset, iucundam illis rem, gratamque fecisset. ego quoque tibi iucundus, gratûsq; ero, qui plures triginta eius generis aues dono mitto, pugnaces, victrices, & (si forte hoc te magis iuuat) etiâ pingues. Oblectant enim hæ fabellæ, & alunt: nec minus fructus habent quàm floris. Sed ne donum suum laudare insolentis sit, finem faciam. Tu si coturnices veras, quàm has fabellas, malis, rescribe. Mittam nanque non modo coturnices, sed etiam perdices.

Ex vrbe Caieta; Calendis Maij.

I 4 ß.

Vulpes & caper.

I

Vulpes & caper sitibundi in puteum quendam descenderunt: in quo cum perbibissent, circumspectanti capro redditum, vulpes ait, Bonno animo esto caper: excogitaui nanque quo pacto vterque reduces simus. Siquidem tu eriges te rectum, primoribus pedibus ad parietem admotis, cornuâque, adducto ad pectus mēto, reclinabis: & ego per terga cornuâq; tua transiliens, & extra puteum euadens, te istinc postea

educam. Cuius consilio fidem habente capro, atque, ut illa dicebat, obtemperanti, ipsa a puteo resiliit: ac deinde præ gaudio in margine putei gestiebat exultabatque, nihil de hirco curæ habens. Cæterum cum ab hirco ut fidifraga incusaretur, respondit, Enimuero hirce, si tantum tibi esset sensus in mente, quantum est sentiarum in mento: non potius in puteum descendisses, quam de reditu exploratum habuisses.

Adfabulatio.

Hæc fabula innuit, virum prudētem debere finem explorare, antequam ad rem agendam veniat.

Vulpes & pardus.

2

Vulpes & pardus de pulchritudine altercabantur. & pardo suam pellem versicolore extollente, vulpes suam cum non posset præponere, inquit, At quanto ego speciosior, quæ non corpus, sed animum versicolorem sortita sum.

Adfabulatio.

Hæc fabula innuit, pulchritudinē animi antecellere pulchritudinem corporis.

Cata & Venus.

3

Cata quædam delictum erat cuiusdam formosi adolescentis. Hanc ille, ut in foeminam mutaret, Venerem comprecatus est. Dea miserta cupiditatis adulescētuli, conuertit bestiam in speciosam puellam. Cuius forma inardescens adulescentulus, adducit illam secum domum. Quibus confidentibus in cubiculo, Ve-

nus volens periculum facere, nūquid illa cum corpore mutasset & mores : murem in mediū dimisit . At illa , eorum qui aderant , & cubi- culi nuptialis immemor, è cubili consurgens, murem insequabatur, illum comedere cupiēs. tum Dea indignata, eam iterum in suam resti- tuit naturam.

Adfabulatio.

Hæc fabula innuit, scelestos homines, etiam si conditio- nem statūmq̃ue mutēt, tamen mores nequaquam mutare.

Agricola & filii eius.

4

Agricola filios suos videns quotidie gla- diantes, neque in gratiam reducere potis esset: iussit fasciculum virgarum sibi afferri (ade- rant autem illic filii sedentes) quæ cum allatæ essent, colligauit omnes in vnum fasciculum: iussitque singulos eorum fasciculum capere atque confringere. Illis vero confringere non valentibus, soluens postea fasciculum, tradidit singulas virgas eis frangendas. atque illis sta- tim frangentibus, intulit , Ita quidem & vos, ô filioli mei , si vnanimis inuicem perstiteri- tis , inexpugnabiles vos hostibus inuictosque præbebitis: sin minus, vestra ipsa æmulatio at- que seditio, opportunam vos prædam inimi- cis faciet.

Adfabulatio.

Hæc fabula innuit, æque res humanas capere, vel à con- cordia incrementum, vel à discordia iacturam.

Mulier & gallina.

5

Mulier quædam vidua habebat gallinā quotidie singula ova ponentem. Sperans autē mulier, pro singulis bina ova positurā, si plus escarum tribuisset, oppipare educebat. Gallina vero pinguior effecta, ne vnum quidem ovum amplius facere poterat.

Adfabulatio.

Hæc fabula innuit, quod homines per luxū rerum & copiam marcescentes, ab instituta industria retardantur.

Duo adulescentes.

6

Duo adulescentes obsonium à coquo communiter mercati sunt. Cæterum cum coquus quibusdam negotiis domesticis intenderet, vacaretque: alter adulescētum partem obsonii in alterius manus immisit. Conuertente autem se coquo, & partem carnis, quæ aberat, requirente: qui carnem sustulerat, iurat se non habere; qui vero habebat, se non sustulisse. Quibus coquus (intellecta adulescentum argutia) inquit, Et si me latet fur, tamen eū quem iurastis, non latebit.

Adfabulatio.

Hæc fabula innuit, quod siquid homines celamus, Deū tamen nequaquam celare poterimus, qui solus omnia prospicit, & omnia videt.

Duo amici & vrsus.

7

Duobus amicis vnā iter facientibus fit vrsus obuiam. quorum vnus perterritus, in arborem scandens, latuit. alter vero, cum se imparem vr

so fore, & si pugnare vellet superatum iri, intel ligeret: procidens, simulabat se mortuum esse. Vrsus vero adueniens, & aures, & occiput eius olfaciebat, illo qui stratus iacebat, vsquequa; continente respirationem. Ita mortuum esse credens vrsus abiit. aiunt enim non sœuire in cadauera. Mox alter, qui inter frondes arboris latuerat, descendens interrogat amicum, quidnam ad aurem vrsus esset secum loquutus. Cui amicus inquit, Admonuit me ne posthac cū huiusmodi amicis iter faciam.

Adfabulatio.

Fabula hæc innuit, deuitandos esse amicos, qui periculo so in tempore ab auxilio præstando reuocant pedem.

Arundo & olea.

8

Disceptabant aliquando arundo & olea, de constantia & fortitudine, & de firmitate. Et olea quidē arundini probra ingerebat, vt fragili, & ad omnem ventū vacillanti. Arundo autem obticebat, non longum tempus spectans. Nam cum ventus vehemens ingruisset, arundo reflexebatur, agitabaturque. Olea vero cum violentiæ ventorum reluctari vellet, confracta est.

Adfabulatio.

Hæcfabula innuit, eos qui fortioribus ad tempus cedūt, potiores esseijs qui non cedunt.

Tubicen.

9

Erat tubicen quidam, qui in militia signum caneret. is interceptus ab hostibus, ad eos qui circumsiscebant, proclamabat, Nolite me viri

innocentem, innocuum, infontemque perimere : nullum enim vnquam occidi . quippe nihil aliud quàm hanc buccinam habeo . Ad quem illi vicissim cum clamore responderūt, Tu vero hoc ipso magis trucidaberis , quòd cum ipse dimicare nequeas , cæteros potes ad certamen impellere.

Adfabulatio.

Hæc fabula innuit, quòd præter cæteros peccât, qui malos & importunos principes persuadent ad inique agendum.

Canis & lanius.

10

Canis quidam insiliit in macellum, lanio in aliqua re occupato, & arrepto pecoris corde fugiebat. Ad quem lanius còuersus, fugientemque aspiciens, inquit, O canis, abi: vbicunque fueris, te observabo. non enim mihi cor sustulisti, sed cor dedisti.

Adfabulatio.

Hæc fabula innuit, iacturam frequenter esse hominibus doctrinam.

Ægrotus & medicus.

11

Ægrotus quidam à medico interrogatus, quonammodo se habuisset: præter modum, respondit, in sudorem se esse resolutū. Cui medicus, Istud, inquit, bonum est. Altero autem die interrogatus quomodo se haberet, respondit, Algoribus correptus, diu vexatus sum. Et istud (inquit medicus) bonum est. Tertio cū ab eodem interrogaretur, respondit, Profluuiio corporis debilitatus sum. Istud, inquit, etiā bonū

est. Postea autē à familiari interrogatus, Quo-
modo habes ô amice? Respōdit, Ego etiam at-
que etiam bene habeo, sed morior.

Adfabulatio.

Hæc fabula innuit coarguendos assentatores.

Asinus & lupus.

12

Asinus calcato ligni aculeo claudicabat: con-
spectoque lupo, ait, O lupe, en præ cruciату
mорий, futurus esca, aut tua, aut vulturum, aut
coruorum. Vnum modo munus abs te flagi-
to: Educ prius ex pede aculeum, vt moriar sal-
tem sine cruciату. Tunc lupo summis denti-
bus aculeum mordicus deprehendens, eduxit.
Asinus vero doloris oblitus, ferratos calces in
faciem lupi impexit: fractisque illius fronte, na-
ribus & dentibus, aufugit: lupo seipsum accu-
sante, ac merito sibi id euenisse dicente: quod
qui didicerat esse lanus iumentorum, nunc
eorum volebat esse chirurgus.

Adfabulatio.

Hæc fabula innuit, quod qui sua artificia deserunt, trās-
ferentes se ad aliena, ipsis non apta, & in derisum veniunt,
& in discrimen.

Pastor & mare.

13

Pastor in loco maritimo gregem pascebat.
qui cum videret mare tranquillum, incessit cu-
pido nauigationem faciēdi. Itaque venunda-
tis ouibus, emptisque palmarū sarcinis, nauig-
abat. Orta autem vehementi tempestate, & na-
ui mergi periclitante, omne pondus navis in

mare eiecit, vixque euasit exonerata naui. Paucis post diebus, veniente quodā & tranquillitate maris admirante (erat enim sane tranquillum) respōdens inquit, Palmas iterū vult quantum intelligo: ideoque immotum sese ostendit.

Adfabulatio.

Hæc fabula innuit, eruditiores fieri homines damno atque periculo.

Vulpes & leo.

14

Vulpes nullum antea leonem auspicata, cū illi aliquando obuissset, ita conspectum eius expauit, vt parū abfuerit quin extingueretur. Quod cum postea iterū accidisset, ad conspectum quidem leonis exterrita est, sed non ita vt prius. Tertio cum leonem eundem vidisset in ciuitate: non modo non exterrita, sed confidenter adiens, secum colloquuta est & confabulata.

Adfabulatio.

Hæc fabula innuit, quod consuetudo & cōuersatio facit vt quæ maxime horribilia & formidolosa sunt, neque horrida, neque formidolosa videantur.

Galli & perdix.

15

Gallos quidam domi suæ cum haberet, mercatus est perdicem, eamque in societatem galloꝝ dedit, vnā cum illis saginandam. Eam vero statim galli, pro se quisque mordebant, abigebantque. Perdix autem apud se afflictabatur, existimans ideo talia sibi à gallis inferri, quod suum ab illorum genere alienū esset. Vbi

vero nō multo post aspexit & illos inter se pugnantes, mutuōque percutiētes, recreata à mœrore & tristitia, inquit, Equidem vero posthac ego non afflictor amplius, videns eos etiam inter se dimicantes.

Adfabulatio.

Hæc fabula innuit, virum prudentem debere æquo animo ferre cōtumelias ab alienigenis illatas, quos videt ne à domesticorum quidem iniurijs abstinere.

Vulpes & caput quoddam.

16

Vulpes aliquando in domum citharœdi ingressa, dum omnia instrumenta musica, omnē supellectilē scrutaretur, reperit è marmore caput lupinum, scienter fabreque factum. Quod cum in manus sumpisset, inquit, O caput cū magno sensu factū, nullum sensum obtinens.

Adfabulatio.

Hæc fabula ad eos spectat, qui corporis dignitatem habent, animi industriam non habent.

Carbonarius & fullo.

17

Carbonarius conducta in domo habitans, inuitavit fullonem, qui eò loci proxime venisset, ut eisdem in ædibus vnà habitaret. Ad quē fullo, O homo, non est mihi istud factu cōducibile: vereor enim ne quicquid ipse cādefacere, id omne tu carbonaria aspergine fuscas.

Adfabulatio.

Fabula hæc innuit, nullum cum flagitiosis habendum esse commercium.

Homo gloriosus.

18

Vir quidam aliquandiu peregrinatus, cum
E.i.

iterum domū rediisset: cum multa ardua in diuersis regionibus à se viriliter gesta iactabūds prædicabat, tum verò illud maxime q̃ Rhodi omnes certamine saliendo superasset: eiusq; rei Rhodios, qui affuerūt, testes esse. Ad quē vnus assistentiū respondens, inquit, O homo si verum est quod loqueris, quid tibi opus est testibus? Ecce Rhodius, ecce hic certamen saliedi.

Adfabulatio.

Hæc fabula innuit, quòd vbi rerum testimonia adsunt, nihil opus est verbis.

Homo & Apollo.

19

Quidam facinorosus Delphos se contulit, Apollinem tentaturus, habénsque passerulum sub pallio, quem pugno tenebat. Accedénsque ad Tripodas, interrogabat deum, dicēs, Quod habeo in dextera, viuítne, an mortuū est? Pro-laturus passerulum viuum, si mortuū respondisset, rursus prolaturus mortuū, si viuum respondisset. Occidisset enim statim sub pallio prius quàm proferret. At deus subdolam callidatē hominis intelligens, dixit, O consultor, vtrum mauis facere (penes te nanq; arbitrium est) facito. & siue viuum, siue mortuum quod in manu habes, proferto.

Adfabulatio.

Hæc fabula innuit, mentem diuinam nihil neque latere, neque fallere.

Piscator & cinaris.

20

Piscator quidā demissis in mare retibus, de-

tulit cinaridē pusilli corporis, quæ piscatorem sic obsecrabat, Noli me impræsentiarū capere pusillam & minutam, sine abire & crescere: vt postea iam adulta, cōmodo cum maiore potiaris. Cui piscator, Ego vero amens sum, si lucrū quod inter manus habeo (licet exiguum) prætermittam spe futuri boni quantūlibet magni.

Adfabulatio.

Hæc fabula innuit, stolidum esse, qui propter spem maioris, rem & præsentem & certam (licet paruam) non amplectitur.

Afinus & equus.

21

Vir quidam habebat equum & asinum. In itinere faciendo, inquit asinus equo, Si me saluum vis, leua me parte oneris mei. Equo illius verbis non obsequente, asinus sub onere cadens, moritur. Tunc dominus iumentorum, omnes quas portabat asinus sarcinas, simulq; coriū, quod à mortuo exuerat, equo imponit. Quo onere depressus equus, cum clamore inquit, Væ mihi iumentorū infœlicissimo, quid mihi misero euenit? Nam recusans partē, nunc totum onus porto, & illius corium.

Adfabulatio.

Hæc fabula innuit, maiores debere in laboribus participes esse minoribus, vt vtrique incolumes sint.

Homo & satyrus.

22

Vir quidam cum satyro amicitiam inierat. Qui cum edendi gratia sederent, exorta cæli tempestate, vir manus ad os admouens, anhe-

E.ii.

litu refocillabat. Quod intuens satyrus, interrogat quā ob rem id faceret. Ille inquit, Calore oris argentes manus refocillo. Paulóq; post, calidiore edulio allato, cum vir iterum manus ad os admouens, calorē cibi tenui inspiratione refrigeravit, interrogat satyrus quā ob rem & illud faciat. Respondente autem viro, vt refrigeraret eduliū: Atque ego, inquit satyrus, tecū posthac amicitiam non exercebo, qui ex vno ore & calidum promis & frigidum. Vale.

Adfabulatio.

Fábula innuit, deuitandam eius amicitiam esse, cuius anceps vita est, & non simplex sermo.

Agricola & canes.

23

Agricola quidā hyberno sydere in agro prehensus, deficientibus cibariis primum interfectis singulis ouibus, illarū carnibus vescabatur, mox & caprarum, postremo operariis bobus interemptis alebatur. Quod canes dum animaduertissent, inter se colloquuti sunt, dicentes, At nos hinc faciamus fugam. Si enim operariis bobus dominus non pepercit, nec nobis quidem parcat.

Adfabulatio.

Hæc fabula innuit, fugiendos cauendosque, qui à familiaribus manus non abstinēt.

Admorsus à cane.

24

Admorsus quidam à cane circumibat singulos, corrogans curationem: nactusque quendam est, qui cognita mali qualitate, inquit, Si

tu quidem ô homo conualescere vis , crustam panis madefactam in sanguine vulneris , porrige cani qui te momordit comedendam. Cui ille derideter inquit, Ego, me hercle, si illud fecero, dignus sum qui ab omnibus huius vrbis canibus præmordear.

Adfabulatio.

Hæc fabula innuit, improbos homines cum maxime beneficia acceperint, tum maxime ad maleficia animari.

Thynnus & delphinus. 25

Thynnus cum delphinū insequentem præcipiti cursu fugeret, & iam capiendus esset, in anfractū quendam se intorsit. Delphinus quoque ad alterū similem impetu ipso allisus est. Ad quem thynnus respiciens, cūmq; expirantem videns, inquit , iam mihi mors non erit molesta videnti eū, qui mihi causa mortis est, mecum morientem.

Adfabulatio.

Hæc fabula innuit, æquo animo ferre homines calamitates, cū eos, per quos in calamitate sūt, calamitosos aspiciūt.

Auceps. 26

Auceps quidam sumptis aucupatoriis retibus, ad venandum processit, visoque palumbo in cacumine arboris sedente , compositas artificiose arundines cum retibus ad auem clanculum admouebat, sperans illam se venari posse. Quod cum agit in altū intuens, iacentem viperam pedibus pressit : quæ exasperata dolore hominē momordit . At ille iam deficiens, Me

E.iii.

miserum, inquit, qui cum alterum venari volo, ipse ab altero captus pereo.

Adfabulatio.

Hæc fabula innuit, quòd æmulī alios arte sua nitentes decipere, sæpe in laqueos, quos tendunt, incidunt.

Castor.

27

Castor præter cæteros quadrupedes, in aqua durare fertur, suâque genitalia ad artem medicam sane vtilia esse. Hic ubi videt se ab indagentibus hominibus captum iri (nouit enim quâ ob rem indagetur) ipse sibi genitalia præcidit, atque insequentes proiciens, hoc modo incolumis euadit.

Adfabulatio.

Hæc fabula innuit, huius exemplo prudentes debere pro adipiscenda salute, nullam rationem habere fortunarum.

Vaticinator.

28

Vaticinator quidam in foro sedens sermone nabatur, cum sibi quidam denuntiat fores domus eius effractas esse, omniâque direpta quæ in domo fuissent. Ad quem nuntiū vaticinator gemens, properansq;, cursu se domum recipiebat. Quem currentem intuens quidam, O tu, inquit, qui aliena negotia te diuinaturum promittis, certe tua ipse non diuinasti.

Adfabulatio.

Fabula hæc ad eos spectat, qui res suas non recte administrantes, alienis, quæ nihil ad eos pertinent, providere, ac consulere conantur.

Auceps & merula.

29

Auceps tetēderat volucrib⁹ retia, quod emi-

nus intuens merula, percontabatur hominem quid negotii ageret. Ille respondit, se condere urbem. Abiitque longius, & sese abdidit. Merula vero verbis illius fidem habens, accedens ad escam iuxta retia positam, capta est. Accurrenteque aucupe, inquit, O homo, si tu quidem talem condis urbem, haud multos inuenies incolas.

Adfabulatio.

Hæc fabula innuit, eo maxime modo rem priuatam & publicam destrui, cum præsides sæuitiam exercent.

Viator & Iuppiter.

30

Viator longum ingressurus iter: siquid inuenisset, eius dimidium Ioui se oblaturum promissit. Inuento autem in ipso itinere vase palmarum & amygdalorum pleno, comedit omnes palmas & amygdalasque: sed harum nucleos, illorum putamina, ad aram quandam obtulit, inquit, Iuppiter, habes quod tibi voueram, quod enim inueni, eius & interiora & exteriora tibi offero.

Adfabulatio.

Fabula hæc innuit, avarum hominem cupiditate pecuniarum, etiam dijs moliri fallacias.

Filius & mater.

31

Puer quidam in schola, condiscipuli furatus tabellam alphabetariam, attulit matri suæ. A qua non castigatus, quotidie magis furabatur. Procedente autem tempore, maiora coepit furari. Tandem à magistratu deprehensus, ducebatur ad supplicium. Matre verò sequente ac vocifera-

E.iiii.

rante, rogauit satellites, vt paulisper cum ea ad aurē loqui permetterēt. Quibus annuentibus, & matre festinabunda, aurem ad os filii admo- uente: ille auriculam maternā dentibus amor- sam euulsit. Et cum mater cæterique increpa- rent non modo vt furem, sed etiā vt in paren- tem suam impium, inquit, Hæc mihi vt per- derer, extitit causa. si enim me ob tabellam al- phabetariam castigasset, nequaquā ad vltorio- ra progressus, ad supplicium nunc ducerer.

Adfabulatio.

Fabula hæc innuit, quod qui inter initia peccandi non coercentur, ad grauiora flagitia euadunt.

Filius & pater.

32

Filium quidam senior habebat generosi ani- mi, & venaticorum canum amatorem. Hunc per quietem viderat à leone trucidari. Territus igitur ne forte somnium hoc aliquando seque- retur euentus, extruxit domum quandam po- litissimam, laquearibus ac fenestris amœnissi- mam: illucque inducens filium, illucustos in- hærebat. Depinxerat enim in ea domo ad ob- lectionem filii omne genus animalium in qui- bus & leonem. Adolefcens hæc inspiciens, cō- amplius molestiæ cōtrahebat. Quadam autem vice leoni propius stans, inquit, O truculentis- sima fera, te propter, & propter inane somnium patris, in hac domo asservor, velut in carcere. Quid igitur faciam? Et hæc dicēs, manum pa-

rieti incussit, oculum leoni eruere volens, & in clauo, qui illic latebat, offendit. qua ex percussione manus emarcuit: succreuitque sanies, ac febris subsecuta est: breui adolescens est mortuus. Ita leo adolescentem occidit, nihil adiuuante patris sophismate.

Adfabulatio.

Hæc fabula innuit, quæ ventura sunt, deuitare posse neminem.

Caluus quidam.

33

Caluus quidam mētitos crines gerens, dum equo vehabatur, ecce turbinis ventus illos de capite sustulit. risus statim magni præsentibus excitantur. Et ille mutuo risu ad eos inquit, Quid mirum si crines, qui nō erant mei, à me recesserint? Illi quoque recesserūt qui mecum fuerant nati.

Adfabulatio.

Hæc fabula innuit, non debere nos mœrere ob amissas opes. Quod enim nascentes à natura non accepimus, non potest nobiscum perpetuo permanere.

ALIAE ITEM ALIQVOT AESOPI
fabulæ è Græco in Latinum versæ, incerto interprete.

Impossibilia promittens.

34

Vir pauper ægrotans, & male affectus, cum à medicis desperatus esset, deos rogabat, pollicens si sanitatem sibi rursus restituisent, centū boues ipsis oblatorū esse in sacrificium. Vxorē autem eius audiente, Et vbi tibi hæc, si con-

ualueris? Ille ait, Putas enim surgere me hinc,
vt dei hæc à me repetant?

Adfabulatio.

Fabula significat, multos facile polliceri, quæ re comprobare non sperent.

Ranæ.

35

Ranæ duæ in palude pascebantur, æstate autem siccata palude, illa derelicta, quærebant aliam. cæterum profundū inuenerunt puteū: quo viso, altera alteri inquit, Descendamus heus tu in hunc puteum. Illa respondens ait, Si igitur & hic aqua aruerit, quomodo ascendemus?

Adfabulatio.

Fabula declarat, non oportere inconsiderate res aggredi.

Canis & gallus.

36

Canis & gallus inita societate iter faciebant. Vespera autem superueniente, gallus conscensa arbore, dormiebat: at canis ad radicem arboris excauatæ. Cum gallus, vt assolet, noctu cantasset, vulpes, vt audiuit, accurrit: & stans inferius, vt ad se descenderet, rogabat, quòd cupe-ret commēdabile adeò cantu animal completi. Cum autem is dixisset, vt ianitorem prius excitaret ad radicem dormientē, vt cum ille aperuisset, descenderet: & illa quærente vt ipsum vocaret, canis statim profiliēs eam dilacerauit.

Adfabulatio.

Fabula significat, prudentes homines inimicos insultantes ad fortiores astu mittere.

Leo & vrsus.

37

Leo & vrsus simul magnum nacti hinnulū,

de eo pugnabant. grauiter igitur à seipsis affecti, vt ex multa pugna etiā vertigine corripentur, defatigati iacebant. Vulpes autē circūcirca eundo, vbi prostratos eos vidit, & hinnulum in medio iacentē, hunc per vtrosque percurrēdo, rapuit, fugiēsq̃ abiuit. at illi videbant quidē ipsam: sed quia nō poterāt surgere, Nos miseros, dicebāt, quia vulpi laborauimus.

Adfabulatio.

Fabula significat, alijs laborantibus, alios lucrari.

Vespertilio & rubus, & mergus. 38

Vespertilio, & rubus, & mergus inita societate mercatoriam decreuerūt vitam agere. Itaque vespertilio argentum mutuata proiecit in medium: rubus vestem secum accepit: mergus tertius, æs: & nauigauerunt. Tempestate autem vehemēti oborta, & naui euerſa, omnibus perditis, ipsi in terram euaserunt. Ex illo igitur mergus litoribus semper assidet, num quodpiā æs eiiciat mare. Vespertilio verò creditores timens, interdū non apparet, noctū ad pabulum exit. Rubus prætereuntium vesti inhaeret, sicubi suam cognoscat quærendo.

Adfabulatio.

Fabula significat, in ea, quibus incumbimus, in posterum recidere.

Pauo & monedula.

39

Auibz creaturis regē, pauo orabat vt se ob pulchritudinem eligerent. Eligentibus autem cum omnibus, monedula suscepto sermone,

ait, Sed si te regnante aquila nos persequi aggressa fuerit, quomodo nobis opem feres?

Adfabulatio.

Fabula significat, principes non modo propter pulchritudinem, sed & fortitudinem & prudentiam eligi oportere.

Singularis animal & vulpes. 40

Singularis agrestis super quadam sidens arbore, dentes acuebat. Vulpe rogante causam, quare nulla præposita necessitate dentes acueret, ait, Non abs re hoc facio : nam si me periculum inuaserit, nequaquam me tunc acuedis dentibus occupatum esse oportebit, sed potius paratis vti.

Adfabulatio.

Fabula significat, aduersus periculum præparatum esse oportere.

Cassita. 41

Cassita laqueo capta plorans dicebat, Hei mihi miseræ, & infœlici volucris: non aurum surripui cuiusquam, nō argentum, nō aliud quicquam pretiosum. Granum autem tritici paruum, mortis mihi causa fuit.

Adfabulatio.

Fabula in eos, qui ob vile lucrū, magnū subeunt periculū.

Hinnulus. 42

Hinnulus aliquando ceruo ait, Pater, tu & maior, & celerior canibus, & cornua præterea ingētia gestas ad vindictam, curnam igitur sic eos times? Et ille ridens ait, Vera quidem hæc inquis fili : vnum verò scio, quòd cum canis latratū audiuerò, statim ad fugam nescio quo

modo efferor.

Adfabulatio.

Fabula significat, natura timidos nulla admonitione fortificari.

Auarus.

43

Auarus quidam cum omnia bona sua vendidisset, & aureā glebam fecisset, in loco quodam infodit, vñā defosso illic & animo suo, & mente: atque quotidie eundo, ipsam videbat. Id autem ex operis quidam obseruando cognouit, & refossam glebam abstulit. Post hæc & ille profectus, & vacuum locum vidēs, lugere cœpit, & capillos euellere. Hunc cum quidā vidisset sic plorantem, & causam audiuiisset, Ne sic, ait, ô tu, tristare: neque enim habens aurum, habebas. lapidem igitur pro auro acceptum recode, & puta tibi aurum esse, eundem enim tibi vsum præstabit. nam, vt video, neque cum aurum erat, vtebare.

Adfabulatio.

Fabula significat, nihil esse possessionē, nisi vsus adfuerit.

Anseres & grues.

44

Anseres & grues in eodem prato pascebantur. Venatoribus autē visis, grues, quòd essent leues, statim euolauerūt. anseres verò, ob onus corporum cum mansissent, capti fuerunt.

Adfabulatio.

Fabula significat, & in expugnatione vrbis, inopes facile fugere, diuites autem seruire captos.

Testudo & aquila.

45

Testudo orabat aquilam, vt se volare doce-

ret. Ea autem admonente procul hoc à natura ipsius esse, ille magis precibus instabat. Accipit igitur ipsam vnguibus, & in altum sustulit, inde demisit. hæc autem in petras cecidit, & contrita est.

Adfabulatio.

Fabula significat, multos, quia in contentionibus prudentiores non audiuerint, seipsos læsisse.

Cerua.

46

Cerua altero obcæcata oculo, in litore pascebatur, sanum oculum ad terram propter venatores habens: alterum vero ad mare, unde nihil suspicabatur. Præternauigantes autem quidam, & hoc coniectantes, ipsam sagittarunt. hæc autem seipsam lugebat, quòd unde timuerat, nihil passa foret: quod non putabat malum allaturum, ab eo proditam.

Adfabulatio.

Fabula significat, sæpe, quæ nobis noxia videntur, vtilia fieri: quæ verò vtilia, noxia.

Cerua & leo.

47

Cerua venatores fugiens, in speluncam ingressa est. In leonem autem ibi cum incidisset, ab eo comprehensa est. Moriens autem dicebat, Hei mihi, homines fugiens, in ferarum immitissimum incidi.

Adfabulatio.

Fabula significat, multos homines dum parua fugiunt pericula, in magna incurrere.

Cerua & vitis.

48

Cerua venatores fugiēs, sub vite delituit. Cū

præteriiſſent autem parumper illi, cerua prorsus iam latere arbitrata, vitis folia pasci incepit. Illis vero agitat, venatores conuerſi & quod erat verum arbitrati, animal aliquod sub foliis occultari, sagittis confecerunt ceruam. Hæc autem moriens talia dicebat, Iusta passa sum: nō enim offendere oportebat, quæ me seruarat.

Adfabulatio.

Fabula significat, qui iniuria benefactores afficiunt, a deo puniri.

Asinus & leo.

49

Cum asino gallus aliquādo pascebatur. Leone autem aggresso asinum, gallus exclamauit, & leo (aiunt enim hunc galli vocem time-
re) fugit. At asinus ratus propter se fugere, aggressus est statim leonem. Vt verò procul huc persecutus est, quò non amplius galli perueniebat vox, conuersus leo deuorauit. Hic verò moriens clamabat, Me miserum & demetem: ex pugnacibus enim non natus parentibus, cuius gratia in aciem irrui?

Adfabulatio.

Fabula significat, plerosque homines inimicos, qui se de industria humiliarunt, aggredi, atque ita ab illis occidi.

Olitor & canis.

50

Olitoris canis in puteum decedit: olitor autem ipsum illinc extracturus, descendit & ipse in puteum. ratus autem canis accessisse vt se inferius magis obrueret, conuersus olitorem momordit. Hic autem cum dolore reuersus,

Iusta, inquit, patior: nam cur vnque sui interfectorem seruare studui?

Adfabulatio.

Fabula in iniustos & ingratos.

Sus & canis.

§1

Sus & canis mutuo conuitiabantur. Et sus iurabat per Venerē, proculdubio dentibus discissurum canem. Canis vero ad hæc dissimulanter dixit, Bene per Venerem nobis iuras: significas enim ab ipsa vehementer amari, quæ impuras tuas carnes degustantem, nullo pacto in sacellum admittit. Et sus, Propter hoc igitur magis præ se fert Dea amare me: nam occidentem, aut alio quouis modo lædentem omnino auersatur. tu tamē male oles & viua, & mortua,

Adfabulatio.

Fabula significat, prudentes oratores, quæ ab inimicis obijciuntur, artificiose in laudem conuertere.

Sus & canis.

§2

Sus & canis de fœcunditate certabant. Dixit autem canis fœcundam esse maxime pedestrium omnium. Et sus occurrens, ad hæc inquit, Sed cum hæc dicis, scito & cæcos tuos te catulos parere.

Adfabulatio.

Fabula significat, non in celeritate res, sed in perfectione iudicari.

Serpens & cancer.

§3

Serpens vnā cum cancro viuebat, inita cum eo societate. Itaque cancer simplex moribus, vt & ille astutiam mutaret, admonebat. hic autem

minime obediebat. Cum obseruasset igitur cacer ipsum dormientē, & pro viribus compressisset, occidit. At serpente post mortem extenso, ille ait, Sic oportebat antehac rectū & simplicem esse: neque enim hāc poenam dedisses.

Adfabulatio.

Fabula significat, qui cum dolo amicos adeunt, ipsos offendi potius.

Pastor & lupo.

54

Pastor nuper natū lupi catulū reperit, ac sustulit, vnāque cū canibus nutriuit. At cum adoleuisset, siquādo lupo ouem rapuisset, cum canibus & ipse persequabatur. Cum canes verò aliquando non possent assequi lupū, atque ideo reuerterentur, ille sequebatur: vt cū ipsum assecutus esset, particeps foret venationis vt lupo. inde redibat. Sin autē lupo extra non rapuisset ouem, ipse clam occidens, vnā cū canibus cōdebat: donec pastor cum coniectasset & intellexisset rē, de arbore ipsum suspēdit, & occidit.

Adfabulatio.

Fabula significat, naturā prauā bonos mores nō nutrire.

Leo & lupo.

55

Leo cum consenuisset, ægrotabat iacens in antro. Accesserāt autem visitaturā regem, præter vulpem, cætera animalia. Lupo⁹ igitur capta occasione accusabat apud leonem vulpē, quasi nihili facientem suum omnium dominum, & propterea neque ad visitationem profectam. Interim affuit & vulpes, & vltima audiuit lupo

F.i.

verba. Leo igitur contra eā infremuit. Sed defensionis tēpore petito, Et quis, inquit, eorum, qui conuenerunt, tantum profuit, quantū ego, quæ in omnem partem circuiui, & medicamentum pro te à medico quæsiui, & didici? Cum autem leo statim, vt medicamentū diceret, imperasset, illa inquit, Si lupo viuentē excoriato, ipsius calidam pellem indueris. Et lupo tacēte, vulpes ridens ait, Sic nō oportet dominum ad maleuolentiam mouere, sed ad beneuolētiam.

Adfabulatio.

Fabula significat, eū qui quotidie machinatur, in seipsum laqueum vertere.

Mulier.

56

Mulier quædam virum ebrium habebat. ipsum autem à morbo liberatura, tale quid commenta est. Aggrauatum enim ipsum ab ebrietate cum obseruasset, & mortui instar insensatum, in humeros eleuatum, in sepulchretū allatum deposuit & abiuit. Cum vero ipsum iam sobrium esse coniectata est, profecta ianuā pulsauit sepulchreti. Ille autem cum diceret, Quis est, qui pulsat ianuam? vxor respōdit, Mortuis cibaria ferens ego adsum. Et ille, Nō mihi comesse, sed bibere, ô optime, potius affer: tristem enim me reddis, cū cibi, non potus meministi. Hæc autē pectus plangendo, Hei mihi miseræ, inquit: nā neque astu profui. tu enim non solum nō emendatus es, sed peior quoque teipso

cuasisti, in habitum tibi deductus est morbus.

Adfabulatio.

Fabula significat, non oportere in malis actibus immorari. nam & nolentem quandoque hominem consuetudo inuadit.

Cynus.

57

Vir diues anserem simul & cynum nutriebat, non ad eadem tamen: sed alterum cantus, alterum mensæ gratia. Cum autem oporteret anserem pati ea, quorū causa nutriebatur, nox erat, ac discernere tempus non permisit vtrunque. Cynus autem pro anserē abductus, cātat cantum quendam mortis exordium: & cantu significat naturam, mortē verò effugit suauitate canendi.

Adfabulatio.

Fabula significat, sæpe musicen differre mortem.

AEthiops.

58

AEthiopem quidam emit, talem ei colorem inesse ratus negligētia eius, qui prius habuit. ac assumpto in domum, omnes ei adhibuit absterfiones: omnibus lauacris tentaui mundare: & colorem quidem transmutare non potuit, sed morbum dolor parauit.

Adfabulatio.

Fabula significat, manere naturas, vt à principio prouenerunt.

Hirundo & cornix.

59

Hirundo & cornix de pulchritudine contendebant. Respondens autem cornix ei, dixit, Sed tua pulchritudo verno tēpore floret, meū

F.ii.

verò corpus etiam hyeme durat.

Adfabulatio.

Fabula significat durationē corporis, decore meliorem esse.

Butalis.

60

Butalis à fenestra quadā pendebat. Vespertilio autē profecta rogavit causam, quare die sileret, nocte caneret. Cū autem id ea non incassum hoc facere dixisset (nā die canendo olim capta fuerat, & propterea ex illo prudēs euasit) vespertilio ait, Sed non nūc te cauere oportet, cum nulla vtilitas, sed antequam caperis.

Adfabulatio.

Fabula significat, in infortunijs inutile esse poenitentiam.

Cochleæ.

61

Rustici filius assabat cochleas. Cum autem audiret eas stridentes, ait, O pessimæ animantes, domibus vestris incensis vos canitis?

Adfabulatio.

Fabula significat, omne intempestiue factū, vituperabile.

Mulier & ancillæ.

62

Mulier vidua operosa ancillas habens, has solebat noctu excitare ad opera, ad gallorum cantus. His verò assidue defatigatis labore, visum est oportere domesticum occidere gallū, tanquam illum qui noctu excitaret herā. Euenit autem ipsis, hoc facto, ut in grauiora inciderent mala. nam hera ignorans gallorum horam, temporius eas excitabat.

Adfabulatio.

Fabula significat, plerisque hominibus consilia esse malorum causas.

Mulier venefica.

63

Mulier venefica diuinarū irarum propulsiones promittēs, multa facere perseuerabat, & lucrū inde facere. Quidā igitur accusauerunt eā impietatis, & cōuicerunt, & damnatā ducebant ad mortem. Vidēs autē quidam eam duci, ait, Tu, quæ deorū iras auertere promittebas, quomodo neque hominū cōsiliū mutare potuisti?

Adfabulatio.

Fabula significat, multos magna promittentes, ne parua quidem facere posse.

Agricola.

64

Agricola quidam fodiendo aurum reperit: quotidie igitur terram, vt ab ea beneficio affectus, coronabat. Huic autem fortuna adstans inquit, Heus tu, cur terræ mea munera attribuis, quæ ego tibi dedi ditatura te? nā si tēpus immutetur, & in alias manus hoc tuum aurum eat, scio te tunc me fortunam accusaturum.

Adfabulatio.

Fabula significat, oportere benefactorē cognoscere, atque huic gratiam referre.

Viatores duo.

65

Duo quidam vnā iter faciebant, & cum alter securim reperisset, alter, qui nō inuenit, admonerat ipsum, ne diceret inueni, sed inuenimus. Paulo post autem cū aggredierentur ipsos, qui securim perdiderant, qui eam habebat, persequentibus illis, ei qui vnā iter faciebat, dixit, Periiimus. Hic autem ait, Perii, dic: non, perii-

F.iii.

mus. etenim & tūc, cum securim inuenisti, inueni dixisti, non, inuenimus.

Adfabulatio.

Fabula significat, qui nō fuerunt participes foelicitatum, neque in calamitatibus firmos esse amicos.

Ranæ duæ.

66

Duæ ranæ vicinæ sibi erant. pascebantur autem altera in profundo stagno, & procul à via: altera in via parum aquæ habens. Verum, cum quæ in stagno alteram admoneret vt ad se migraret, vt tutiore cibo frueretur, illa nō paruit, dicens firmissima teneri huiusce loci consuetudine, quousque obtigit currum prætereūtem ipsum confringere.

Adfabulatio.

Fabula significat, homines quoque praua aggredientes citius mori, quàm mutentur in melius.

Apiarius.

67

In mellarium ingressus quidā domino absente, fauum abstulit. Hic autem reuersus, vt alucolos vidit inanes, stās quod in his erat, perscrutabatur. Apes autem e pastu redeunt, vt deprehenderūt ipsum, aculeis percutiebāt, pessimæque tractabant. Hic autē ad eas, O pessimæ animantes, furatum vestros fauos illasum dimisistis, me verò satagentem vestri, percutitis?

Adfabulatio.

Fabula significat, sic homines quosdam ob ignorantiam inimicos non cauere, amicos autē vt insidiatores repellere.

Alcedo.

68

Alcedo auis est solitaria, semper in mari vi-

tam degens. hanc dicitur hominum venationes cauentem, in scopulis maritimis nidificare. Cæterum aliquando paritura, pullos fecit. Egressa autem ea ad pabulum, accidit mare a vehementi concitatum vento, eleuari supra nidum: atque hoc submerso, pullos perdere. hæc verò reuerſa, re cognita, ait, Me miseram, quæ terram vt insidiatricem cauens, ad hoc confuſgi, quod mihi longe est infidius.

Adſabulatio.

Fabula ſignificat, homines etiam quosdã ab inimicis cauendo ignaros, in multo grauiores inimicis amicos incidere.

Piſcator.

69

Piſcator in fluuio quodam piſcabatur. Extenſis autem retibus, & fluxu comprehenſo vtrinque, funi alligato lapide, aquam verberabat, vt piſces fugientes incaute in retia incidere. Cum quidam vero ex iis, qui circa locum habitabant, id facere videret, increpabat, quod fluuium turbaret, & claram aquam nõ ſinceret bibere: & is reſpondit, Sed niſi ſic fluuius perturbetur, me oportebit eſurientem mori.

Adſabulatio.

Fabula ſignificat, ciuitatum etiam rectores tunc maxime operari, cum patrias in ſeditionem indaxerint.

Simius & delphis:

70

Moris: cum eſſet nauigantibus Melitenſes catulos & ſimios adducere in ſolamen nauigationis, quidam habebat ſecũ & ſimium. Cum autẽ perueniſſent ad Sunium Atticæ promon-

F.iii.

torium, tempestatem vehementem fieri contigit. naui autem euerſa, & omnibus natantibus, natabat & ſimius. Delphis quiſpiam ipſum cōſpicatus, & hominem eſſe ratus, digreſſus leuabat, ad terrā perferens. Vt vero in Piræo fuit Athenienſium nāuali, rogauit ſimium, an genere eſſet Athenienſis. Cum autem hic diceret, & claris hīc eſſe parentibus, rogauit an & Piræum ſciret. Ratus autem ſimius de homine eū dicere, ait, & valde amicum eſſe ei, & familiarē. At Delphis tanto mendacio indignatus, ſubmergens ipſum occidit.

Adfabulatio.

Fabula in viros, qui veritatem ignorantes, exiſtimant ſe decipere.

Muſcæ.

71.

In cella quadam melle effuſo, muſcæ aduolantes comedebant: implicitis autē earum pedibus euolare nō poterant. Cum verò ſuffocarentur, dicebant, Miſeræ nos, quia ob modicum cibum perimus.

Adfabulatio.

Fabula ſignificat; multis gulā multorū malorū eſſe cauſā.

Mercurius & ſtatuarius.

72.

Mercurius ſcire volens, quanti apud homines eſſet, iuit in ſtatuarii domum transformatus in hominem: & viſa ſtatua Iouis, rogabat, quanti quis ipſam emere poſſet. Hic autē cum dixiſſet, drachma: riſit. Et quanti Iunonis, ait: Cum dixiſſet, pluris: viſa & ſua ipſius ſtatua, ac opinatus cum nuntius ſit deorum, & lucroſus,

maximā de se apud homines haberi rationem, rogauit de se. Statuarius vero ait, Si hæc eme ris, & hanc additamentum do.

Adfabulatio.

Fabula in virum gloriosum, qui nullius apud alios est pretij.

Mercurius & Tiresias.

73

Mercurius volens Tiresiæ vaticinium an verum esset cognoscere, furatus ipsius boues, ex rure venit ad ipsum in urbē, similis factus homini, & ad ipsum diuertit. Bouem autem amissione renuntiata Tiresiæ, ille assumpto Mercurio exiuit, augurium aliquod de fure consyderaturus. Et huic iubet dicere sibi, quamnam auem viderit. Mercurius autem primum vidisse aquilam a sinistris ad dextram volātem, dixit. Hic non ad se id esse cum dixisset, secūdo cornicem super arbore quadam sedentem vidit, & modo superius aspicientem, modo ad terrā declinatam, vati refert. Et is re cognita ait, Sed hæc cornix iurat & cælum, & terram, si tu velis, meas me recepturum boues.

Adfabulatio.

Hoc sermone vti quispiā poterit aduersus virū furacem.

Canes duo.

74

Habens quidam duos canes, alterum venari docuit, alterum domum seruare. Cæterum si quando venaticus caperet aliquid, qui domū custodiebat, particeps vnā cum eo erat cœnæ. A Egreferente autē venatico, & illi obiiciente,

quòd ipse quotidie laboraret, ille nihil faciens suis nutriretur laboribus, respondens ipse ait, Non me, sed herū reprehēde, qui non labore me docuit, sed labores alienos comesse.

Adfabulatio.

Fabula significat adolescentes qui nihil sciunt, haud esse reprehendendos, cum eos parentes sic educauerint.

Maritus & vxor.

75

Habens quidam vxorem, quæ domesticis omnibus inimica erat, voluit scire an etiam erga paternos domesticos ita afficeretur. Quapropter cum rationabili prætectu ad suum patrem ipsam misit. Paucis vero pòst diebus ea reuerfa, rogauit quomodo aduersus illos habuisset. Hæc vero cum dixisset, Bubulci & pastores me suspectabant: ad eam ait, Sed ô vxor, si eos odisti, qui mane greges agūt, sero autem redeūt: quid sperare oportet in iis, quibuscum tota conuersaris die?

Adfabulatio.

Fabula significat, sic sæpe ex paruis magna, & ex manifestis incerta cognosci.

Hœdus & lupo.

76

Hœdus derelictus à grege, persequēte lupo, conuersus ad eum dixit, O lupe, quoniam credo me tuum cibum futurum, ne iniucūde moriar, cane tibia primum, vt saltem. Lupo autem canente tibia, atque hœdo saltante, canes cum audiuiissent, lupū persecuti sunt. Hic cōuersus, hœdo inquit, Merito hæc mihi fiūt: oportebat

enim me, cocus cum sim, tibicinem nō agere.

Adfabulatio.

Fabula significat, qui ea, quibus natura apti sunt negligunt, quæ vero aliorum sunt, exercere conantur, in infortunia incidere.

Cancer & vulpes.

77

Cancer è mari cum ascēdisset, in loco quodam pascebatur. Vulpes esuriēs vt vidit, accessit, ac eum rapuit. Ille deuorandus ait, Sed ego condigna patior, qui marinus cum sim, terrestris esse volui.

Adfabulatio.

Fabula significat, homines, etiam qui proprijs derelictis exercitijs, ea quæ nihil conueniunt, aggrediuntur, merito infortunatos esse.

Citharædus.

78

Citharædus rudis in domo calce incrustata familiariter, vt solebat, canens, & contrā resonante in se voce, existimabat valde canorus esse. verum elatus super hoc cogitauit & in theatro sese committere oportere. Profectus vero ad se ostendendum, cum male admodum caneret, lapidibus ipsum explosum abegerunt.

Adfabulatio.

Fabula significat, sic ex rhetoribus quosdam, qui in scholis putant esse aliquid cum ad res publicas se conferunt, nullius pretii esse.

Fures & gallus.

79

Fures in domum quādam ingressi, nihil inuenerunt nisi gallū, atque hoc capto, abierunt. Is ab eis occidendus rogabat vt se dimitteret, dicens vtilē esse hominibus noctu eos ad ope-

ra excitando. Hi verò dixerunt, Sed propter hoc te tanto magis occidimus: illos enim excitando, furari nos non finis.

Adfabulatio.

Fabula significat, ea maxime prauis esse aduersa, quæ bonis sunt beneficio.

Cornix & coruus.

80

Cornix coruo inuidens, quod is per auguria hominibus vaticinaretur, ob idque crederetur uti futura prædicens, cōspicata viatores quosdam prætereuntes, iuit super arborem quadam, stansque valde crocitauit. Illis vero ad vocem conuersis, & admiratis, re cognita, quidam inquit, Abeamus heus vos, cornix enim est, quæ crocitauit, & augurium non habet.

Adfabulatio.

Fabula significat eodem modo & homines præstantioribus certantes, præterquam, quod non ad æqua perueniunt, risum quoque debere.

Cornix & canis.

81

Cornix Mineræ sacrificans, canem inuitauit ad epulas. Ille vero ad eam dixit, Quid frustra sacrificia absumis? Dea enim adeo te odit, ut ex peculiaribus quoque tibi auguriis fidem sustulerit. Cui cornix, Ob id magis ei sacrifico, ut reconcilietur mihi.

Adfabulatio.

Fabula significat, plerosque ob lucrum non vereri inimicos beneficiis prosequi.

Coruus & serpens.

82

Coruus cibi indigens, ut serpentem in apri-

eo quodam loco dormientē vidit, hunc deuolando rapuit. Hic cum se vertisset, atq; momordisset ipsum, coruus moriturus dixit, Me miserum, qui tale reperi lucrum, quo etiam perco.

Adfabulatio.

Fabula in virum, qui ob thesaurorum inuentionem de salute perditatur.

Monedula & columba. 83

Monedula in columbario quodam colūbis uisib; bene nutritis, dealbavit sese, iuitque, vt & ipsa eodem cibo impertiretur. Hæc vero donec tacebat, ratæ eam esse columbam, admiserunt. sed cum aliquando oblita vocē emisisset, tunc eius cognita natura, expulerunt percutiendo, eaq; priuata eo cibo, rediit ad monedulas rursum. & illæ ob colorem, cum ipsam non noscent, à suo cibo abegerunt, vt duorum appetēs, neutro potiretur.

Adfabulatio.

Fabula significat oportere & nos nostris contentos esse, cōsyderantes auaritiā, præterquam, quod nihil iuuat, auferre sæpe & quæ adsunt bona.

Monedula. 84

Monedulam cum quis cepisset, & pedē alligasset filo, suo tradidit filio. Hæc non ferendo victum inter homines, vbi parūper libertatem nacta est, fugit, in suūque nidum se contulit. Circūuoluto verò ramis vinculo, euolare haud valens, cum moritura esset, secum loquebatur, Me miseram quæ apud homines non ferendo

seruitutem, incaute mea me vita priuauit.

Adfabulatio.

Fabula significat, nonnunquam quosdam, dum se à mediocribus student periculis liberare, in maiora incidere.

Mercurius & sutor.

85

Iuppiter Mercurio iussit, vt artificib⁹ omnibus mendacii medicamentum misceret. hic co-
trito, & ad mensuram facto, ex æquo singulis miscet. Cum vero solo relicto sutore, multum superesset medicamenti, totum acceptū mortarium ei miscuit. atque hinc cōtigit artifices omnes mentiri, maxime vero omniū sutores.

Adfabulatio.

Fabula in mendaces artifices.

Iuppiter & pudor.

86

Iuppiter formatis hominibus, omnes illis affectus indidit, solum indere pudorem oblitus est. Quapropter non habens vndenā ipsum introduceret, per turbam ingredi eum iussit. Hic vero primum indigne ferens contradicebat: vehementius vero eo instante, ait, Sed ego sane his ingredior pactis, si amor non ingrediatur: sin ingrediatur, ipse exhibo quamprimum. Ex hoc sane euenit, omnia scorta inuerecunda esse.

Adfabulatio.

Fabula significat; captos amore inuerecundos esse.

Iuppiter & testudo.

87

Iuppiter nuptias celebrans, omnia animalia accipiebat. sola vero testudine tardē profecta,

admirans causam tarditatis, rogauit eam quā-
obrem ipsa ad cœnā non accesserat. Cum hæc
dixisset, Domus chara, domus optima: iratus
ipsi, damnauit vt domū baiulans circumferret.

Aðfabulatio.

Fabula significat, plerosque homines eligere parce potius
apud se viuere, quàm apud alios laute.

Lupus & ouis.

88

Lupus à canibus morsus, & male affectus,
abiectus iacebat. Cibi vero indigens, visa oue,
rogabat vt potum ex præterfluente flumine
sibi afferret. Si enim tu mihi, inquit, dederis
potum, ego cibum mihi ipsi inueniam. Illa, re
cognita, ait, Sed si ego potum do tibi, tu & ci-
bo me vtêris.

Aðfabulatio.

Fabula in virum maleficū, per simulationem insidiantē.

Lepores.

89

Lepores olim belligerantes cum aquilis, in-
uocarunt in auxilium vulpes. Hæ autem dixe-
rūt, Vobis auxiliaremur, nisi sciremus qui vos
estis, & cum quibus præliamini.

Aðfabulatio.

Fabula significat, eos, qui cum præstantioribus certant,
suam salutem contemnere.

Formica.

90

Quæ nunc formica, homo olim fuit. hic a-
griculturæ assidue incumbens, non erat pro-
priis laboribus contentus, sed & vicinorū fru-
ctus surripiebat. Iuppiter autem indignatus
huius auaritia, trāsmutauit eum in hoc animal

quæ formica appellatur. Verum cum mutasset formam, non & affectum mutauit: nam vsque nunc arua circuneundo, aliorum labores surripit, & sibi recondit.

Adfabulatio.

Fabula significat, natura prauos, etsi maxime specie transmutauerint, mores non mutare.

Vespertilio & mustela.

91

Vespertilio in terram cum cecidisset, à mustela capta est: & cum occidenda foret, pro salute rogabat. Hac vero dicente, non posse ipsam dimittere, quòd natura volucris omnibus inimica foret, ait, non auem, sed murem esse. & sic dimissa est. Postremo autem cum iterum cecidisset, & ab alia capta mustela, ne voraretur, orabat. Hac autem dicente, cunctis inimicam esse se muribus: hæc non mus, sed vespertilio esse dicebat. & rursus dimissa est. atq; ita euenit bis mutato nomine salutem consecutam fuisse.

Adfabulatio.

Fabula significat, neque nos in eisdem semper esse oportere, considerantes eos, qui ad tempus mutantur, plerunque pericula effugere.

Viatores.

92

Viatores secundum litus quoddam iter facientes, iuerunt in speculam quandam, & illic conspicati sarmēta procul natantia, nauim esse magnam existimarunt: quamobrem expectarunt, tanquam appulsura ea esset. Cum verò à vento lata sarmenta propius foret, non nauim

amplius, sed scapham videre videbantur. Ad-
uectis autem illis, cum sarmenta esse vidissent,
inter se dixerunt, Vt nos igitur frustra, quod
nihil est, expectabamus?

Adfabulatio.

Fabula significat, nonnullos homines, qui ex improviso
terribiles esse videntur, cum periculum feceris, nullius esse
pretij inueniri.

Asinus syluestris.

93

Asinus syluestris, asino viso domestico in lo-
co quodam aprico, profectus ad ipsum, beatū
dicebat & corporis habitudine, & cibi perce-
ptione. Deinde vero cum vidisset eum feren-
tem onera, & agasonem retro sequentem, & ba-
culis ipsum percutientem, ait, Ast ego non am-
plius beatum te existimabo: video enim non
sine magnis malis habere te foelicitatem.

Adfabulatio.

Fabula significat, non esse æmulanda lucra, in quibus in-
sunt pericula & miseriæ.

Asini.

94

Asini olim propterea quòd assidue onera fer-
rent, & fatigarentur, legatos miserunt ad Iouē,
solutionem laborum petentes. Hic autem ostē-
dere ipsis volens id non fieri, ait tūc eos libera-
tum iri laboribus, cū mingendo fluuium fece-
rint. Ac illi eum verū dicere existimātes, ex il-
lo & nunc vsque, vbi aliorum vrinam viderint
asinorum, illic & ipsi circumstando mingunt.

Adfabulatio.

Fabula significat, unicuique quod fatale est, incurabile esse.

G.i.

Asinus & vulpes.

95

Asinus indutus pelle leonis, vagabatur reliqua bruta perterrendo. Cæterū visa vulpe, tentauit & hanc perterrefacere. Hæc autem (casu enim ipsius vocē audiuerat) ad ipsum ait, Cōpertum habeto, quòd & ego timuisssem, nisi rudentem audiuissem.

Adfabulatio.

Fabula significat, nonnullos indoctos, qui ijs, qui extrā sunt, aliquid esse videntur, ex sua linguacitate redargui.

Asinus & ranæ.

96

Asinus ligna ferens, pertransibat paludem quandam. Lapsus autem, vt decidit, nec surgere posset, lamentabatur, ac suspirabat. Ranæ autem quæ erant in palude auditis suspiriis, Heus tu, dixerunt, & quid faceres, si tanto hic tempore, quanto nos, fuisses, cum quia paululum cecidisti, sic lamente- ris?

Adfabulatio.

Hoc sermone vti quispiam poterit in virum segnem, qui ob minimos quosque labores tristatur, cum ipse maioribus facile resistat.

Asinus & coruus.

97

Asinus vlcerato dorso in prato quodam pascabatur. Coruo autem insidendo sibi, & vlcus percutiendo, asinus rudebat ac saltabat. sed agasone procul stante, ac ridente, lupus præteriens ipsum vidit, & dixit, Miseri nos quos si tantum viderit, persequitur: huic au-

tem & arridet.

Adfabulatio.

Fabula significat, maleficos homines, si tantum apparent, dignosci.

Asinus & vulpes.

98

Asinus & vulpes inita inter se societate, exierunt ad venationem. Leo vero cum occurrisset ipsis, vulpes imminens periculum vidēs, profecta ad leonem, tradituram ei asinum pollicita est, si sibi impunitatem promiserit. Qui cum dimissurum eam dixisset, illa adducto asino, in casses quosdam ut incideret, fecit. Sed leo videns illum fugere minime posse, primam vulpem comprehendit: deinde, sic ad asinum versus est.

Adfabulatio.

Fabula significat, eos, qui socijs insidiatur, sepe & seipsos neficios perdere.

Gallina & hirundo.

99

Gallina serpētis ouis inuentis diligenter calesfacta excudit. Hirundo autem cum eam vidisset, ait, O demēs, qui hęc nutris: quæ cum excreuerint, a te prima iniuriam auspicabuntur.

Adfabulatio.

Fabula significat, implacabilem esse prauitatem, licet afficiatur maximis beneficijs.

Camelus.

100

Cum primū visa est camelus, homines perterriti, & magnitudinē admirati fugiebāt. Vbi vero procedente tempore cognouerunt ipsius mansuetudinem, cōfisi sunt eo vsq; ut ad eam

G.ii.

accederēt . At intellecto paulo post beluæ non inesse bilem , eò contemptius iere, vt & fræna ei imponerent, & pueris agendam traderent.

Adfabulatio.

Fabula significat, terribiles res consuetudine contemptibiles fieri.

Serpens.

101

Serpens à multis hominibus pessundatus Iouem postulauit . Iuppiter autem ad eum dixit, Si qui prior conculcauit , pupugisses : nequaquam id facere secundus aggressus fuisset.

Adfabulatio.

Fabula significat, eos, qui prius inuadentibus resistunt, alijs formidolosos fieri.

Columba.

102

Columba siti correpta , vt vidit quodam in loco poculum aquæ depictum: verum rata, atque multo elata impetu, inscia in tabulam offendit , vsque adeò vt & pennis ipsius perfractis in terram decideret , atque à quodam occurrentium caperetur.

Adfabulatio.

Fabula significat, nonnullos homines ob vehemētes alacritates inconsulto res aggrediētes, iniicere sese in perniciem.

Columba & cornix.

103

Columba in columbario quodam nutrita, foecūditate superbiebat. Cornix vero ea audita, ait, Heus tu, desine hac re gloriari: nam, quò plures paris, eò plus mœroris accumulas.

Adfabulatio.

Fabula significat ex famulis quoque, eos esse infelicissimos, qui in seruitute multos filios faciunt.

Diuitis filia & mater.

104

Diues duas habens filias, altera mortua, præficus conduxit. Cum vero altera filia dixisset, Vt nos miseræ, ipsæ, ad quas pertinet luctus, lamentari nescimus: hæ vero non necessaria sic vehementer plangunt. mater ait, Ne mirare filia si hæ ita lementantur, nam nummorum gratia id agunt.

Adfabulatio.

Fabula significat, nonnullos homines ob auaritiam non vereri alienis calamitatibus quæstum facere.

Pastor & oues.

105

Pastor actis in quercetū quoddam ouibus, strata sub quercu veste, ascendit, & fructum decutiebat. Oves vero inter edendum glandes, nesciæ, & vestes vnā deuorarunt. At cum pastor descendisset, vt quod erat actum, vidit, O pessima, ait, animalia, vos cæteris vellera ac vestes præbetis: à me vero, qui vos nutrio, & vestem surripitis.

Adfabulatio.

Fabula significat, plerumque homines ob dementiā eos, qui nihil attinēt, beneficio afficere, in domesticos mala operari.

Bubulcus.

106

Bubulcus armentum taurorum pascens, amisit vitulum, lustrando omnem solitudinem, indagando morā traxit. Vbi inuenire nihil potuit, precatus est Iouem, si furem, qui vitulum cepit, ostēderit hœdum in sacrificium oblaturum. Cæterū proficiscens in quercetū quod-

G.iii.

dam, inuenit à leone deuorari vitulum. Trepidus igitur, & perterrefactus, eleuatis manibus suis in cælum, ait, O domine Iuppiter, promiseram tibi hœdum me daturum esse, si furem inuenirem: nunc taurum tibi recipio sacrificaturum, si huius manus effugero.

Adfabulatio.

Fabula in homines infortunatos, qui dum quidpiâ amiserint, precantur ut inueniant: cum inuenerint, quærunt effugere.

Aquila.

107

Super petra aquila sedebat, leporem captura: hanc autē quidam percussit sagitta, quæ intra ipsam ingressa est. Sed crena cum pennis ante oculos stabat: quam cum uidisset, Et hoc mihi altera mœstitia, quod propriis pennis intereā.

Adfabulatio.

Fabula significat, durum esse, cum quis à suis periculum patiatur.

Vermis & vulpes.

108

Qui sub coeno celabatur vermis, super terrā egressus dicebat omnibus animalibus, Medicus sum medicaminū doctus, qualis est Pæon deorū medicus. Et quomodo, ait vulpes, alios curans, te ipsum claudum non curas?

Adfabulatio.

Fabula significat, nisi præsto experientia fuerit, omne verbum inane esse.

Gallina auripara.

109

Gallinam quis habens oua aurea parientem, ratus intra ipsam auri massam inesse, occisam

aliis gallinis similē reperit. Hic multū sperans
inuenire diuitiarū, & exiguis illis priuatus est.

Adfabulatio.

Fabula significat, oportere contentum esse præsentibus,
& fugere inexplēbitatem.

Lupus & vetula.

IIIO

Lupus esuriens circuibat quærendo cibum.
Profectus autem ad locum quendam, audiuit
lugentem puerulum, eique dicentem anum,
Desine plorare : sin minus, hac hora tradam te
lupo. Ratus igitur lupus serio loqui aniculam,
expectabat ad multam horam . Sed cum ad-
uenisset vespera , audit rursus anum blandien-
tem puerulo, ac dicentem, Si venerit lupus, in-
terficiemus eum, fili . His auditis, lupus eun-
do dicebat, In hoc tugurio aliud dicunt, aliud
faciunt.

Adfabulatio.

Fabula in homines, quorum facta verbis non respondent.

Culex & leo.

IIII

Culex ad leonem accedēs, ait, Neque timeo
te, neque fortior me es. minus mihi adesse vi-
riū ideo existimas, quòd laceres vnguibus, &
dentibus mordeas ? hoc & foemina cum viro
pugnans facit. Ego vero longe te sum fortior.
Si vero vis, veniamus ad pugnam. Et cum tu-
ba cecinisset, culex inhæsit mordens circa na-
res ipsius leuas genas, leo autē propriis vngui-
bus dilaniauit seipsū, donec indignatus est. Cu-
lex autē victo leone cū sonuisset tuba, & epini-

G.iiii.

cion cecinisset, euolauit. Araneæ vero vinculo implicitus cum deuoraretur lamentabatur, quòd cum maximis pugnans, à vili animali aranea occideretur.

Adfabulatio.

Fabula in eos, qui prosternunt magnos, & à paruis prosternuntur.

G V I L E L M V S C A N O N I C V S

diui Aurelij Augustini Florentio suo illustri

Baroni Iselsteino S. D.

Fabulas Æsopi cum ex oratione ligata in solutam vertissem, tibi florentissime Florenti dicare placuit. Quam enim sis amans literarum, ex meo Antonio viro literatissimo facile intelligo. Nam eum tu quidem, quòd eruditum scires, acciuisisti, & is tui amantissimus est, cum ob alia quædam, tum ob amorem tuum erga literatos. Neque illud præterire debeo, me quoque à te vehementer amari, & te commendante magistro Antonio succensum desyderio nostri. Apprime sane decere solet, qui genere sit illustris, eum esse amicum & familiarem literarum: quæ, vt cætera commoda earum fileam, vel solæ adeo faciunt immortalem. Erit autem harum fabularum lectio tibi, vt opinor, utilis. quippe vbi multa ad bene viuendum apposita inuenies: grata certe earum lectio, & iucunda non esse non potest. Hactenus autem eas illis, qui alias complures scripserint fuisse neglectui, satis miror: nec equidem tamen scripturus fuisssem, ni & Titus Liuius harum in historia meminisset, & Flaccum nostrum in epistola vsum viderem, & Quintilianum institutionum libris vtendum suadere cernerem. Sed satis iam exordij. Illud te admonitum velim, ne sis infcius, animantes, quæ iam mutæ sunt, olim fuisse loquaces. Vale: & me, vt facis, ama.

De gallo gallinaceo.

112

Gallus gallinaceus, dum verrit stercorarium, offendit gemmā, Quid, inquit, rem sic nitidam reperio? Si gemmarius reperisset, nihil esset eo lātius, vt qui pretiū sciret. Mihi quidem nulli est vsui, nec magni æstimo, immo equidem omnibus gemmis granū hordei malim.

Morale.

Per gemmam, artem, sapiētiāque intellige per gallum, hominem stolidum & voluptarium. Nec stolidi artes liberales amant, cum vsum earum nesciant: nec voluptarius, quippe cui vna placeat voluptas.

De lupo & agno.

113

Lupus ad caput fontis bibens, videt agnum procul infra bibentē. Accurrit, agnum increpitat, quòd turbarit fontē. Trepidare agnus, supplicare, vt parcat innocenti. Se quando longe infra biberit, potum lupi ne potuisse quidem turbare, nedum voluisse. Lupus contrā intonat, Nihil agis sacrilege, semper obes. Pater, mater, omne tuum inuisum genus, sedulo mihi aduersatur. Tu mihi dabis hodie poenas.

Morale.

Vetus dictum est, Vt canem cædas facile inueniri baculū. Potens si libet nocere, facile capit nocēdi causam. Satis peccauit, qui resistere non potuit.

De mure & rana.

114

Bellum gerebat mus cum rana, De paludis certabatur imperio. Pugna erat vehemens, & anceps. mus callidus sub herbis latitans, ex insidiis ranam adoritur. rana viribus melior, pe-

ctore & insultu valens, aperto Marte hostē la-
cessit. Hasta vtrique erat iunceā. Quo certami-
ne procul viso, milu⁹ adproperat. dūmque præ-
studio pugnæ, neuter sibi cauēt, vtrūque bel-
latorem miluus rapit ac laniat.

Morale.

Itidem euenire solet factiosis ciuibus, qui accensi libidi-
ne dominandi, dum inter se tertant fieri magistratus, opes
suas, plerūque etiā vitā in periculo ponunt.

De cane & vmbra.

115

Canis tranās fluuium, rictu vehebat carnē.
Splendente sole, ita vt sit, vmbra carnis luce-
bat in aquis. Quam ille visam auide captans,
quod in faucibus erat, perdidit. Itaq; tum rei,
tum spei iactura percussus, primū stupuit, de-
inde animum recipiens, sic elatrauit, Miser de-
erat cupiditati tuæ modus. satis sup̄erque erat
ni desipuisses. Iam per tuam stultitiā minus
nihilō tibi est.

Morale.

Monemur hac fabella modestiæ, monemur prudentiæ,
vt & cupiditati sit modus, ne certa pro incertis amittamus.
Astute certe Terentianus ille Sannio, Ego, inquit, spem pre-
tio non emo.

De leone & quibusdā aliis.

116

Cum oue quibusdāque aliis pepigerat leo,
venationem fore communem. Itur venatum.
Capitur ceruus. Partiuntur. Singulas singulis
partes tollere vt conuenerat incipientibus, leo
rugiit. Vna, inquiens, pars mea est, quia sum
dignissimus. Altera itidem mea est, quia viri-

bus præstantissimus. Porro quia in capiundo ceruo plus sudauerim, vendico tertiam. Quartam denique ni concesseritis, actum est de amicitia. Socii hoc audito, discedunt vacui & taciti, non ausi mutire contra leonem.

Morale.

Rara semper fuit fides, apud hoc seculum rarior est apud potentes & est, & fuit semper rarissima. Quocirca satius est vt viuas cum pari. Qui enim cum potentiore viuit, necesse habet sæpe de suo iure concedere. cum æquali æquale tibi eis erit.

De Lupo & grue.

117

Lupo voranti ouem, forte ossa hæseret in gula. Ambit, orat opem, opitulatur nemo. Omnes dictitant tulisse eum pretium voracitatis. Tandem blanditiis multis pluribusque promissis gruem inducit, vt collo longissimo in gulam inserto, os infixum eximeret. Petenti autem præmium illudit, Inepta, inquit, abi. non sat habes quod viuis, vitam debes mihi. Si libuisset, licuit præmordere collum tuum.

Morale.

Tritum est, Perire quod facis ingrato.

De rustico & colubro.

118

Rusticus repertum in niue colubrum frigore propè enectum, domum tulit, abiecit ad focum. Coluber ab igni vim, virumque recipiens, deinde flammam non ferens, omne tugurium sibilando infecit. Accurrit rusticus correpta fude, verbis, verberibusque cum eo iniuriam expostulat, num hanc referat gratiam : num vitam

crepturus sit illi, qui vitam ipsi dederit.

Morale.

Fit interdum, vt obsint tibi, quibus tu profueris, & male de temereantur ij, de quibus tu benefis meritis.

De apro & asino.

119

Dum iners asinus irrideret aprum, ille indignans frendebat. Malum quidem ignauissime fueras meritis, sed etiam si tu poena fueras dignus, tamen ego indignus, qui à te poenas summam. Irride tut⁹, impune tibi licet: tutus enim es ob inertiam.

Morale.

Demus operam, vt cum indigna nobis audimus aut patimur, ne indigna nobis dicamus aut faciamus. Mali enim & perditī plerunque gaudent, si quispiam bonorum eis resistat, magni pendunt haberi se dignos vltione. Imitemur equos, & magnas bestias, qui oblatrantes caniculos cum cōtempu prætereunt.

De mure urbano & mure rustico. 120

Libitum est urbano muri deambulare rus. Vidit hūc mus rusticus, inuitat, apparatur, itur coenatū. Depromit rusticus quicquid posuerat in hyemem, & exhaurit omne penu, vt tanti hospitis expleat lautitiā. Urbanus tamen fronsēm corrugans, ruris damnat inopiam, vrbis subinde laudat copiam. Remeans ducit secum in urbem rusticum, vt quæ verbis iactitaret, re comprobaret. Ineunt conuiuium, quod urbanus splendide compararat. Inter epulādum auditur in sera murmur clavis, trepidare illi, & fugitare fugitando. Rusticus & insuetus, & lo-

ci ignarus ægre se tueri. Discedente famulo reddi vrbani ad mēsam, vocat rusticum, ille vix tandem metu deposito prorepat. Inuitantem ad pocula, vrbani percunctatur, num hoc periculum crebrum sit. Respōdit ille quotidianum esse, oportere contemni. Tum rusticus, Quotidianum inquit? Me hercle istæ dapes plus fellis quàm mellis sapiunt. Equidem malo cum securitate meam inopiam, quàm cum tali anxietate istam copiam.

Morale.

Diuitiæ præ se ferunt quidem voluptatem, sed si introspicias, habent pericula & amaritudinem. Eutrapeles quidam fuit, qui cum inimicis suis quàm maxime nocere vellet, diuites eos faciebat, dictitans ita se eos vlcisci, quippe acceptatos cum diuitijs ingentem sarcinam curarum.

De aquila & cornicula.

121

Aquila nacta cochleam, non vi aut arte quirit eruere piscem. Accedens cornicula dat cōsiliū. Suadet subuolare, & è sublimi cochleā in saxa præcipitare, sic enim fore, vt cōcha frāgatur. Humi manet cornicula, vt præstoletur casum, præcipitat aquila, frangitur testa, subripitur piscis à cornicula, dolet elusa aquila.

Morale.

Noli quibusuis habere fidem: & consiliū, quod ab alijs acceperis, fac inspicias. Multi enim consulti, non suis consulti, sed sibi consulunt.

De coruo & vulpecula.

122

Prædam nactus strepitat in ramis coruus. Videt vulpecula gestiētem, accurrit. Coruum,

inquit, plurima salute impertit vulpes. Sæpe numero audieram famam esse mēdacem, iam re ipsa experior. Nam vt hac fortè iam præterco, suscipiens te in arbore, aduolo culpans famā. fama enim est, te nigriore pice esse, & video candidiore niue. Meo sane iudicio cygnos vincis, & hedera formosior alba es. Quod si vt plumis, ita & voce excellis, omnium auium equidem te dixerim reginam. Hac assentatiuncula illectus coruus, ad canendum apparat, apparanti vero è rostro excidit caseus: quo correpto, vulpecula cachinnū tollit. Tum demum miserum coruum pudet, pigetque sui. Et iactura rei mista pudore dolet.

Morale.

Nonnulli sic auidi laudis sunt, vt cum suo probro & damno ament assentatorem. Eiusmodi homunciones prædæ sunt parasitis. Quòd si vitaueris iactantiam, facile assentatorum pestiferum gen⁹ vitaueris. Si tu voles esse Thrafo, nusquam deerit Gnato.

De leone senectute confecto. 123

Leo qui in iuuentute complures sua ferocitate fecerat inimicos, in senectute exoluit poenas. Reddunt talionem bestia. Dente aper, cornu petit taurus. In primis asellus, vetus ignauia nomen cupiens abolere, verbis & calcibus strenue insultat. Tum gemebundus leo, Hi quibus olim nocui, iam vicissim nocent, & merito. Sed hi quibus aliquando profui, iam vicissim non profunt, imò etiam im-

merito obsunt. Stultus fui, qui multos fecerim inimicos : stultior, qui falsis amicis confusus fuerim.

Morale.

In secundis rebus non efferaris, non sis ferox. Nam si vultum mutarit fortuna, viciſcentur quos læſiſti. Et inter amicos ſac habeas diſcrimen. Sunt enim quidam amici, nō tui, ſed menſæ tuæ, ſed fortunæ tuæ. Quæ quidem fortuna ſimul ac mutata erit, & illi mutabuntur. Et bene tecum actum erit, ſi non inimici fuerint. Merito queritur Ouidius, En ego non paucis quondam munitus amicis,

Dum flauit velis aura ſecunda meis.

Vt fera nymboſo tumuerunt æquora vento,

In medijs lacera puppe relinquoꝝ aquis.

De cane & aſino.

124

Dum blandiretur canis hero & familiæ, herus & familia canem demulcet. aſellus id videns, altius gemit : cœpit eum pigere ſuæ ſortis, inique putat comparatum, canem gratum eſſe cunētis, paſciſque de menſa herili, idque otio, ludōque conſequi. Seſe contrā portare clitellas, cædi flagello, nunquam otioſum eſſe, & cunētis tamen odioſum. Si hæc fiant blāditiis, eam artem, quæ tam vtilis ſit, ſtatuit ſectari. Igitur quodam tempore redeunti domū hero, rem tentaturus, procurrit obuiam, ſubſiſtit, pulſat vngulis. exclamante hero, accurrere ſerui, & ineptus aſellus, qui ſe vrbaniſimum credidit, fuſte vapulat.

Morale.

Nō omnia poſſumus omnes (ait Virgilius in Bucolicis) nec omnes omnia decet: id quiſque velit, id tētet quod poſſit.

fit, Nō simus id quod Græce significātius dicitur *ὄνελος*, id est, asinus lyrarum vel lyre. Sic autem Boetius, A sinus ad lyram positus. Repugnante natura irritus est labor. Tū nihil inuita facies diceſſe Minerua, teste Horatio.

De leone & mure.

125

Leo æstu, cursuque defessus, sub vmbra frō-
de super viridi quieſcebat. Muriū autem græge
tergum eius percurrente, experrectus, vnum ē
multis cōprehendit. Supplicat captiuus: indi-
gnum se esse cui leo irascatur clamat. reputās
ille in nece tantillæ bestiolæ nihil esse laudis, ca-
ptiuum dimittit. Nec verò ita multo post, leo
fortè dum per saltum currit, incidit in plagas.
Rugire licet, exire non licet. Rugientē miserabi-
liter leonē mus audit, vocem agnoscit, repit in
cuniculos, laqueorum quærit modos, quæſitos
inuenit, inuentos corrodit, leo ē plagis euadit.

Morale.

Hæc fabula suadet potentibus clementiam. Etenim v-
t sunt res humanæ instabiles, egent interdum ipsi potentes
ope humillimorum. Quare vir prudens, etsi potest, timebit
vel vlli hominum nocere. Qui autem non timet nocere al-
teri, valde desipit. Quid ita? Quia etsi iam potentia fretus ne-
minem metuis, forsan olim erit vt metuas. Constat enim
euenisse claris, magnisque regibus, vt vilium homuncionū
vel gratia indiguerint, vel iram metuerint.

De miluo ægroto.

126

Lecto decumbebat miluus. Iam ferme mo-
riēs matrem orat precatum ire deos. Mater re-
spondet, nil opus illi sperādum à diis, quorum
sacra, & aras suis rapinis toties violasset.

Morale.

Decet venerari superos. Illi enim pios iuuant, impios

auerfantur. In foelicitate neglecti, in miseria non exaudient.
Quare in secundis rebus sis eorum memor, vt in aduersis
rebus praesentes sint vocati.

De hirundine & aliis auiculis. 127

Cum primum coeptum est feri linum, hirundo suadet auiculis impedire sementem, dictitans sibi fieri insidias. Irrident illæ, stultam vatem hirundinem vocant. Surgente iam lino & virescente, rursus monet euellere sata. Iterum irrident. Maturefcit linum, hortatur populari segetem. Cum ne tunc quidem consulētem audirent, hirundo auium coetu relicto, hominis sibi conciliat amicitiam. Init cum eo foedus, cohabitat, cantu demulcet. Cæteris auibus è lino fiunt retia & laquei.

Morale.

Multi nec ipsi consulere sibi norunt, nec recte consulentē audiunt. Sed cū in periculis sunt & damnis, tū demum sapere incipiunt, & suā damnare socordiam. Tū sat superque consilij est, Hoc, inquit, & illud factū oportuit. Sed praestat esse Prometheus, quā Epimethes. Fuere hi fratres. nomina sunt Græca. Alteri consilium ante rem fuit: alteri post rem, quod declarat interpretatio nominum.

De ranis, & earum rege. 128

Gens ranarum, cum esset libera, Ioui supplicabat dari regem. Ridere Iuppiter vota ranarum: illæ tamen iterum atque iterum instare, donec ipsum perpellerent. Deicit ille trabem: ea moles ingenti fragore quassat fluuium, territæ silent ranæ, regem venerantur. Accedunt pedetentim propius: tandem abiecto metu, in-

H.i.

sultant & desultant : iners rex lusui est, & contemptui. Lacescunt rursum Iouem, orant regem dari qui strenuus sit. Dat Iuppiter ciconiam. Is præstrenue perambulans paludem, quicquid ranarum obuiam sit, vorat. De huius igitur sæuitia ranæ frustra questæ sunt. Iuppiter non audit. nam & hodie adhuc queruntur. Vesperi enim ciconia cubitum eunte, ex antris egressæ, rauco vlulatu murmurant, sed furdo canunt. Vult enim Iuppiter, vt quæ regem clementem sint deprecata, iam ferant inclementem.

Morale.

Perinde atque ranis, euenire solet plebi: quæ si regem paulo mansuetiorem habet, ignauum, inertem esse causatur, optat aliquando contingere sibi virum. Contrà si quando nacta est regem strenuum, huius sæuitiam damnat, prioris laudat clementiam: siue quòd semper præsentium nos poenitet, siue quòd verum est verbum, Noua veteribus non esse potiora.

De columbis & earum rege accipitre. 129

Columbæ olim bellum gessere cum miluo, quem vt expugnarent, delegerunt regem accipitrem. Ille rex factus, hostem agit, non regem. Non segnius, ac miluus, rapit ac laniat. Poenitet colūbas incepti, satius fuisse putantes, pati bella milui, quàm tyrannidem accipitris.

Morale.

Neminem suæ sortis nimium pigeat. Nihil est (teste Flacco) ab omni parte beatum. Equidem meam sortem, modo tolerabilis sit, mutari non optem. Multi noua sorte quæsitæ,

veterē rursus optarunt. Ita plerique ingenio sumus omnes,
nostri nosmet poenitet.

De fure & cane.

130

Furi aliquando panem (vt sileret) porrigenti, respondit canis, Insidias tuas noui, panem das vt desinam latrare : sed ego tuum munus odi, quippe si ego tulero panem, tu ex his tectis cuncta asportabis.

Morale.

Caue parui commodi causa, amittas magnū: caue cuius homini fidem habeas. Sunt enim qui dolo non tantum benigne dicunt, sed & benigne faciunt.

De lupo & fucula.

131

Parturiebat fucula: pollicetur lupo se custodem fore factus. Respondit puerpera, lupi obsequio se nō egere: si velit pius haberi, si cupiat gratum facere, longius abeat. Lupi enim officium constare, non præsentia, sed absentia.

Morale.

Non sunt cuncta credenda cunctis. Multi suam operam pollicentur, non tui amore, sed sui: suum querētes commodum, non tuum.

De partu montium.

132

Olim rumor erat parturire montes: homines accurrunt, circūstunt, monstri quippiam non sine pauore expectantes. Pariunt tandem montes, exit mus, tum omnes risu emori.

Morale.

Hanc fabellam tangit Horatius, Parturiunt montes, inquit, nascetur ridiculus mus. notat autem iactantiam. Iactabundi enim cum magna profitetur & ostentant, vix parua faciūt. Quapropter Thrasones illi iure sunt materia ioci, & scommatū. Vetat item hæc fabella inanes timores. Plerū-

H.ii.

que enim grauior periculo est periculi metus, imo ridiculus est quod metuimus.

De cane venatico, qui ab hero contemnitur. 133

Canem venaticum, qui iam senuerat, instigat herus, frustra hortatur, tardi sunt pedes, non properat. Prehenderat feram, fera edentulo elabatur. Increpitat herus verberare & verbo. Canis respondet deberi sibi iure ignosci, iam senuisse, at iuuenem fuisse strenuum. Sed ut video, inquit, nil placet sine fructu. Iuuenem amasti, senem odisti. Amasti prædabundum, odisti tardum edentulum. Sed si gratus esses, quem olim iuuenem frugis causa dilexisti, senem fructuosæ iuuentutis gratia diligeres.

Morale.

Recte canis: nam teste Nasone,
Nil nisi quod prodest charum est, en detrahe menti
Spem fructus auidæ: nemo petendus erit.
Præteriti commodi nulla est memoria, futuri autem gratis
non magna præsentis commodi summa.
Turpe quidem dictu, sed si modo vera fatemur,
Vulgus amicitias utilitate probat.

De leporibus inaniter timetibus. 134

Sylua insolito mugiente turbine, trepidi lepores rapide occipiunt fugere. Fugientes, cum obfisteret palus, stetero anxii, utrinque comprehensi periculis. Quoque maioris esset incitamentum timoris, vident in palude mergi ranas. Tum ex leporibus vnus prudentior cæteris, ac disertior, Quid, inquit, inaniter timemus? Ani-

mo opus est. Corporum quidem agilitas nobis est, sed animus deest. Hoc periculum turbinis non fugiendum, sed est contemnendum.

Morale.

Omni in re opus est animo. Iacet virtus sine confidentia. Confidentia enim dux, & regina virtutis est.

De hœdo & lupo.

135

Capra cum esset pastum itura, hœdum dormi concludit, monens aperire nemini, dū redeat ipsa. Lupus, qui id procul audierat, post matris discessum pulsat fores, voce caprisat, iubens recludi. Hœdus dolos præsentiens, Non aperio, inquit: nam & si vox caprisat, tamen equidem per rimulas lupum video.

Morale.

Obaudire parenti filios, ipsis est vtile, & inuenem seni de eet auscultare.

De ceruo & oue.

136

Cervus coram lupo ouem ream facit, modiū tritici debere clamitans. Ovis debiti quidem erat infcia, tamen ob lupi præsentiā spondet se daturam. dicitur solutioni dies. Dies adest: monet cervus ouē. Illa it infcias. Quod enim promiserit, excusat factum in metu: & præsentiā lupi, votum extortum nō esse seruandum.

Morale.

Sententia iuris est, Vim vi repellere licet. Ex hac fabella noua quædam nascitur, Fraudem fraude refellere licet.

De rustico & angui.

137

Rusticus quidam nutrierat anguem. Iratus aliquando, bestiam petit securi. Inuadit illa nō

H.iii.

sine vulnere. Postea rusticus deueniens ad paupertatem, ratus est id infortunii, propter anguis iniuriam sibi accidere: igitur supplicat angui ut redeat. Ille ait ignoscere se, sed redire nolle. Neque enim fore securum cum rustico, cui tanta sit domi securis. Liuorem vulneris desisse, superesse tamen memoriam.

Morale.

Ei qui semel fidem soluit, iterum habere fidem vix est tutum. Iniuriam quidem donare, id sane misericordiae est: cauere autem sibi, & decet & prudentiae est.

De vulpecula & ciconia. 138

Vulpecula vocarat ciconiam ad coenam. Obsonium in mesam effundit: quod quum liquidum esset, ciconia frustra rostro tentante, vulpecula lingit. Abit elusa auis, pudet pigetque iniuriae. Post plusculum dierum redit, inuitat vulpeculam. Vitreum vas situm erat plenum belli obsonii. Quod quidem vas quum esset arcti gutturis, vulpeculae obsonium licuit videre & esurire, gustare non licuit. Ciconia rostro facile exhaustit.

Morale.

Risus risu, iocus iocum, dolus dolum, fraus meretur fraudem.

De lupo & capite picto. 139

Lupus in officina sculptoris caput humanum repertum versat, miratur, sentiens id quod erat, nihil habere sensus. O pulchrum, inquit, caput: est in te artis multum, sed sensus nihil.

Morale.

Externa pulchritudo si adsit, grata est: sin alterutra carendum est, praestat externa, quam interna careas. Illa enim

sine hac interdum incurrit odium, vt stolidus eò sit odiosior, quò formosior.

De graculo.

140

Graculus ornauit se plumis pauonis. Deinde pulchellus sibi visus, fastidito genere suo, cõtulit se ad pauonum genus. Illæ tandem intellecta fraude, stolidam auem coloribus nudarunt, & plagis affecerunt. Horatius hanc fabellâ primo epistolarum libro narrat de cornicula. Ait eam olim adornatam collectis, quæ auibus exciderant, plumis: pòst vbi vnaquæque auium suâ plumam decerpfit, ridiculum fuisse.

Ne si forte suas repetitum venerit olim

Grex auium plumas, moueat cornicula risum,

Furtiuus nudata coloribus.

Morale.

Notat hæc figura eos qui se gerunt æquo sublimius, qui cum his viuunt qui & ditiores sunt, & magis nobiles. Quare sæpe inopes fiunt, & sunt ludibrio. Probe Iuuenalis monet, E cælo descendit, γῆθεν σταυρὸν, hoc est, Nosce teipsum.

De musca & formica.

141

Musca altercabatur cum formica se nobile, illam ignobile: se volitare, illam reperere: se versari in tectis regum, illam cauernis latere, segetem rodere, aquam bibere: se splendide epulari iactitabat, & hæc tamen otio nancisci. E regione formica se non ignobile esse, sed suis natalibus contentam: muscam vagam esse, se stabilem, sapere formicæ grana & fluentia, quod muscæ pastilli & vina. Atque hæc se non segni

H.iiii.

otio, at strenua opera nancisci. Porro formicam latam esse & tutam, charā omnibus, exemplar denique laboris: Muscam anxiam cum periculo esse, cunctis infestam, cunctis inuisam, exemplar denique segnitiei: formicam hyemis memorem, alimēta reponere: muscam in diem viuere, hyeme aut esurituram, aut certē morituram.

Morale.

Qui pergit quæ vult dicere, quæ non vult audiet. Musca si bene dixisset, bene audisset. Assentior autē formicæ. Videtur enim optabilior vita obscura cum securitate, quam cum periculo splendida.

De rana & boue.

142

Rana cupida æquandi bouem, sed distentabat. Filius hortabatur matrem cœpto desistere. Nihil enim esse ranam ad bouem. Illa secūdum intumuit, clamat natus, Crepes licet mater, bouem nunquam vinctes. Tertiū autem quum intumuisset, crepuit.

Morale.

Cuique sua dos est. Hic forma, ille viribus, hic opibus, ille pollet amicis. Vnumquēque suo decet esse contentum. Valet ille corpore, tu ingenio. Quocirca quisque semet consulat, nec inuideat superiori, quod miserum est. nec, quod stultitiæ est, certare optet.

De equo & leone.

143

Venit ad equum comedendum leo. Carens autem præ senectā viribus, meditari cœpit artem, medicum se profitetur, verborum ambage equū moratur. Hic dolo dolum, artē opponit

arti. Fingit se nuper in loco spinoso pupugisse pedem, orat vt inspiciens sentem medicus ducat. Paret leo. At equus quanta potuit vi, calcē leoni impingit, & se continuo coniicit in pedes. Leo vix tandem ad se rediens (ictu enim propè exanimatus fuerat) Pretium, inquit, fero ob stultitiam: & is iure effugit. Dolū enim dolo vltus est.

Morale.

Odio digna est simulatio, & simulatione capienda. Non est timendus hostis, qui hostem præ se fert: sed qui cum hostis sit, benevolentiam simulat, is demum timendus, & odio dignissimus.

De equo & asino.

144

Equus phaleris sellæque exornatus, cum ingenti hinnitu per viā currebat. Currēti autem onustus asell⁹ fortē obstabat. Equus ita fremebundus, & fræna ferox spumantia mandens: Quid, inquit, tarde, ignaue obsistis equo? Cede inquam, aut proculco te pedibus. Asellus contrā rudere non ausus, cedit tacitus. Equo autē prouolāti, & cursum intendenti crepat inguē. Tum cursui & ostētui inutilis, ornāmētis spoliatur, dein carrario vēditur. Videt postea cum carro venientem asellus, & affatur, Heus bone vir, quid istuc ornati est? Vbi aurata sella, bullata cingula? Vbi nitidū frænum? Sic amice necesse fuit euenire superbienti.

Morale.

Plerique in secundis rebus elati sunt, nec sui memores nec modestiæ. Sed quia prosperitate insolescunt, aduersi-

tatem incurrūt. Eos qui foelices vidētur, monuerim esse cautos. Etenim si rota fortunæ circumacta fuerit, sentient miserimū genus infortunij esse, fuisse foelicem. Accedet ad cum multi infœlicitatis id quoq; mali. Contēnentur ab ijs, quos ipsi contempserē, & illudent eis ijs, quos ipsi risere.

De auibus & quadrupedibus. 145

Auibus pugna erat cum quadrupedibus. Vtrinque spes, vtrinque metus, vtrinque erat periculum. Vespertilio autem relictis sociis defecit ad hostes. Vincunt aues duce & auspice aquila, Trāsfugam vero vespertilionem damnant, vti ne ad aues vnquam illi sit reditio, vti ne luce vnquam sit volatus. Hæc causa vespertilioni est, vt non nisi noctu volet.

Morale.

Qui cum socijs aduersitatis & periculi particeps esse renuit, prosperitatis & salutis expers erit.

De lupo & vulpe. 146

Lupus quum prædæ satis esset, in otio degebat. Accedit vulpecula, sciscitatur otii causam. Sensit lupus insidias fieri suis epulis, simulat morbum esse causam, orat vulpeculam deprecatum iri deos. Illa dolens dolum non succedere, adit pastorem, monet petere latebras lupi: hostem enim securum posse inopinatò opprimi. Adoritur pastor: lupum maectat. Illa potitur antro & præda. Sed fuit illi breue sceleris sui gaudium. Nam non ita multo post, idem pastor & ipsam capit.

Morale.

Fœda res inuidia est, & ipsi interdum auctori quoq; per-

nicioſa. Flaccus epiſtolarum primo,
Inuidus alterius rebus marceſcit opimis.
Inuidia Siculi non inuenere tyranni
Maius tormentum.

De ceruo.

147

Ceruus in perſpicuo fonte ſe conſpicatus,
probat procera frontis & ramoſa cornua : ſed
tibiſarum exilitatem damnat . Forte dum con-
templatur, dum iudicat, interuenit venator. Fu-
git ceruus ocyor pilis, & agente nimboſ ocyor
Euro. Inſectantur fugientem canes. Sed quum
intraſſet cōdenſam ſyluā, implicita ſunt ramis
cornua. Tum demū tibiſas laudabat, & cornua
damnabat , quæ fecere vt præda eſſet canibus.

Morale.

Fugienda petimus, petenda fugimus. Placent quæ offici-
unt, quæ conferunt diſplicent . Beatitudinē cupimus prius
quā vbi ſit intelligamus. Opum excellentiam & honorū
celſitudinem quærimus: in hiſ beatitudinem ſitam opina-
mur, in quibus tamen multum laboris eſt & doloris. Pul-
chre id ſignificat Lyricus ille noſter,

Sæpius ventis agitur ingens
Pinus, & celſæ grauioſe caſu
Decidunt turres, feriūntque ſummoſ
Fulgura montes.

De vipera & lima.

148

In fabrica offendēs limā vipera, cœpit rode-
re. Subriſit lima. Quid, inquiens, inepta? Quid
agis? Tu tibi antè cōtriueris dentes, quā me
atteras : quæ duritiā æriſ præmordere ſoleo.

Morale.

Etiam atque etiam vide, qui cum tibi reſ ſit. Si in fortio-
rem dentes acuiſ, non illi, ſed tibi nocueris.

De lupis & ouibus.

149

Lupis & agnis, quibus discordia est, foedus aliquando fuit, datis vtrunque obsidibus. Lupi suos catulos, oves canum cohortem dedere. Quietis ouibus ac pascentibus, lupuli matrum desiderio ululatus edunt. Tum lupi irruentes, fidem foedusque solutum clamitant, ouesque canum praesidio destitutas laniant.

Morale.

Inscitia est, si in foedere tua praesidia hosti tradas. Nam qui hostis fuit, hostis forsan nondum esse desijt. Fortassis & causam ceperit, cur te nudatum praesidijs adoriatur.

De sylua & rustico.

150

Quo tempore etiam arboribus suus sermo erat, venit rusticus in syluam, rogans ut ad securim suam tollere liceat capulum. Annuit sylua. Rusticus aptata securi coepit arbores succindere. Tum, & quidem sero, poenituit syluam suae facilitatis. Doluit seipsam esse causam sui exitii.

Morale.

De quo bene merearis, vide. Multi fuere, qui accepto beneficio in authoris abusi sunt perniciem.

De membris & ventre.

151

Pes & manus venter olim incusarunt, quod ab otioso eo lucra ipsorum vorarentur. Iubet aut laboret, aut ali ne petat. Supplicat ille semel atque iterum: negant tamen manus alimentum. Exhausto inedia ventre, ubi coepere omnes artus deficere, tum manus voluit tandem

officiosa esse, verum id sero. Nam venter de-
suetudine debilis, cibum repulit. Ita cuncti ar-
tus dum ventri inuident, cum ventre pereun-
te pereunt.

Morale.

Perinde atque in membrorum societate est, ita habet se so-
cietas humana. Membrum eget membro, amicus eget ami-
co. Quare mutuis operis, & mutuis officiis vtendum est.
Neque diuitiæ, neq; dignitatum apices hominem satis tu-
entur. Vnicū & summū præsidium, cōplurium amicitia est.

De simia & vulpecula.

152

Simia vulpeculam orat, vt partem caudæ si-
bi donet ad tegendas nates. Illi enim esse one-
ri, quod sibi foret vsui & honori. Respondet il-
la, Nihil nimis esse, & se malle humum cauda
sua verri, quàm simiæ nates tegi.

Morale.

Sunt qui egeant, sunt quibus superet. Nulli tamen diui-
tum id moris est, vt re superflua beet egenos.

De ceruo & bobus.

153

Ceruus venatorem fugiens, coniecit se in
stabulum. Boues orat vt in præsepe latitare li-
ceat. Boues tutū esse negant. mox enim & do-
minum, & famulum affuturos. Ille securum se
esse ait, modo ne ipsi prodant. Intrat famulus,
occultum fœno non videt, exit. Gestire cer-
uus, & nihil iam timere. Tum vnus e' bobus &
æuo & consilio grauis, Facile, inquit, erat hūc;
qui talpa est, fallere: sed vt herū qui Argus est
lateas, hoc opus, hic labor est. Mox deinde in-
trogreditur herus. Qui vt serui negligentiam

corrigat, cuncta lustrans oculis, & præsepe manu tentans, cerui deprehendit sub fœno cornua. Inclamat famulos, accurrunt, feram concludunt, capiunt.

Morale.

In aduersis rebus & periculis, latebræ difficiles sunt inuentæ: aut quia miseros, vt cœpit, fortuna exagitat: aut quia ipsi metu impediti, & inopes consilij semet imprudentia produnt.

ÆS O P I F A B V L A E H A D R I A -
no Barlando interprete.

De duobus adolescentibus. 154

Adolescentes duo obsoniū apud cocum sese empturos simulant. Coco alias res agente, carnem alter è canistro surripit, dat socio vt sub veste occulat. Cocus surreptam sibi carnis partem vt vidit, furti vtrunque cœpit insimulare. Qui abstulerat, per Iouē nihil habere: is vero qui habuit, nihil abstulisse identidem deierat. Ad quos, Me quidem, inquit cocus, fur nunc latet: sed is inspexit, is scit quem iurastis.

Morale.

Siquid peccauimus, id nō statim sciunt homines. At deus omnia videt, qui sedet super cœlos, & intuetur abyssos. Quod si cogitēt homines, suppressi, prudētiusq; peccabūt.

De cane & lanio. 155

Canis in macello cum lanio carnem abstulisset, in pedes sese continuo quantum potuit

coniecit. Lanius iactura rei perculsus, primum tacuit: deinde animum recipiens, sic procul acclamitavit, O furacissime curre tutus, impune tibi licet: tutus enim es nūc ob celeritatem. Posthac autem cautius mihi obseruaberis.

Morale.

Hæc fabula significat, plerosque omnes tum demum fieri cautiore, ubi damnum acceperint.

De cane & oue.

156

Canis ouem in ius vocat, panem ex mutuo debere clamitans. illa it inficias. Miluus, lupo, vultur accersuntur, rem affirmant, damnatur ouis, damnatam canis rapit, ac deglubit.

Morale.

Falsis testimonijs opprimi quāplurimos, cum nemo nescit, tum hæc quamoptime docet fabellula.

De agno & lupo.

157

Agno comitanti caprum, lupo fit obuiam: rogitat, cur relictā matre olidum potius sequatur hircum: suadetque vt ad distenta lacte matris vbera redeat, sperans ita fore abductum vt laniet. Ille vero, Mater me, ô lupe, inquit, huic commisit, huic summa cura seruandi data est: Parenti potius quā tibi obsequendum, qui me seducere istis dictis postulas, seductum mox percerpere.

Morale.

Noli omnib⁹ fidem habere. multi enim dum alijs videntur velle prodesse, sibi interim consulunt.

De adolescente & cato.

158

Cum adolescens quidam in delicijs amori-

búsque vsurpasset catum, Venerem precibus
 fatigauit, vt catum in fœminam transfigura-
 ret. Commiserescit, & audit orâtem Venus: fit
 metamorphosis, quæ adolescenti miserè aman-
 ti perplacuit, nempe tota succi plenula, tota can-
 didula, tota elegantula. Itur deinde in cubicu-
 lum, ridetur, luditur. Nec vero ita multo post
 percipiens experiri Dea, nunquid catus cum
 corpore mutasset & mores, per impluuiû im-
 mittit musculum. ibi risu prorsus, atque ludo
 res digna accidit. Conspectam ilico bestiolam
 insequitur muliercula. Venus indignans fœ-
 minæ vultus iterum in catum,

Cum pedibúsque manus, cum paruis brachia
 mutat

Cruribus, & cauda est mutatis addita mœbris.

Morale.

Cælum non animum mutant, qui trans mare currunt,
 Nimisque difficile est assueta relinquere.

Naturâ expellas furca, tamẽ vsq; recurret: inquit Horatius.

De agricola & filiis.

159

Cōplures habebat agricola filios adolescen-
 tulos, iisque inter se discordes fuere. quos pater
 elaborans trahere ad mutuum amorem, appo-
 sito fasciculo iubet singulos breui circūdatum
 funiculo effringere. imbecilla nequicquam co-
 natur ætatula. Soluit parens, redditque singu-
 lis virgulam, quam cum pro suis quisque viri-
 culis facile frangeret: O, inquit, filioli, sic con-
 cordes vos vincere poterit nemo: sed si mu-

tuis volueritis sœuire vulneribus, atque intestinum agitare bellū, eritis tandē præda hostibus.

Morale.

Docet hic apologus, concordia paruas res crescere, discordia magnas dilabi.

De asino & equo.

160

Rusticus equum vacuum, asinūque sarcinulis egregie onustum producit ad viam : defessus asellus, equū sibi onera, vt adiutet, orat, si saluum velit. Negat facturum equus. Asellus tandem sarcinæ pondere grauatus procumbit. moritur. Herus omne onus, mortui quoque aselli corium, in equi dorsum reclinat : quibus cum ille deprimeretur, Me miserū, inquit, merito meo sic nunc exerceor, qui dudum laboranti asino opitulari nolui.

Morale.

Monemur hac fabula, vt oppressis subueniamus amicis. ortus nostri (inquit Plato) partem sibi patria vendicat, partem amici.

De carbonario & fullone.

161

Fullonem inuitabat carbonarius, vt secum in vnīs ædibus habitaret. Fullo, Nō est, inquit, mi homo istuc mihi vel cordi, vel vtile. vereor enim magnopere, ne quæ ego eluam, tu reddas tam atra, quàm carbo est.

Morale.

Monemur hoc apologo cum inculpatis ambulare. monemur sceleratorum hominū consortia veluti pestem quādam deuitare. Trahunt, inquit Campanus, hominem sordiditia, commercia etiam in mores penetrant: & perinde quæque euadit, vt quibuscum versatur,

l. i.

De aucupe.

162

It venatum aucups: videt nidulâtem procul in altissima arbore palumbum: adpropiat: denique insidias molitur. premit forte calcibus anguē. Hic mordere, ille improuiso exanimatus malo, Me miserum, inquit, dum alteri insidiator, ipse dispero.

Morale.

Significat hæc fabula nonnunquam eos suis artibus circumueniri, qui res novas moliantur.

De buccinatore seu tubicine. 163

Buccinator quidam ab hostibus capitur, abducitur: trepidare ille, supplicare, vt parcant innoxio: se, quando nihil vnquam armorū præter vnâ buccinam gestauerit, hominem ne potuisse quidem occidere, nedum voluisse. Illi contrâ murmure tum sæuo, tum verberibus intonant, Nihil agis, scelus, maxime nocēs, atque nunc hîc trucidabere, quòd cum ipse, vt fateris, sis rei militaris imperit⁹, cornu istoc tuo, aliorum excitas cuiusque animos.

Morale.

Grauiissime peccant nonnulli, qui ad mala, quicquid satis prouis principibus, vt inique agant, consulunt, atque huiusmodi quædam ad illorum aures occinunt, Quid etiam dubitas, an te principem esse oblitus es, an nō tibi quod lubeat licet, tu legibus maior, in te legirupæ nomē cadere haud potest, qui ipsis etiam dominaris legibus. tui nihil possident, quod tuum nō sit: tu potes & seruare, & perdere. tibi fas est opibus dignitatēque augere quem visum sit: fas est ubi libuerit adimere. Alios alia vel damnant, vel commendant, tibi nihil non honestissimum futurum.

De lupo & cane.

164

Lupus cani ante lucem in sylua forte fortuna fit obuiam, salutatur, aduētum gratulatur, denique rogat quo pacto tam sit nitidus. Cui ille, Herilis cura hoc effecit, herus me blandientem sibi demulcet, de mensa pascor herili nitidissima, nunquam sub dio dormito, tum vniuersæ familiæ non dici potest quàm sim gratus. Næ tu (inquit lup⁹) multo es foelicissimus, ô canis, cui tam benignus & comis cõtigit herus, quocum ô vtinam commorari & mihi liceat, nullum me animantium esset vspiam fortunatius. Canis noui status cupidissimum videns lupum, effecturum se pollicetur, vt hæreat in parte aliqua apud herum, modo de pristina ferocia aliquid remittere, & seruitutem seruire velit. Stat sentētia: lupo libitum est deambulare ad villā. Sermones edunt in itinere prorsus iucundissimos. Postea verò quàm illuxit, contritū canis collum videns lupus, Quid sibi vult, inquit, ô canis, tua isthæc prorsus depilata ceruix? Solebā, inquit ille, feroculus notis pariter & ignotis allatrare, obmorderẽq; nonnunquā: id ægre ferēs herus, crebris me tunde bat verberibus, prohibens etiā ne quem præter furem lupumq; adorirer. ego sic vapulādo victus sum, & mitior factus, hocq; genialis sæuitiæ seruauit signum. Lup⁹ hoc audito, Ego, inquit, heri tui amicitia tati nō emo. Vale igitur,

I.ii.

ô canis cum tua isthac seruitute: mihi mea potior est libertas.

Morale.

Optabilius est in humili casa dominū esse, & panē atrum vorare, q̄ in amplissima regia opiparis mensis frui, & obnoxium trepidūmq; agere. Nam libertas sublimi exulat aula, vbi accipienda venit, & mullitanda iniuria est.

De agricola & canibus.

165

Agricola quū ruri plusculos hyemasset dies, coepit tandem necessariatū rerum penuria laborare: interficit oues, mox & capellas, postremo boues quoque mactat, vt habeat quo inedia pene exhaustum corpusculum sustentet. Id videntes canes, salutem fuga quærere constituunt: sese enim non victuros diutius, quando ne bobus quidem, quorum in opere rustico faciundo vtebatur opera, pepercit herus.

Morale.

In quam domum mercedis gratia te tradas, vide. Nonnulli humanissimi sunt heri. Multi etenim hodie eò dementiæ prolabantur, vt vel seruos infortunio malo, & damno libenter mactent.

De vulpecula & leone.

166

Vulpecula, quæ leonis immanitatem insuetam habebat, semel atque iterum id forte animalis contemplata trepidare & fugitare. Quū iam tertio obtulisset sese obuiam leo, tantum abfuit vt metueret quicquam vulpes, vt confidenter illum adierit salutaueritque.

Morale.

Omnes nos consuetudo audaciores facit, vel apud eos quos antea vix aspicere ausi fuimus.

De vulpe & aquila.

167

Vulpeculæ proles fores excurrerat, ab aquila comprehensa: matris fidem implorat: accurrit illa, vt captiuâ prolem dimittat, aquilam rogat. Aquila naçta prædam ad pullos subuolat. vulpes correpta face, quasi illius munitiones incendio absumptura esset, insequitur. Quum iam arborē conscendisset & ipsa, Nunc te, inquit, tuosque si potes tuere. Trepidans aquila, incendiū dum metuit, Parce, inquit, mihi, paruisque liberis: tuū quicquid habeo reddidero.

Morale.

Peraquilam, potentis atque audacis animi homines intellige: per vulpem pauperculos, quos calumnijs premere, contumeliosisq; afficere, diuitibus æque studium est. Verum quando est sua & formicis ira, impotentes ij acceptam interdum probe vlciscuntur iniuriam.

De agricola & ciconia.

168

Gruibus anseribusque sata depascentibus laqueum prætendit rusticus: capiuntur grues, capiuntur anseres, capitur & ciconia. Supplicat illa, innocentem sese clamitans: & nec gruem, nec anserem esse, sed auium omnium optimā, quippe quæ parenti sedulo semper inservire, eundemque senio confectum alere consuerit. Agricola, Horum, inquit, nihil me fugit: verū cum nocentibus postquam te cepimus, cum his quoque morieris.

Morale.

Qui flagitium committit, & is qui impuris se adiungit socium, pari poena plectuntur.

I.iii.

De gallo & cato.

169

Venit ad gallum comedendū catus, non satis autem habens ad nocendum causæ, gallum criminari occipit, obstreperā esse autem dictitans, utpote quæ voce tam acuta noctu dormientes homines expergeficiat. Ille se innocentem ait, quū sic excitet in opera mortales. Catus contra intonat, Nihil agis scelestē: cum matre rem habes, nec sorore abstines. Id gallus quoque expurgare quum niteretur, Nec hoc, inquit, perseverantius sœuiēs catus, quicquam facis, tu mihi hodie discerpēris.

Morale.

Vetus dictum esse, ait Guilelmus Goudanus, ut canem cædas, facile inueniri baculum. Malus, si libitum fuerit, quo iure, quâque iniuria te præcipitem dabit.

De cane inuido & boue.

170

Præsepio fœni pleno decūbebat canis. Venit bos ut comedat. Ille se surrigens prohibere. Bos, Dii te cū tua istac inuidētia perdant, inquit, qui nec fœno vesceris, nec eo me vesci sinis.

- Morale.

Eo sunt ingenio plerique, ut alijs inuideāt, quod ipsi mentis inopia assequi nequeunt.

De cornice & oue.

171

Strepitat in ouiculæ dorso cornicula. Ovis, Cani, inquit, si sic obstreperes, ferres infortunium. At cornix, Scio, inquit, quibus insultē: placidis molesta, sœuis amica.

Morale.

Impotenti & sincero perpetua est cum malis parata certatio. Illiditur solo innocentissimus quisque: nocentis vero præferocis hominis aures adstrepit nemo.

De pauone & luscinia. 172

Pauo apud summi Iouis sororem & coniugem Iunonem, queritur lusciniam suaue cantillare, se ob raucam rauim ab omnibus irrideri. Cui Iuno, Dos sua à diis cuique, Luscinia cantu tu plumis longe superas, vnumquenque sua sorte decet esse contentum.

Morale.

Quæ diui largiuntur, grato sumamus animo, neque maiora quæsierimus. Superi temere agunt nihil.

De mustela & muribus. 173

Mustela præ senio viribus carēs, mures iam ita vt solet, insequi non valebat. meditari coepit dolum, in farinulæ se colliculam illatebrat, sic sperans fore, vt citra laborem venetur. Accurrunt mures, & farinam esitare dum cupiūt, ad vnum omnes à mustela vorantur.

Morale.

Vbi viribus quispian destitutus fuerit, ingenio opus est. Lysander Lacedæmonius subinde dicere solebat, quò non perueniret leonina pellis, vulpinam assuendā esse. quod sic lucidius dixeris, Vbi virtus non satis potest, adhibenda est astutia.

FABVLAE M. PETRO SCOTO
viro ornatissimo, eidemq; humanissimo,
mo, scriptæ à Barlando.

De leone & rana. 174

Audire vocē visus leo profluit, subsistit nō sine trepidatione magni quippiā expectās. egre-
l.iiii.

ditur tandem aquis ranula. Leo deposito metu
accedēs propius, bestiolam proculcat pedibus.

Morale.

Vetat hic apologus inanes timores, vt illa à Guilelmo
Goudano versa fabula de partu montium.

De formica.

171

Sitiens venit ad fontem vt biberet formica.
incidit forte in puteum. opitulatur eminus, ex
arbore deiecto ramo columba. Ramū conscen-
dens formica seruatur. Adest, columbam vt ca-
piat, auceps. non finit formica: aucupis pedem
arripit mordicū: auolat columba.

Morale.

Docet fabula præclare meritis referendam esse gratiam.

De pauone & pica.

176

Gens auīū, quū libere vagaretur, optabat sibi
dari regē, Pauo se in primis dignū qui eligere-
tur putabat, quia esset formosissim⁹. Hoc in re-
gē accepto, pica, O rex, inquit, si te tēperante a-
quila nos præstrenue, vt solet, insequi cœperit,
quo illā modo abiges? quo nos pacto seruabis?

Morale.

In principe non tam forma, quàm corporis fortitudo spe-
ctanda est & prudentia.

De ægroto & medico.

177

Medicus curabat ægrotum: ille tandem mo-
ritur. Tum ad cognatos medicus, Hic, inquit,
intemperantia periit.

Morale.

Bibacitatem & libidinem nisi quis mature reliquerit, aut
nunquam perueniet ad senectutem, aut perbreuem est ha-
biturus senectutem.

De leone & aliis.

178

Leo, asin⁹, vulpes eunt venatū. capitur ampla venatio: capta partiri iussa. Asino singulas singulis partes ponente, irrugiit leo, asinū rapit ac laniat. Postea vulpeculæ id dat negotii: quæ astutior, quum leoni longe optima posita parte, sibi vix minimā particulā reseruasset, rogat leo, à quo sic docta sit. cui illa, Huius me, inquit, calamitas docuit. mortuum asinum ostendens.

Morale.

1. Fœlix quem faciunt aliena pericula cautum.

De hœdo & lupo.

179

Fenestra prospectans hœdus, prætereuntem lupum conuitiis incessere audebat. cui lupo, Non tu, ait, scelestè mihi conuitiaris, sed locus.

Morale.

Et tempus, & locus sæpe audaciam addunt homini.

De asino.

180

Asinus de hortulani sæuitia querēs, Ioui supplicat aliū dari herū. Exaudire Iuppiter vota asini, dat tegulariū. Apud quem cū tegulas, grauiorāq; tergo vectaret onera, accessit rursus Iouem: orat dari, qui mitior sit. Ridere Iuppiter: ille tamen nō destitit instare: orare vsque adeò, donec perperelleret. Dat ille coriarium: quē vbi pernouiit asellus, Me miserū, inquit, qui dū nullo sum cōtentus domino, in eū inciderim, qui nec corio quidē meo, quantū auguror, parcet.

Morale.

Semper damnamus quæ præsentia sunt, & noua appetimus, quæ (vt dici solet) veteribus non sunt potiora.

De anu & ancillis.

181

Anus quædam domi habebat ancillas compluras, quas quotidie ante quàm luceſceret, ad galli gallinacei, quem domi alebat, cantum excitabat ad opus. Ancillæ quotidiani tandem negotii commotæ tædio, gallum obtruncant, ſperantes iam negato illo in medios ſeſe dies dormituras. ſed hæc ſpes miſeras frustrata eſt. hera enim vt interemptum gallum reſciuit, in-tempeſta deinceps nocte ſurgere iubet.

Morale.

Non pauci grauius malum dum ſtudent euitare, in alterũ diuerſum incidunt. Peruulgatum, Incidit in Scyllam, qui vult vitare Charybdim.

De aſino & equo.

182

Aſinus beatum putabat equum, quòd pinguis eſſet, & in otio degeret: ſe verò inſœlicem dicebat, quòd macilentus eſſet, ac ſtrigoſus, quotidie ferendis oneribus ab immiti hero ex-cerceretur. Haud multo poſt ad arma conclamatum eſt. Tum equus non equitem dorſo, non frænũ repulit ore, nec telum corpore. hoc viſo, aſinus magnas diis gratias agebat, quòd non equum ſe, ſed aſinum feciſſent.

Morale.

Miſeri ſunt, quos vulgus beatos iudicat: & non pauci beati, qui ſe miſerrimos putant. Sutor crepidarius regem dicit ſœlicem, quem omnium rerum compotem videt, non conſyderans in quantas rex ſolicitudines diſtrahatur, dum interim ipſe optima cum paupertate cantillet.

De leone & capra.

103

Edita rupe ambulanti capram forte conspiciat leo, monet ut potius in viride pratum descendat. Capra, Facerem fortassis, inquit, si tu abesses, qui mihi non istud suades, ut ego inde ullam capiam voluptatem, sed ut tu habeas quod vores famelicus.

Morale.

Omnibus ne habeas fidem: quidam enim non tibi, sed sibi consulunt.

De vulture aliisque auibus.

184

Annuum se natale celebrare adsimulat vultur, auiculas ad coenam inuitat. veniunt pleræque omnes. venientes magno plausu, fauoribusque accipit: acceptas laniat vultur.

Morale.

Non sunt amici omnes, qui blande dicunt, aut benigne se facere velle simulant: latent sub hoc melle venena.

De anseribus.

185

Anseres una cum gruibus agrum vastabant, quibus auditis, rustici protinus in illos feruntur. Rusticos conspiciat auolant grues, capiuntur anseres, qui impediti corporis onere, subuolare non poterant.

Morale.

Expugnata ab hostibus vrbe, facile se subducit inops: at diues feruit captus. In bello diuitiarum magis oneri sunt quam vsui.

De Ioue & simia.

186

Iuppiter scire percipiens, quisnam mortaliū scitissimos ederet liberos, conuocari iubet quicquid vspiam est animantium. Cōcur-

ritur ad Iouem vndique. aderat iam alituum,
 pecudumque genus. inter quos & simia, de-
 formes catulos brachio gestans, cum aduenisset,
 à risu nemo temperare potuit, quin etiam Iup-
 piter ipse profuse admodum risit. Ibi cōtinuo
 simia ipsa, Imò, inquit, nouit & Iuppiter iudex
 noster, catulos meos magnopere omnes, quot-
 quot adsunt, præcellere.

Morale.

Suum cuique pulchrum, vt est adagium. Et alibi apud
 Theocritum in Edyl.

Quæ minime sunt pulchra, ea pulchra videntur amanti.

AESOPI FABVLATORIS CLA- rissimi apologi, è Græco Latini per Rimicium facti.

Argumentum.

Sopos fabulator clarissimus, natione quidem
 AE Phryx, fortuna vero seruus fuit, colore niger, ac
 facie supra modum deformis. Is quia beneficus
 semper in hospites fuit, Dea hospitalis in somnis sibi assi-
 stens, largita est loquelam, (nā ab initio blatero fuit) sapien-
 tiamque, ac variarum fabularum inuentionem: quæ porro
 fabulæ non parum conducunt mortalium vitæ. Nā anima-
 lia bruta fingit agere ea, quæ hominum sunt actiones: quas
 ita ante oculos ponit, quod audientium animos incitat ad
 virtutem: nec vlli sunt hominum mores, quos in brutis fin-
 gendo ipse non aperiat. Has igitur fabulas, si quis trite gusta-
 uerit, quam viam sequi, quamque vitare debeat, in priuatis
 publicisque negotijs facile comperiet. Nam in primis fabu-
 lam narrat: tum quid fabula significet, compendiosius ex-
 ponit. Atque ordinem alphabeti in Græco sequutus, qui in
 Latino sermone seruari non potest, hinc sumit initium.

De aquila & vulpe.

187

Aquila & vulpes cōflata inter se amicitia, in proximo habitare cōstituunt, firmiorem amicitiam ex frequenti cōuersatione fore putātes. igitur aquila nidum alta super arbore instituit. Vulpes verò arborē propter, inter dumeta catulos collocat. Vna igitur dierum quū vulpes latibulum egressa pastum catulis quæreretur, aquila & ipsa cibi indiga, in latibulum deuolans, vulpis catulos arripuit, ac pullis suis comestū præbuit. Vulpes reueniens, cognita filiorum morte atroci, valde tristata est. Et cū aquilam vlcisci non posset, quia quadrupes existens volucrem persequi nequibat: quod vnum miseris ac impotētibus datur, aquilam execratur, ac mala sibi imprecatur: tantum in odium, quum violatur, vertitur amicitia. Contigit igitur illis diebus ruri capras immolari, cuius frustum vnā cū carbonibus accensis aquila arripiens, sustulit ad nidum. Sed vento vehementius spirante, nidus qui ex fœno & materia exili, aridāque confectus erat, incenditur. Aquilæ pulli flammam sentientes, quum volare adhuc nequirēt, humi decidunt. Vulpes confestim illos arripit, in aquilæ conspectum deuorat.

Fabula significat, quòd qui amicitiam violant, quanuis quos læserint, vltionem declinent, dei supplicium non tamē effugiunt.

De aquila & coruo.

188

Aquila celsa ex rupe deuolans, agnum ex o-

mni grege arripuit. Quam rem coruus conspicatus, æmulatione motus, vehementi cum strepitu ac stridore deuolat in arietem, atque vngues in arietis vellus ita implicat, quòd inde etiam motu alarum se explicare nò potest. Hunc pastor quum ita implicitum videt, accurrens coruum comprehendit: atque alarum pennis incis, pueris suis pro ludibrio dedit. Verum enim quum quispiam coruum rogaret, quænam volucris esset, coruus ait, Prius equidem quoad animum aquila fui, nunc verò me coruum esse certo cognosco.

Fabula significat, quòd qui supra vires quippiam audet, hoc solum efficit, quod in aduersa sæpius incidit, ac se vulgo ridiculum exhibet.

De aquila & scabrone.

189

Aquila leporem persequebatur. At lepus auxilii inops, quem tempus obtulit scabronem videns, ab eo auxiliũ implorauit. Cui scabro pollicitus est tutelam ac custodiam suam. Deinde quum aquilam propinquantem scabro conspiciatur, eam precatur, ne suum sibi eripiat seruũ. At aquila scabronis paruitatem contemnens, eo coram leporem exedit. Verum scabro suæ iniuriæ memor, vbi aquila nidificaret, obseruat. Ecce aquila oua parit. Scabro alis elatus, ad aquilæ nidum volat, atque oua deuoluens, humi deiicit. Aquila iacturæ ouorũ mœrore concitatus, euolat ad Iouem (est enim ales deo illi sa-

erata) ac locū ad pariendum sibi tutū dari precatur. Iuppiter sibi concedit, vt cū tempus ad-est, eius in sinu pariat oua. Hoc scabro prouidens, globum ē stercore conficit, atque sursum euolans, in Iouis sinum demisit. Iuppiter volens ē sinu globum excutere, oua aquilæ simul excussit. Extunc aiunt aquilam nunquam parere, quo tempore scabrones existunt.

Fabula significat, quod nullus porro est contemnendus. Quoniam nemo est qui iniuriam accipiat, quin quā tempus datur, se vlcisci non quærat.

De philomena & accipitre. 190

Philomena quum alta quercu sederet, more suo sola canebat. Eam accipiter, cibum quæritans, quum intuetur, repente euolat, illamque rapit. At philomena quum se interitum iri videt, accipitrē precatur, vt se missam faciat, quoniam ad explendū eius ventrem ipsa satis minima sit: sed pro saturitate sua ad maiores aues vt se vertat opus profecto fore. Eam accipiter torue conspiciens, ait, Stultus equidem nimium essem, siquem manibus teneo cibum, illum dimitto, amplioris spe pastus.

Fabula significat, quod qui omittūt id quod manu tenent rerum maiorū spe, consilio inopes ac ratione nimium sunt.

De vulpe & trago. 191

Vulpes & tragus sitientes, in quendam puteum descenderunt. Verum enim post potum, quum egressum conspiceret hircus, vulpes ei comiter ait, Bono sis animo: nam quid saluti

nostræ opus sit, probe animaduerti. Si enim re-
ctus stabis, ac pedibus anterioribus cornibúsve
muro adhærebis, tuas ego scapulas cornuâque
conscendens, quum egressa puteum fuero, te
manu comprehendens hinc desuper traham.
Huic caper pròpte deferuiuit. Vulpes suo exul-
tans egressu, circa os putei capro illudebat. At
dum caper illam incusat, sibi pacta haud serua-
se, ei facete vulpecula inquit, Si ea caper, sapien-
tia præditus esses, quo pilorum ornatu istæc tua
barba referta est, non prius in puteum descen-
disse, quàm egressus pensiculate vidisses.

Fabula significat, quòd homines consilio præditi, rerum
fines prius inspiciunt, quàm dent operam rebus gerendis.

De vulpe & leone.

192

Vulpes quæ nunquam viderat leonem, quû
illi forte obuiasset, adeò pertimuit, vt mortem
penè obiret. Rursum illum quum aspexisset,
pertimuit, sed minime vt primum. Eum ter-
tio quum intuetur, propè accedens, fuit ausa
coram differere.

Fabula significat, quòd rerum terribilia, vsus & consue-
tudo domestica facit.

De cato & gallo.

193

Catus cum gallû cepisset, atque causam quæ-
reret qui eum comedere posset, illû criminari
cœpit, quòd esset animal turbulentum, qui no-
ctu clamitâdo haud permetteret quiescere mor-
tales. Gallus se excusabat, quòd id ageret ad eo-
rum vtilitatem, cum ad opera faciêda illos ex-

citaret. Rursum catus ait, Impius es, ac supra modum scelestus, qui agis continue contra naturam, cū nec à matre, nec à sororibus te abstineas: sed per incōtinentiam cum illis te commisceas. Gallus item defendebat, quod domini sui quæstus gratia, id quoque ageret: enimvero ex huiusmodi coitu, gallinæ pariunt oua. Tunc inquit catus, Excusationibus licet abundes, ego tamen ieiunare haud intendo.

Fabula significat, quòd qui prauus existit natura, cum semel delinquere animo proposuit, quauis causæ desit prætextus, à prauitate tamen non desistit.

De vulpe sine cauda.

194

Vulpes vt è laqueo euaderet, abscissa cauda, cum è pudore vitam sibi mortē putaret, exco-gitauit alias dolo inducere vulpes, vt sub communis commodi specie, sibi singulæ caudam abscinderent, & sic suum dedecus leuaret. Itaque ad vnum vulpibus congregatis suadet vt caudam sibi abscindant, disserens caudam non modo dedecori vulpibus esse, sed oneri graui atque inepto. E vulpibus vna ei facete respondit, Heus soror, si res ista tibi soli conducit, tū itidem aliis consulere haud est æquum.

Hæc fabula ad eos spectat, qui sub charitatis specie, suum commodum consulendo prospiciunt.

De piscatore & smaride pisciculo. 195

Piscator quòd mari rete tetendit, eò smarida cepit pisciculum, qui parua adhuc ætate piscatorem orabat, vt dum grandis esset, atque ma-

K.i.

iorē quæstum ex eo assequi posset, eū vita donaret. Huic piscator lepide respondit, Ego quidem mente carerē, si quod minimum mihi est lucrum, id dimitterem amplioris spe quæstus.

Fabula significat, quòd certa pro incertis, quanuis in eis magna insit spes, stultum est dimittere.

De vulpe & rubo.

196

Vulpes cum sepem quandam ascenderet, vt periculū vitaret, quod sibi imminere videbat, rubum manibus comprehendit, atque volamentibus perfodit. & cum grauius saucia foret, gemens inquit ad rubū, Vt me iuuares, cum ad te confugerim, tu deterius me perdidisti. Cui rubus, Errasti vulpes, ait, quæ pari dolo me capere putasti, quo cætera capere consueuisti.

Fabula significat, quòd stultum est implorare auxilium ab illis, quibus à natura datum est obesse potius, quam alijs prodesse.

De vulpe & crocodilo.

197

Vulpes & crocodilus de nobilitate contendeant. cum crocodilus multa pro se adduceret, ac supra modum se iactaret de splendore progenitorum suorum, vulpes ei furridentis ait, Heus amice, etsi hoc tu quidem non dixeris, ex tuo corio clare apparet, quòd multis iam annis, tuorum splendore fuisti denudatus.

Fabula significat, quòd homines mendaces, res ipsa potissimum refellit.

De vulpe & venatoribus.

198

Vulpes venatores effugiens, ac per auia cur-

rendo iam defessa, hominē casu reperit lignarium, quem rogat, vt se quoquo loco abscondat. Ille tectorium sibi ostendit. Vulpes illud ingrediens in angulo quodam se abscondit. Adsunt venatores: lignariū, si vulpem viderit, rogant. Lignarius verbis quidem se vidisse negat: manu vero, vbi vulpes latebat, locum ostendit. Verum enim venatores re haud percepta statim abeunt. vulpes vt illos abisse prospicit, tectorio egrediēs, tacite recedit. lignarius vulpem criminatur, quòd cum saluam fecerit, nihil sibi gratiarum agat. Tunc vulpes se cōuertens, illi facete ait, Heus amice, si manum, opera ac mores verbo similes habuisses, meritas tibi persoluerem gratias.

Fabula significat, quòd homo nequam, etsi bona pollicetur, mala tamen & improba præstat.

De gallis & perdice.

199

Gallos complures, cum quis domi haberet, quē emerat perdicem, illis cōpascere permisit. Sed cū galli illam infestarēt, rostrisque percuterent, perdix ea iniuria vehementer perdoluit, putans, quia aduena, nec eo genere esset, eas sibi inferri iniurias. Gallos deinde cum adinuicem certātes cōspiceret, perdix amota animi perturbatione ait, De cætero equidem haud tristabor, posteaquā inter eos odiosa certamina cerno.

Fabula significat, quòd homines sapientia præditi, modo rato animo ferunt iniurias ab illis: vel maxime sibi illatas, qui nec sibi, nec suis parcere sciunt.

K.ii.

De vulpe & larua.

200

Vulpes citharœdi domū ingressa, dum quæ domi parata sunt, sagaciter explorat, laruæ caput reperit arte indutriosâ compositum. quod manib⁹ capiēs, ait, O quale sine cerebro caput.

Fabula significat, quòd non omnes corpore dēcori eandē animo habent pulchritudinem.

De homine & ligneo deo.

201

Homo quidam deum ligneū domi habens, cum orauit, vt boni quippiam sibi tribueret: sed quanto magis orabat, eò res domi angustior erat. demum ille concitus ira, deum crucibus capit, & caput parieti percutit. Illi exciso igitur capite, multum auri exiliit: quod homo colligens, ait, Peruersus nimium es, atque perfidus, qui dum in honore te habui, nihil equidem profuisti: percussus vero ac verberatus, boni plurimum contulisti.

Fabula significat, quòd homo nequam, si quando prodest, id efficit vi coactus.

De cane ad cœnam vocato.

202

Vir quidam cum cœnam opiparam parasset, amicum quendam domum vocauit: eius quoque canis, canem alterius ad cœnam inuitauit. Is domum ingressus, cum tantum dapium videt apparatus, latus secum ipse ait, Hodie porro ita me explebo, quòd die crastino comedere non indigebo. Hîsque dictis motu caudæ applaudit. Cocus vero eum conspiciens, tacitus per caudam capit, atque illum sapius ro-

tans per fenestram proiicit. Ille attonitus humo assurgens, dum clamando aufugit, cæteri canes sibi occurrunt, atque rogitant quàm oppipare ipse cœnauerit. At ille languens ait, Ita potu ac dapibus me expleui, quòd cum exiuerim, viam non vidi.

Fabula significat, quòd quibus rebus quis doliturus est, rebus illis lætari non debet.

De aquila & homine.

203

Aquilam homo quidam cum cepisset, pennis alarum sibi euulsis inter gallinas morari dimisit. eam deinde quidam mercatus, pennis alas denuo munit. tum aquila volans, leporem capit, fertque illum benefactori suo. Quam rē conspiciens vulpes, homini ait, Noli hanc aquilam sicuti prius hospitio habere, ne ceu leporem te æque venetur. Tum homo aquilæ item pennas euulsit.

Fabula significat, quòd benefacientes sunt quidem remunerandi: improbi vero omni studio vitandi.

De viro agricola:

204

Homo quidam agricolator existens, cum finem vitæ sibi adesse cognosceret, cuperétque filios in agrorum cultu fieri peritos, eos vocauit, atque inquit, Filii, ego è vita discedo, bona mea in vinea consita sunt. omnia. Illi post patris obitum, putantes in vinea thesaurum rerū reperire, assumptis ligonibus, marris, ac bidentibus, vineam funditus effodiunt, nullumque thesaurum inueniunt. Verum enim vinea cū

K.iii.

probe effossa foret, longe pōst solito fructus produxit, atque illos diuites fecit.

Fabula significat, quòd labor assiduus thesaurum parit.

De carbonario & lotore. 205

Carbonarius lotorem quendam rogauit, vt quam pretio cōduxerat domum, secum pariter cohabitaret. At lotor rei aliàs expertus ait, Cōducibile haud mihi esset. nam quæ albificarē, ea omnia carbonum fauillis ipse maculares.

Fabula significat, quòd res natura dissimiles, stare simul cōmode non possunt.

De vulpe esuriente. 206

Vulpes ingenti fame concita, cum quodam in tectorio carnis frustum ac panem reposita prospiceret, tectorium ipsum intrauit: atque tantum comedit, quòd ad ingentem tumorem ventrem distendit. & cum ex nimia vētris tumefactione inde egredi nequiret, tumens gemebat. Eius gemitū vulpes alia transiens illac, cum audiret, illuc accedit, rogátque quidnam gemeret: deinde causam gemitus edocta, lepide ait, Istic manendum est, vsque dum eò tenuis efficiaris, quāta eras cum intraisti: nam eo pacto facile egredieris.

Fabula significat, quòd nihil est tam durum quod tempus non dissoluat.

De piscatore quodam. 207

Piscator quidam piscandi inexpertus, tibiis ac reti assumptis, iuxta maris litus accedit, atque saxo quodā superexistens, in primis tuba

canere cœpit, putans cantu se pisces facile esse capturum. Verum cantu cum nullum consequeretur effectum, depositis tibiis, rete in mare dimittit, ac pisces cepit perplures. Sed cum ex reti pisces extraheret, atque eos saltâtes perspiceret, non insulse ait, O improba animalia, dum ad tibiam cecini, saltare nolulistis : nunc, quia canere cessio, saltus datis assiduos.

Fabula significat, quod omnia probe fiunt, quæ fiunt tempore suo.

De piscatoribus quibusdam. 208

Piscatores piscatum profecti, diuque piscando defessi, fame præterea ac mœrore, quod nihil cœpissent confecti, cum abire decernunt, ecce piscis quidam alium fugiens se insequentem, in nauiculam saltat: illum piscatores supra modum læti comprehendunt, ac in urbem reuerſi grandi pretio vendunt.

Fabula significat, quod frequentius fortuna id exhibet, quod ars efficere non potest.

De viro inope infirmo. 209

Homo quidam pauper cum ægrotaret, diis vouit, quod si eo morbo liberaretur, boues centum immolaret. quod dii experire volentes, sanitatem illi facile reddunt. Liber igitur à morbo, cū boues, quia pauper, nō haberet, ossa boū centum collegit, eaque super altari deponens, lepide inquit, Ecce quod voui, votum vobis nunc persoluo. At dii illum vlcisci volentes, in somnis sibi assistunt, atque inquit, Ad ma-

K.iiii.

ris litus pergito : ibi enim in loco semoto auri talenta centū reperiēs. Ille expergefactus somnii memor, dū pergit ad litus, incidit in latrones. captus itaque, rogabat, vt se missum facerent, quoniā mille talenta auri persolueret eis.

Fabula significat, quòd homo mendax deos & homines pariter contemnit.

De vulpe & pardo.

210

Vulpes cum pardo de pulchritudine cōtendebat: cū varias corporis notas pardus sibi duceret decori, vulpes ei comiter ait, Ego quidem longe formosior sum iudicanda, quæ non corpus, sed animum variis notis habeo dotatum.

Fabula significat, quòd decor mentis est potior omni corporis ornatu.

De piscatoribus quibusdam.

211

Piscatores quidā è mari rete trahebāt. Quod cum graue esse sentirent, lætitia gestiunt, putātes multos pisces habere irretitos. sed vt rete in terram traxerūt, pisces quidem paucos, saxum vero ingens reti inesse cum perspiciunt, longe tristantur. Quidam ex illis natu iam grandis nō inurbane lociis inquit, Animis estote quietis, quippe lætitiæ soror est mœstitia: oportet enim casus prospicere futuros, illósq; vt leuius quis ferat, persuadere sibi esse euenturos.

Fabula significat, quòd qui reminiscitur fortis humanæ, in aduersis minime frangitur.

De ranis regem petentibus.

212

Ranæ mœrentes quòd sine rege forent, Ioui

supplicatum oratores mittunt, vt regem sibi dedat. Iuppiter earum simplicitatem cognoscēs, lignum in stagni medium dimisit. Quod cum in stagnum cecidit, eius sonus supra modum terruit ranas. Quæ cum lignum esse nouerunt, rursus Ioui supplicatum mittunt, vt regem viuum haud mortuum sibi dedat. Iuppiter stultis earum precibus motus, Hydram illis dedit in regem. Is in diem cum ranas deuoraret, tertio Iouem ranæ precantur, vt regem sæuū atque immanem ab eis amoueret. Tunc inquit Iuppiter, Quē tot precibus regem exorastis, cum vobis perpetuum habetote.

Fabula significat, quod sæpe ea precamur, quæ impetrasse nos postea poenitet.

De cata in foeminam mutata. 213

Cata quædam speciosi cuiusdam adolescentis amore capta, Venerem orauit, vt eam in hominem mutaret. Venus illius miserta, in formam hominis mutauit eam. Quæ cum longe speciosa esset, amator domum subito adduxit. Sed cū in cubiculo simul sederent, Venus experiri cupiens, si mutata facie, mutasset & mores, in medium constituit murem: quem cum illa prospexit, oblita formæ & amoris sui, murem vt caperet persecuta est. Qua super re Venus indignata, denuo eam in priorem catæ formam mutauit.

Fabula significat, quod homo nequam, licet personā mutet, mores tamen retinet eosdem.

De sene mortem vocante. 214

Senex quidam lignorum fascem super humeros ex nemore portans, cum longa via defessus esset, fasce humi deposito, mortem vocavit. Ecce mors aduenit: causamque, quam ob rem se vocauerit, interrogauit. Tunc senex, Vt hūc lignorum fascem super humeros mihi imponeres, ait.

Fabula significat, quod quisquis vitæ cupidior est, licet res mille subijciatur periculis, mortē tamē semper deuitat.

De muliere & medico. 215

Mulier anus cum ophthalmiam pateretur, medicum ad se curādum accersit: certum pretium sibi dare promittens, si eo morbo curaretur: si verò non liberaretur, nihil ei debere pacta est. Medicus verò quotiens illam ibat curatum, totiens quippiam è domo clam exportabat. Mulier igitur ophthalmia curata, cū nihil suarum rerum domi esse prospiceret, medico mercedem pactam petenti soluere denegat. Quam ob rem vocata in iudiciū, pactum quidem non denegat, sed se curatam ophthalmia esse, id vero pernegat, inquit, Cum cæca erā, domum multa supellectile refertam videbam: nunc cum video, vt medicus ait, nihil rerum domi esse prospicio.

Fabula significat, quod homines auaritiæ dediti, sibimet sæpius contradicunt.

De agricola & canibus. 216

Agricola quidam magnitudine hyemis in

suburbanis se locauit . Sed cum alimonia sibi deficeret , capris & ouibus primū vesci cœpit . Cum vero in diem magis sæuaret hyems , boues quoque nec pepercit . Quod facinus cum animaduertunt canes , inuicem verba faciunt , Quid hic stamus , inquiunt ? cur mortem nobis incumbentem non fugimus ? putamúsne cum nostræ parcere vitæ , qui alimonix gratia boues iugulauit ?

Fabula significat, quòd eos fugere debemus, qui in charissimos crudeliter se gerunt.

De agricola & filiis.

217

Agricola quidam cōplures habuit filios, cōtinua seditione discordes , ac eius admonitionis perpetuo negligētes . Cum fortè vnà domi omnes sederent , iussit pater virgarū fascem coram deportari , atq; natos cœpit hortari , vt intergrum fascem disrūperent . Cum igitur fascem totis viribus frāgere non possent , genitor præcepit , vt soluto fasce singulatim frangerēt virgas . Cum quisq; facile hoc perficeret , tunc facto silentio , pater ait eis , Siquādo animis idem sentietis , nati mihi charissimi , nec ab inimicis superari poteritis . Sed si inter vos seditiones seruabitis , qui volet , is facile vos perdet .

Fabula significat, quòd fortior est vnio, quàm seditio, quæ est imbecillitas.

De muliere & gallina.

218

Vidua quædam mulier gallinā habuit , quæ die quolibet pariebat ouum . Putauit mulier,

more ingenii humani, quod sitis habendi semper sollicitat, gallinam illam die bis parituram, si plus speltæ traderet ei solito. At gallina pluri alimonia pinguior facta, id vnum desiit parere ouum. Sic mulier ex quo maius lucrum quaeritabat, id, cæca augendi cupiditate, amisit.

Fabula significat, quod plurima cupiditate rerum præsens quandoque perditur quæstus.

De homine à cane morso. 219

Homo quidam quum eum canis momordisset, summo cum studio sciscitabatur à quo sanari posset. Quidam sibi obuiam factus, atque de medico rogatus, ait, Si vis amice fieri sanus, non est tibi opus medico. Nam si canis qui te momordit, à vulnere lingua sanguinem terget, ista cura nihil potius reperiri potest. alter arridens venustissime inquit, Si huiuscemodi vtor remedio, in diem magis ac magis à canibus mordebor.

Fabula significat, quod ab hominibus nequam incommoda pro commodis, & mala pro beneficiis retribui solent.

De duobus amicis & vrsâ. 220

Amici duo dum rus viarēt, vrsâ eis obuiam occurrit: qua prospecta, alter eorum territus, v. se saluaret, continuo arborem ascendit. Alter quum vrsæ viribus posse obsistere dubitaret, vti mortuus humi iacuit resupinus, retinens flatum atque anhelitum. Quum nec ore aut naso respiraret, vrsâ eum exanimatum existimâs, abiit. Dicunt enim, à cadauere vrsas omnino

se abstinere. Alter deinde ex arbore descendēs, quid in aurem sibi dixerit vrsa socium rogauit. Ille vrbano sermone respondit, Admonitus sum ab vrsa, vt cum huiusmodi amicis nō proficiscar amplius.

Fabula significat, quod eorum amicitia colenda non est, qui quum est opus, amicis subsidia denegant.

De adolescentibus duobus & coco. 221

Adolescentuli duo æquis sumptibus carnes coemerunt, & curatum coco tradiderunt. Obiter cocus dum aliis vacat negotiis, alter iuenum carnes eas clanculum accepit, ac socio tradidit. Coco deinde carnes quæritanti, qui acceperat, se haud habere iurat. Qui vero habebat, se non accepisse iurabat. Cocus percepto iuenum dolo, ait, Etsi fallor equidem à vobis: per quem vero iuratis, res ista non latebit deum.

Fabula significat, nullum scelus posse latere deum.

De duobus inimicis.

222

Duo quidam gladiatorio animo inter se inimicitias habentes, vnà in naui nauigabant. Et quum alter eodem in loco stare cum altero nō pateretur, vnus in puppi, alter in prora consedit. Orta autem tempestate, quum naus periclitaretur, qui in prora sedebat, rogat naus gubernatorem, quæ pars naus submergi prius deberet. Et quum gubernator puppim dixisset, ait ille, Mors mihi modo molesta minime est, si inimicum meum prius mori perspicio.

Fabula significat, quod inimicus vt inimicum perdat, se-

ipsum perdere sapius eligit.

De calamo & oliua.

223

Quanam esset fortior, durior, & magis resistens, canna & oliua inuicem contendebant. Oliua calamo humilitatē obiciebat, eo quòd ventis facile cederet. Huic dicto vnum arundo haud reddidit verbum. Paulo post turbine vehementi aspirans ventus, radicitus euulsit oliuam, totis viribus sibi obfistentē. At canna flatribus se inclinans, salutem faciliè est assecuta.

Fabula significat, quòd potentioribus sine controuersia mos est in tempore gerendus.

De vitula & boue.

224

Vitula quum bouem arantem perspiceret, illum præ se, quæ nihil agebat, contempsit. Sed quum immolationis affuit dies, bos quidem missus: vitula vero vt immolaretur retenta est. Quam rem bos quum conspiciatur, furridens, ait, Heus vitula, ideo non laborabas vt immolareris?

Fabula significat, quòd otiosis & nihil agentibus pericula quoque imminent.

De puero & fortuna.

225

Quum puer quidam iuxta puteum dormiret, fortuna illuc accedens illum excitauit, inquit, Surge, & hinc ocyus abi: Quippe in puteum si caderes, non tuâ inscitiam, sed me fortunam omnes accusarent.

Fabula significat, quòd frequens pericula culpa nostra incurrimus, deinde abs re fortunam accusamus.

De muribus.

326

Domo quapiam quòd perplures forent mures, catus præsentiens illuc accessit, atque nunc vnum, nunc alium capiens, complures interimendo comedit. Verù mures quum sein diem consumi perciperent, ad vnum coacti, inquit secum, De cætero inferius non esse descendendum, si nolumus perditū iri omnes: sed hic superius manendum, quo catus ascendere non potest. At catus consilio muriū percepto, simulans se mortuum esse, posterioribus pedibus se ad palum suspēdit, qui fixus parieti erat, E muribus quispiam deorsum acute prospiciens, ut catum esse cognouit, haud infacete ait, Heus amice, etsi te felem esse certo scirem, deorsum minime descenderem.

Fabula significat, quòd vir prudens semel si fallitur, fictis & simulatis hominibus non amplius fidit.

De simia & vulpe.

227

Apud brutorum animalium concilium, simia ita apposite saltavit, quòd omniū fere consensu rex statim fuit creatus. At vulpes inuidēs ei, vbi viderat carnes laqueo in fonea sitas, illuc simiā ut duxit, inquit ad eā, Hic thesaurus abscondit⁹ est, qui ex lege spectat ad reges: quare quum tuus ex lege sit, tute ipse capias illum. Simia vulpis suasu, illuc temere accedens, ut se captā laqueo sensit, vulpē acriter accusat, quæ dolose deceperat. Et vulpes haud illepide ait,

Heu stulta, quæ quū te fortuna extulisset, dominari cæteris iam te putabas dignam.

Fabula significat, quòd qui temere quippiam aggreditur temere in aduersa incidit, ac vulgo ridiculus fit.

De ceruo & leone.

228

Ceruus vehementi siti cū vexaretur, ad fontem proficiscitur: dūmque potat, suam in aqua prospiciens vmbra, valde lætatus est magnitudine cornuum ac ramositate. deinde pedes & crura prospiciēs, nimiū tristatus est. Hæc dum animo vertit, ecce leo apparet, ac ceruū persequitur. At ceruus fugam arripiens, leonem per campos longe anteibat. Dicunt enim ceruorū vires consistere in pedibus, at leonis in animo stare robur. Quousque igitur leo per cāpos secutus est ceruū, eum assequi non potuit. Casu vero cōtigit ceruum nemus intrare, vbi cornibus ad ramos implicitis, cum fugere non posset, à leone captus, cum se moriturum videret, Heu me miserū inquit, qui cornibus gauisus, ipsis cornibus pereō.

Fabula significat, quòd quæ putamus nobis profutura, ea nobis sæpius obfunt.

De agricola & pelargo.

229

Agricola laqueos in agro tetendit, vt grues & anseres venaretur, qui fata sua continue depascebant. At simul cum illis venatus est pelargum, qui pede tentus, rogat agricolam, vt eum soluat, missūmq; faciat cum non sit grus, nec specie anser, sed pelargus auium piissimus, qui

parentibus semper deseruit, nec illos in senecta deserit vnquam. Ei agricola surridēs ait, Quæ dicis haud me fugiunt : nam qui sis, probe teneo : sed his simul captus cum sis, his quoque simul est moriendum.

Fabula significat, quòd qui cum improbis quopiam deprehenditur crimine, pari poena plectitur cum illis.

De agno & lupo.

230

Agnus in domo bene clausa existens, cum lupum ad se venientem perspicit, illum conuiitiis & maledictis persequitur. At lupo inquit ei, Non tu, sed locus inaccessibleis mihi conuitia dicit.

Fabula significat, quòd locus & tempus faciunt timidos persepe audaces.

De Ioue & coruo.

231

Iuppiter volatilibus regem creare volens, diem concilii auibus indixit, vt qui speciosior esset, rex sibi constitueretur. Quam rem præsentens coruus, ac suæ deformitatis conscius, pennis aliorum hinc inde collectis se decorauit, ac speciosissimū omnium se reddidit. Adest dies præfinitus: veniunt ad concilium aues. Iuppiter coruū ob pulchritudinē cum regem auibus creare vellet, id aues indigne ferentes, quæque suas à coruo extrahunt pennas. At coruus alienis pennis cum esset exutus, coruus vt erat demum remansit.

Fabula significat, quòd qui rebus pēdet alienis, illis amissis, quisnam ipse sit, cuique liquido patet.

L. l.

De tubicine quodam.

232

Tubicen quidā tubæ sonitu pugnātū ciebat exercitum. Ab hostibus deinde per insidias captus, miserāda voce clamabat, Ne abs re, ac frustra occidere me velitis : ego quidē nō pugno, nec præter tubā, quippiam aliud possideo. Qui eum vinctū ducebāt, huiusmodi verba contrā reddiderunt, Hanc ob rem morte dignior es iudicandus, quòd cum hostibus manum cōferre deuitans, alios sonitu ad pugnam hortaris.

Fabula significat, quòd grauiori poena sunt iudicandī, qui cum ipsi iniuriam non agant, alios ad iniuriam agendum impellunt.

De fabro & cane.

233

Faber quidam catulū habebat, qui dum ipse ferrum cuderet, continue dormiebat. Cum vero manducabat, canis statim surgebat: & quæ sub mensa erant deiecta, ceu ossa & alia huiusmodi sine mora corrodebat. Quā rem animaduertens faber, ait ad canē, Heus miser quid faciam nescio, qui dum ferrū cudo, cōtinue dormis, & segnitia teneris. Rursus cum dētes moueo, statim surgis, & cauda mihi applaudis.

Fabula significat, quòd secordes & somnolenti, qui ex aliorum viuunt laboribus, graui censura sunt coercendi.

De mula quadam.

234

Mula quadam nimio hordeo pinguis effecta, nimia pinguedine lasciuiēbat, secū inquiens, Pater mihi equus fuit, qui cursu celerissimus erat, & ego ei per omnia sum similis. parū

post contigit, quod oportuit mulam quantum potuit currere: sed cum cursu cessauit, Heu me miserā, inquit, quæ equi filiā me esse putabam: at nunc memini asinum mihi patrem fuisse.

Fabula significat, quod stulti in prosperis seipsos dedisseunt, sed in aduersis suos per sepe cognoscunt errores.

De thunno & delphino.

235

Thunnus cum eum delphinus persequeretur, magno elatus impetu ac stridore, à vehemēti fluctu in insulam defertur, eundemq; in scopulum à fluctu eodem delphinus dum se putat capere Thunnum, ipse quoque defertur. Thunnus conuersus cum Delphinū expirantem animam perspicit, secū ipse ait, Mors mihi molesta admodum non est, ex quo mortis authorem mori simul mecum perspicio.

Fabula significat, quod qui uis aduersa leui fert, cū aduersitatum aures eadem aduersitate opprimi perspiciunt.

De medico quodam.

236

Medicus quidam cum quē curaret ægrotū, cum mori cōtingeret, efferētibus funus aiebat, Vir iste si se vino abstinuisset, & clysteriis vsus fuisset, cū mori non configisset. Ex his qui aderant, quispia medico haud infacete ait, Heus medice, ista cōsilia cū prodesse quibant, dicēda fuerūt, non nunc, cum nihil valeant prodesse.

Fabula significat, quod ubi haud prodest consilium id eo tempore dare, est sane amicum deludere.

De aucupe.

237

Auceps aucupatum calamis viscoque tetē-

L.ii:

dit, & cum turdum canere arboris desuper rammum aspexit, vt eum caperet, calamos erexit. At inter ambulandum pede altero viperā calcavit, morsusque ab ea, cum iamiam ob venenum se deficere persensit, Heu me miserū, ingemuit, qui dum alium capere festino, alter ad mortem me est aucupatus.

Fabula significat, quod quæ cōtra alios facere nitimur, ea persæpe ab alio ipsi patimur.

De castore.

238

Castor est animal quadrupes, qui in paludibus se nutrit: eius testes variis medelis vtilis esse dicuntur. Itaque cum quispiam eum sequitur, suæ persecutionis causam non ignorans, ac pedum velocitati fidens, quantum potest, fugit, vsquequo ad locum ne videatur, saluus deueniat: atque ibi testes excidens, in venatores, cum sibi appropinquant, proiicit. Et isto pacto à venatoribus se eripit.

Fabula significat, quod sapiens, vt à periculis se eripiat, nihil intentatum deferit.

De puero oues pascente.

239

Puer quidam cum oues eminentiori in loco depasceret, sæpius clamabat, Heus o à lupis mihi succurrite. Qui circum aderant cultores agrorum, cultum omittentes, ac illi succurrentes, atque nihil esse comperientes, ad opera sua redeunt. Cum pluries puer id ioci causa fecisset, ecce cum lupo pro certo adesset, puer vt sibi succurratur, serio clamat. Agricolæ id verū

non esse putantes, cum minime occurrerent, lupus oves facile perdidit.

Fabula significat, quòd qui cognoscitur mētiri, ei veritas postea non creditur.

De coruo & vulpe.

240

Coruus cum carniū frustum rapuisset, arborem quandam supersedit. vulpes eum suspi-
ciens, atque carnes sibi cupiens, illum arte ag-
greditur. Stans igitur sub arbore, coruum lau-
dare occipit, aiens, O q̄ magna avis est hæc,
quàm speciosa, quàm venatrix, quàm formo-
sa, hanc decuit esse avium regem. Nam omnia
regia super alias sibi sunt aves, si modo vocem
haberet. His laudib⁹ coruus inflatus, & dici mu-
tus haud valēs pati vltius, dum magna voce
crocizat, carnes humi decidunt. Illas cū vulpes
rapuisset, cōversa inquit ad coruū, Heus corue,
omnia decora tenes, modo mēte haud careres.

Fabula significat, quòd qui adulatoribus nimis credunt,
hi, quæ non putant, in aduersa sæpius incidunt.

De cane & lupo.

241

Canis cū ante aulam dormiret, lupus super-
ueniens, eum statim cepit: & cū ipsum occide-
re vellet, canis ne eū occideret, rogauit, in-
uens, Here mi lupe, nunc me occidere noli: nam
vt vides, tenuis sum, gracilis & macilētus. Sed
herus meus nuptias in proximo factur⁹ est,
vbi si parum me expectas, ego opipare mandu-
cans, atq; pinguior factus, ero tibi vtilior. Lu-
pus his verbis fidē habens, canem dimisit. Pau-

L.iii.

cos post dies lupus accedens, cū canem domi dormientem reperit, stans ante aulam canē rogat, vt sibi promissa præstet. Ei canis haud rustice inquit, Heus lupe, si ante aulam de cætero me reperis, haud amplius nuptias expectes.

Fabula significat, quòd sapiens cum periculum vitat, ab illo postea continuo cauet.

De coruo ægrotante. 242

Coruus cum ægrotaret, matrem rogauit, vt sua pro sanitate deos precaretur, inquires, Mater noli plorare, sed deos potius precare, vt sanitatem mihi restituant. Ei mater scite respondit, Quem deorū tibi fore propitiū putas, cum nullus sit è cuius aris sacra non rapueris?

Fabula significat, quòd qui in prosperitate quēuis offendit, in aduersis amicum sibi reperit neminem.

De cane carnes portante. 243

Canis ore ferens carnes, ac flumen transiens, cum sub aqua vmbra[m] prospexit, putauit aliū esse canem, qui plus carniū deferret. Itaq; quas ipse ferebat, eas carnes sub aquas ire demisit. Et vt vmbra[m] caperet, se mouit: sed carnes & vmbra[m], quæ sane nihil erant, simul perdidit.

Fabula significat, quòd cupiditate plus semper habendi, quæ tenemus, ea sæpenumero perdimus.

De leone & rana. 244

Leo cum ranā magniloquacem audiret, putans aliquod magnū animal esse, se retrouertit: parumque stans, ranam è stagno exeuntem videt. Quam indignabundus, statim pedibus cal-

cauit, aiens, Nullū amplius vt te perspiciat animal clamore mouebis.

Fabula significat, quòd apud verbosos præter linguā nihil reperitur.

De leone sene.

245

Leo cum senuisset, nec victum sibi quærere posset, viam machinatus est, quā alimenta haud sibi desint. Ingressus igitur spelūcam grauitè ægrotare iacens simulabat. Animalia illū verè ægrotare putantia, visitandi gratia ad eum accedebant: quæ leo capiens, singulatim manducabat. Cum multa animalia iam occidisset, vulpes leonis cognita arte, aditum speluncæ accedens, leonem quo valeat pacto, exterius stans, rogat. ei leo blande respondens ait, Vulpes filia, cur nō introgrederis ad me? Et vulpes non illepide ait, Quoniam herè mi animalium ingredientium per plura equidem vestigia cerno, sed egredientium vestigia nulla.

Fabula significat, quòd homo prudens, quia pericula imminetia prouidet, illa facile deuitat.

De leone & tauro.

246

Leo ingentem taurum per insidias sequens, cum propè accessit, eum vocauit ad cœnam, inquiens, Amice ouem occidi: hodie mecū, si placet, cœnabis. Taurus leoni morè gerens, vt discubuerūt, quū multos lebetes, nec non magnos & plures obeliseos paratos conspiceret, & ouem ibi nullam adesse, è vestigio abiit. Quē leo abeūtem perspiciens, cur abiret rogauit. Et

L.iiii.

taurus haud inurbane respōdit, Non de nihilo equidem abeo, quū instrumēta non ad ouem, sed ad taurum coquendū videam esse parata.

Fabula significat, quòd homines prudentes minime latent improborum artes.

De leone, asino, & vulpe. 247

Leo, asinus, & vulpes, conflata inter se societate venatū exeunt. Quūque multā prædam cepissent, leo asino mādāt vt prædam diuidat. Asinus quum eam in trēs partes æquales esset partitus, optionē capiendi sociis dedit. Quam partionē leo indigne ferens, ac dentibus frendens, à diuisione deposuit eum, mandauitque vulpi, vt prædam ipsa partiretur. At vulpes illas trēs partes in vnum colligēs, ac prædæ nihil sibi seorsum relinquens, leoni omnia tradidit. Tūc leo vulpi ait, Quis te partiri edocuit? Inquit ex tempore vulpes, Asini periculum id me facere instruxit.

Fabula significat, quòd aliorum pericula homines faciūt cautiōres.

De leone cuiusdam rustici filiam amante. 248

Leo cuiusdam rustici filiam amabat. Illam cum habere cuperet, patrem virginis rogauit, vt sibi nubere ipsam assentiret. Ei rusticus ait, Nullo pacto se assensurum, quòd filia bestiae nubat. Quum illum leo torue aspiceret, ac dentibus frenderet, rusticus mutato consilio ait, se cupere ei filiam nubere, modò dentes & vngu-

las prius cædat euellátque, quoniam virgo illis rebus longe terretur. Leo id postquam præ nimio amore fecit, rusticum adiens, filiam sibi dari postulat. At rusticus leonem quum vngulis & dentibus perspicit inertem, arrepto fuste illum frequens pulsando persequitur.

Fabula significat, quòd qui inimicis se committit, de facili perit.

De leena & vulpe.

249

Leena quum à vulpe sæpius exprobraretur, quòd quolibet partu vnum duntaxat pareret catulum, ait, Vnum sanè, ac pol leonem.

Fabula significat, quòd pulchritudo haud inopia rerum, sed in virrute consistit.

De lupo & grue.

250

Lupus in gutture osse retento quum longe cruciaretur, grui pretium obtulit, si illud è gutture extraheret. Grus rostro quum os è gutture extraxit, pretium sibi promissum expostulat. Ei lupo surridens, simulque dentes acuens, ait, Satis pretii tibi esse debet, quòd ex lupi ore caput sine læsione eduxeris.

Fabula significat, quòd apud improbos gratitudo non parua habetur, si pro obsequio quis detrimentum non recipit.

De lupo & agno.

251

Lupus quum agnum inuenisset errantem, cum non cepit fortissima manu, sed causam quæsiuit, quo iure vel iniuria eum comederet. Igitur agno verba huiusmodi fecit, Tu mihi abunde iam diu intulisti iniurias. Agnus ge-

mendo ait, Quomodo id fieri potuit, quum nuperrime venerim ad lucem? Lupus denuo ait, Agrum mihi pascendo deuastasti. Agnus inquit ei, Quum dentibus etiam caream, id facere nequiu. Lupus rursum ait, Ex meo quoque fonte bibisti. Ei inquit agnus, Quo pacto id fieri potuit, quum aquam ex ætate nondum biberim, sed lac matris cibus & potus adhuc mihi sit. Lupus demum ira concitus ait, Licet tua soluere nequeam argumenta, cœnare tamen opipare intendo: agnûmque cepit, ac illum manducauit.

Fabula significat, quòd apud improbos ratio & veritas locum haud habent.

De duob⁹ gallis inter se certantibus. 252

Duo galli inter se ruri certabāt. Qui gallinarum prior dux erat, quum ab altero superatus esset, præ verecundia se abscondit. Alter verò victoria elatus, domus tectum statim superuolans, vehementi alarum plausu cantûque significat se riualem suum pugnando superasse, & de aduersario ferre tropheum. Dum hæc & huiusmodi iactabundus voce crocizat, ecce aquila cibi indiga ex alto deuolans, gallum vnguibus rapit, ac pullis suis in alimoniam contulit. Quam rem, qui victus fuerat gallus, prospiciens, ceu ex hoste triumphans, in publicum venit, ac solus gallinis libere potitur.

Fabula significat, quòd qui prosperis nimium fidit, in aduersa sæpius præceps incidit.

De vate quodam.

253

Foro vrbis medio, quidam vates cuius sortem aperiebat futuram. Quamobrem magna hominum frequentia stipatus, dum vni & alteri suam aperit sortem, ei nuntiatur, res suas furtim domo esse ablatas. Quo audito domū curriculo dum abit, quidam ei obuiā factus, ridicule ait, Quur alios quid esset futurū monebas, qui tuæ sortis nescius fuisti?

Fabula significat, quòd homines nequam corrigūt alios, & sua crimina scire se negligunt.

De formica & columba.

254

Formica sitiens in fontem descendit: vbi dū bibere vult, in aquam cecidit. Columba quædam arborem fonti imminentem super sedens, quum formicam aquis obrui conspiceret, ramulum ex arbore rostro continuo frangit, ac sine mora deiicit in fontem. Ad quem formica se applicans, ex aquis in tutum se recepit. Obiter aucups quidam aduenit, & vt columbā venetur, calamos erigit. Formica id percipiens, pedem alterum momordit aucupi. Eo dolore aucups concitus, calamos demittit. Quorum strepitu columba territa, ex arbore aufugiens, vitæ periculum euasit.

Fabula significat, quòd quū bruta in beneficos grata sint, eò magis esse debent, qui participes sunt rationis.

De vitulo & cerua.

255

Vitulus ceruæ aliquādo ait, Quū magnitudine sis maior canibus, & pedū celeritate cursu

velocior, & ad pugna longe cornib⁹ munitior, cuius rei gratia mater tantopere canes reformidas: Ei cerua inquit surridēs, Quoniā fili licet quæ dicis, omnia possideā, canū latratum ferre nō possum, sed præ timore fugā statim arripio.

Fabula significat, quòd qui natura timidi sunt, apud eos vt audeant, nulla valet hortatio.

De ape & Ioue.

256

Apes, quæ cæræ mater existit, quondam accedens vt diis sacra faceret, Ioui donum obtulit mellis. Qua oblatione Iuppiter lætus, iussit sibi cōcedi, quicquid ipsa precaretur. Apes igitur rogans, ait, Illustrissime deus deorum, ancillæ tuæ concedere velis, vt quicumque ad alueare pro rapiendo melle accesserit, is simul ac pupugero eum, continuo moriatur. Qua rogatione Iuppiter diu ambiguus, quoniam genus mortalium longe amabat, demum api ait, Satis sit tibi, quòd quicumque alueare pro rapiendo melle accesserit, si eum pupugeriis, & in punctura stimulum dimiseris, continuo ipsa moriaris, tibi que vita sit ipse stimulus.

Fabula significat, quòd inimicis quandoque mala precamur, quæ in nos sæpius vertuntur.

De musca.

257

Musca quæ in ollam carniū deciderat, quum se in brodio suffocari sensit, secum ipsa ait, Ecce tantum bibi, tantum comedi, tantum me laui, quòd iure satura mori possum.

Fabula significat, quòd prudentis est potenti animo ferre, quod vitari minime potest.

De adolefcēte quodā & hirundine. 258

Adolefcēs luxuriosus quum bona patris cōsumpſiſſet, ſolāq; veſtis ei remanſiſſet, viſa ante tempus hirundine, æſtatē iam adeſſe exiſtimās, ipſam quoque vēdidit veſtē. Sed hyemē denuo orta, quum immenſo cruciaretur frigore, viſa rurfū hirūdine, quæ & ipſa frigore obibat, ait, O peſſima auis, quæ me & te pariter perdidifti.

Fabula ſignificat, quōd quæ ſuo tempore non ſiunt, ea diu ſtare nequeunt.

De ægroto & medico. 259

AEger à medico rogatus, quo pacto ſe habuiſſet: plus quàm eſſet opus, ſēque ſudafſe reſpondit. Id bonum fuiſſe medicus ait. Secundò rogatus ab eodem quomodo ſe haberet: inquit ægrotus, vehemēti frigore fuiſſe comprehenſum. Id ad ſalutē fore medicus quoque ait. Tertiò ab eodem rogatus, quo pacto ſe babuiſſet: inquit ægrotus, cū difficultate digerere potuiſſe. Rurſum medicus ait, id ad ſalutē optimū fuiſſe. Deinde ex domeſticis cum quidam ægrotū interrogaret, quomodo valeret, illi æger ait, Signa ad ſalutem, vt medicus ait, perplura & optima ſunt, illis tamen diſpereō ſignis.

Fabula ſignificat, quōd qui ad voluptatem loquuntur, illis aures præſtare quis non debet.

De lignatore quodam. 260

Lignator quidā dum iuxta flumen deo Mercurio dicatum ligna cæderet, ſecuris caſu cecidit in flumen. Multo igitur mœrore compre-

hensus, iuxta fluminis ripam gemēs confedebat. Mercurius misericordia motus lignario apparuit, suūque fletus causam rogauit: quā simulac didicit, securim auream deferēs, vtrum quā perdiderat, illa esset, rogauit. At eam pauper suam esse negauit. Secundo Mercurius alteram detulit argenteam. Quam quum pauper ille suā quoque esse denegaret, postremo Mercurius ligneam sustulit. Illam suam esse quum pauper assentiret, Mercurius cognoscens illum esse hominē verū iustumque, omnes sibi dono dedit. Accedens igitur ad socios lignarius, quod sibi acciderat aperit. Vn^o ex sociis id experiri volens, quum ad flumen accessisset, securim in aquam deiecit: deinde flens in ripa cōsedit. Cuius Mercurius fletus causam doctus, securim auream afferens, siquam perdiderat, illa esset, rogauit. Quam quū suam esse assereret, Mercurius cognita eius impudentia ac mendacio, nec auream nec suam quoque tradidit.

Fabula significat, quod quanto deus propitior est probis, eo improbis existit infestior.

De asino & Ioue.

261

Asinus olitori cuidam seruiens, quum parum comederet, & multum laboraret, Iouem exorauit, vt alium dominum sibi mutaret. Itaque Iuppiter mandat vt figulo vaneat. Apud quem asinus quum laboraret in deportando lutum, lateres, tegulas, & huiusmodi, secundo

Iouē precatur, vt alio deferuiat domino. Iup-
piter iterum mandat, vt coriario venundetur.
Cui asinus multo cū labore & paucō cibo ser-
uiens, Heu me miserum, cum gemitu ait, qui
dominos omittens meliores, ad deteriore per-
ueni, apud quem, vt video, corium meū etiam
post mortem cruciabitur.

*Fabula significat, quōd serui priores dominos tunc serui-
re desyderant, cum deteriores experiuntur.*

De leporebus & ranis.

262

Lepores in vnum simul conuenerunt, vbi cū
de miseria ipsorum innata dolerent gernerent-
ve, quōd vita eis, quā cæteris animalibus da-
ta esset miserior: quoniam homines, aquilæ &
canes, ad mortem eos vsque persequeretur, de-
cernūt melius sibi fore semel mori, quā in vi-
ta tam misera diutius permanere. Hoc, certo cō-
silio, vt se in stagnum præcipitent dum ocyus
tendunt, ranæ quæ super stagni ripa astabant,
vt strepitum audiunt, in stagnum desiliunt, se-
que aquis submergunt: quam rē qui lepus præ-
ibat, cū conspiciatur, reliquis ait, State: nā nobis
sentētia mutanda est. Quippe vt liquido vide-
tis, animalia, q̄ nos, magis timida reperiuntur:

*Fabula significat, quōd cum miser inferiorem aspicit, suā
æquius miseriam fert.*

De asino & equo.

263

Asinus cum equū alimonīa & otio diligen-
ti cura abundare perspiceret, eum longe beatū
esse commendabat, seque nimium infœlicem

dicebat, qui cum multum laboraret, & ad saturitatē de paleis haud haberet. Cum tempus belli aduenit, miles armatus equum ascendit: ac cū medios decurrit in hostes, equus mucrone percussus, cadit humi prostratus. Quem asinus prospiciens ingemuit, eiúsque misertus sui animi sententiam mutauit.

Fabula significat, quòd cum paupertate, quæ mater est quietis, quis conuenire debet, potius quàm locupletioribus inuidere.

De asino & lupo.

264

Asinus quidam pede altero sentem calcauit, claudúsque factus, cum lupum ad se veniētem conspiceret, nec fugere posset, miserabili voce inquit, Heus lupe, demorior equidem è dolore: sed ex quo opus est vt tibi & coruis futurus sim cibus, obsecro quatenus tua benignitate sentem è pede velis extrahere, vt munere tuo extremum sine dolore obeam diem. Dum sentem dentibus lupus euellit, asinus cū calce percussit. Lupus deinde naso, fronte, ac dentibus perfractis, Heu me miserū, exclamat, iure hoc patior, deplorādo reiterat, Qui cum essem cocus, medicus esse volui.

Fabula significat, quòd quam quisque nouit, ea se exerceat arte.

De muliere & gallina.

265

Mulier quædam gallinam habebat, quæ aurea continua oua pariebat. putans igitur totam intus auream esse illam, occidit. Sed cum aliis

gallinis esse similem reperit, vbi diuitē se fore putauit, quem primò quæstum habebat, cū plus habendi cupiditate amisit.

Fabula significat, quòd plus habendi cupiditate id sæpe perdimus, quod habemus in manibus lucrum.

De rana & vulpe.

266

Rana palude existens, cæteris animalibus clamando cum profiteretur se medicam esse, pharmacorūque peritam, ei vulpes venustissime ait, Quī alios curaueris, cum claudicātem curare te nescias?

Fabula significat, quòd alios docere quis non potest id quod haud didicerit.

De serpente & agricola.

267

Serpens ante agricolæ cuiusdam domum latebras habens, cum ab agricolæ filio esset percussus, tā acriter ipsum momordit, quòd morsu ex illo puer repēte obiit. Hac re cognita, magnus inter parentes gemitus oritur. Tum pater mœrore cōcitus accepta securi, serpentē vt occideret, persequitur, vibrānsque securim, vt serpentē percuteret, extremū caudæ eius cecidit: deinde volens pacē cū serpente conficere, acceptis farina, aqua, sale, & melle, ad recōciliandā inter se amicitia vocat serpentē. Ei serpens sub petra latens sibilando ait, Frustra laboras bone vir: nā inter nos amicitia fore nō potest: quippe dum me sine cauda aspexero, & tu tui filii sepulchrum, quieti animo esse nequibimus.

Fabula significat, quòd dum iniuriarū recens vel maxime

M.i.

extat memoria, odia tolli minime queunt.

De gallina & vulpe.

268

Vulpes gallinarum tugurium ingressa, cum gallinam nido ægrotantem aspexit, eam rogauit quomodo valeret. Cui gallina prompte respondit, Meliuscule me haberem, si hinc abires foror.

Fabula significat, quòd inimicorum præsentia nimium est molesta.

De viatore.

269

Viator quidam cum multam viam viasset, votum Mercurio vouit, quòd siquid reperiret, eius rei medium sibi offerret. Fortè igitur adinuenit peram amygdalis dactylisque refertā. & cum putaret id esse argentū, peram capiens, amygdalarū nucleos, & carnes dactylorū ipse comedit. Deinde templū Mercuri ingressus, atque aram manibus tenens, verbis ridiculis inquit ad eum, Votum Mercuri nunc persoluo tibi. Nam quas equidē res adinueni, earum tibi offero medium, ossa scilicet dactylorum, ac testas amygdalarum.

Fabula significat, quòd homines auaritia dcorum efficit contemptores.

De leone & homine.

270

Leo & homo cum semel simul viam viarēt, ac inter viandum se quisque verbis cōmenderet, ecce lapideæ occurrunt colūnæ, in qua erat incisum, quòd homo suffocabat leonem: quā sculpturam homo leoni ostendens, ait, Hic vi-

dere licet, quāto homines leonibus, ac feris omnibus præstantiores sunt, ac robustiores. Et leo prompte respondens, inquit, Si apud leones essent, ceu apud homines, qui sculpere scient: plures à leonibus homines, quàm ab hominibus leones suffocari sculptos videres.

Fabula significat, quòd homines iactabundi fingunt se fecisse, quæ facere nunquam tentarunt.

De vulpe quadam.

271

Vulpes cum racemos vuarum plenos iam ac maturescentes prospiceret, cupida de illis manducare, omnem viam machinata est, qua illos comprehendere posset. Sed cum omnem viam frustra tentasset, nec desyderio suo satisfacere quiuisset, mœstitiam vertēs in gaudiū, ait, Racemi illi adhuc nimium sunt acerbi.

Fabula significat, quòd prudētis est fingere, se ea nolle, quæ consequi non posse cognoscit.

De puero & scorpione.

272

Puer quidam ruri venabatur locustas: & cū scorpionem capere vellet, scorpio simplicitate eius cognita, ait ei, Heus puer, dege in pace, ac manum abstine, si non vis tutus perire.

Fabula significat, quòd qui ad vtranque partem cogitat, is & quæ sequi, & quæ vitare debeat, probe tenet.

De venatore & perdice.

273

Venator quidam cum quam acceperat perdicē occidere vellet, perdix gemens huiusmodi verba fecit ad eum, Heus perdicum auceps, si me missam feceris, ac vitam donaueris, alias

M.ii.

perplures conducam tibi perdices. Ei auceps apposite respondit, Nunc eò magis occidi dignam iudico, quòd amicos per insidias perdere polliceris.

Fabula significat, quòd qui sibi charos perdere dolo querit, is præceps in pericula incidit.

De lepore & testudine.

274

Testudo, cum eius pedes lepus derideret, furridens inquit ad eum, Si periculum in cursu feceris, quòd quàm tu velocior sim, liquido cognosces. Cui lepus ait, Te profecto fugit, quid mei valeat pedes : sed iudicem eligamus, qui cursum & terminum nobis diffiniat. Igitur eligunt vulpem brutorum omnium sagacissimā: quæ vt locum & cursus terminum constituit, testudo omni segnitie ac negligentia semota, iter arripiens haud quieuit, donec ad terminū peruenit. Lepus verò pedibus fidens, vbi paululum quieuit, somno excitatus, quantum pedes valuerunt, ad terminum cucurrit, ibique cum testudinem quiescentem reperit, se cum rubore fatetur à testudine superatum.

Fabula significat, quòd studio & diligentia, non corporis viribus res vel maximæ conficiuntur.

De salice & securi.

275

Securis cum salicem cæderet, ex ea ipsa cuneos fecit, quibus salicem facilius scinderet. Quam rem præsentiens salix, gemens eiulansque ait, Non tātum de securi queror, quæ hominum manibus me scindit, quantum de cu-

neis, qui fiunt ex corpore meo.

Fabula significat, quòd in aduersis, non veri amici infestiores amicis, quàm inimici sæpius redduntur.

De puero quodam fure.

276

Puer quidam è ludo literario librum socio clàm auferēs, suæ matri tradidit illum. Quem mater cum libenter accepisset, nec filium castigasset, rursus puer alii vestem clàm abstulit, atque matri quoque detulit. quam cum mater etiam libenter accepisset, puer castigatione carens, cum plura in diem ac maiora crescentibus annis furaretur, demū publice captus, ceu furti reus, per quæstores publice damnatus est mortis. Sed cum ad locum iustitiæ duceretur, eūque mater gemebunda sequeretur, impetrata venia vt matri ad aurem vnum loqui verbum valeret, ad eam conuersus, atque os auri matris adhærens, vti quippiā secreto dicturus, aurē dentibus ei abscidit. Mater vero præ dolore exclamans, mala sibi imprecatur. Tunc qui eum ducebāt, cum supramodū criminarentur, non solū furti, sed quòd tam impius fuerit in matrē, ille absque rubore inquit ad eos, Nemi-
ni vestrum sit mirum, quòd aurem matris dentibus abscidi: ipsa enim huius meæ perditionis author & causa est. Quippe si me castigasset, cum ei librum detuli, quē socio è scholis primum clàm abstuli, omissis præ timore verberum furtis, ad hoc in præsentia genus turpissimum.

M.iii.

mæ mortis non peruenissem.

Fabula significat, quòd qui in delinquendo ab initio non castigatur, facinorosior in diem efficitur.

De pastore & mari.

277

Pastor quidam iuxta litus maris pecudes pascens, cum mare ipsum semel placidū aspiceret, nauigandi studio captus, oues pro daëtylis commutauit. quibus naui impositis, cum altū iam nauigaret, & tempestate sine spe salutis fluctuaret: quæ in naui sunt, ea omnia proiecit, atque in portū se recepit. Denuo cū oues pasceret, ac rursus mare tranquillū videret, suo consocio ipsam maris tranquillitatē commendanti ridicule ait, Mare iterum daëtylos cupit.

Fabula significat, quòd vsus & peritiā nos reddunt in periculis cautiore.

De punica & malo arboribus.

278

Punica & malus arbores, de pulchritudine contendebant. cum diu inter se variis, & acerbis contentionibus certassent, rubus ex proximo sæpe huiusmodi contentiones accipiens, accessit ad eas, atque inquit, Satis iam satis certatū inter vos est, quiescite admodū, & contentionibus finem imponite.

Fabula significat, quòd minores, maiorum lites sæpenumero componunt.

De talpa & matre.

279

Talpa cæcum natura animal est. Hæc aliquādo matri ait, Ingentem sentio odorem. parum post cursum ait, Excelsam aspicio fornacem.

Tertio item ait, Malleorum sonitus audio fabriles. Ei mater comiter ait, Heus filia, tu, vti percipio, non solum oculis, sed naso & naribus orba existis.

Fabula significat, quòd homines iactabundi, cum magna profitentur, tunc vel maxime in minimis redarguuntur.

De vespis, perdicibus, & agricola. 280

Vespæ semel, & perdices siti concitæ, cum simul conuenissent, ad rusticum quendam tendunt, potum ab eo petentes, atque pollicentes, quòd sibi pro aqua largas referrent gratias. Quippe perdices vineam se ei fodere promittunt, quòd plenos vites producunt racemos. Vespæ vero, se vineam circumeûdo custodire, ac fures inde amouere large offerunt. Quibus agricola inquit, Duos habeo boues, qui cum nihil promittant, eandem hanc operam nihil minus præstant. Itaque satius est mihi, illis quàm vobis aquam exhibere.

Fabula significat, non esse illis subueniendum, qui nauci & inutiles sunt.

De Ioue.

281

Cum Iuppiter nuptias celebraret, cuncta animalia sibi munera obtulerunt, quæquæ pro viribus suis. Verum enim serpens rosam legit, illamque ore tenens Ioui obtulit. At Iuppiter vt cum aspexit, palam inquit, Ab omnibus dona libenter equidem accipio: verum à serpente id haudquaquam facio.

Fabula significat, quòd improborum munera non esse sine

M.iiii.

dolis, quiuis prudens sibi persuadere debet.

De simia.

282

Simiam duos catulos parere fertur, quorum ad vnum dūtaxat afficitur, & ex affectu illum diligentissime nutrit. Alterum vero odit negligitque. Cōtigit autem quòd qui in deliciis habebatur, à simia in somnis fuit suffocatus. Quāobrem qui neglectus erat, ad perfectam vsque ætatem cœu matris deliciis fuit educatus.

Fabula significat, quòd hominum prudentiam fortuna proculdubio superat.

De pulice.

283

Pulex cum quendam morsu aliquando stimulasset, captusque rogaretur, quisnā esset qui membra sibi depasceret, ait se ex eo animalium genere esse, quibus à natura datum esset, vt eo pacto vitam viuunt: nec eum occidere velit, cū multum mali facere ipse ei nequeat. At homo ille surridens, inquit ad eū, Eo magis meis necaberis manibus, quoniam nec multū, nec parum abs re quempiam lædere licet.

Fabula significat, quòd malorum, licet parum, vel multū delinquant, misereri haud oportet.

De pulice & homine.

284

Pulex suo solito more saltans, super hominis pede resedit, illumque morsu acriter pupugit. Qua punctione homo ille grauiter concitatus, pulicem cepit, ac vnguibus obtundere voluit. Sed pulex manibus exiliens mortem vitauit. Tum homo exclamans ait, O Hercules

malorum extingtor, ecquid mihi in hunc opprimendum præsens non fuisti?

Fabula significat, quòd non in minimis, sed in magnis arduisque rebus, à dijs auxilium quis implorare debet.

De formicis & cicada. 285

Hyemis erat mediū, cum formicæ sparsim triticum apricabat. Quod cicada aspiciēs, cum inedia conficeretur, accessit ad eas, ac triticum pro alimonia, vt sibi concederent, orauit. Et cū formicæ eam rogarēt quidnam æstate fecerit, num segnis, & otiosa eo tēpore steterit, illis cicada ait, Neq; segnis aut otiosa steti: sed cantu cecini quo laborem viæ viantibus leuabam. Qua re audita, formicæ surridentes inquirunt, Si æstate cecinisti, vt viantes delectares, nunc salta ne frigore conficiaris.

Fabula significat, quòd qui quæ facienda sunt suo tempore non fecit, is in angustias quando non putat, incidit.

De viro & vxoribus. 286

Tempus erat veris, quo quidā in deliciis educatus cum nec iuuenis, nec senex esset (semicanus enim erat capillos) duas simul duxit vxores: vnā quidem natu grandē, alteram vero iunio-riorem. Cū omnes eandem habitarent domū, vxor anus vt virū in amorem suum totū pelleret, quotidie viro caput pertractās, nigros sibi euellebat capillos. Postremo ita illum depilarunt, quòd caluum atq; ridiculū nō sine summo opprobrio virum reddiderunt.

Fabula significat, quòd nulla melior salus senibus existit,

quàm foeminis carere, & maxime iunioribus, nisi penitus obrui se velint.

APOLOGI EX CHILIADIBVS
adagiorum Erasmi desumpti ad communem puerorum fructum.

De vulpecula & pardale. 287

Cum aliquando pardalis vulpem præ se contemneret, quòd ipsa pellem haberet omnigenis colorum maculis variegatā, respondit vulpes sibi id decoris in animo esse, quod illi esset in cute.

Morale.

Necq; vero paulo satius est ingenio præditum esse vastro, quàm cute versicolore.

De vulpe & fele. 288

Cum aliquando vulpes in colloquio, quod illi erat cum fele, iactaret sibi varias esse technas, adeò vt vel peram haberet dolis refertam. Felis autem responderet sibi vnicam duntaxat artem esse, cui fideret, siquid esset discriminis. Inter confabulandum repente canum accurrentium tumultus auditur. Ibi felis in arborem altissimam subsiliit: cum vulpes interim à canum agmine cincta capitur.

Morale.

Innuat fabula præstabilius esse nōnunquam vnicum cōsiliū, modo id sit verum & efficax, quàm plures dolos, cōsiliāque friuola.

De rege & simiis. 289

Rex quidam Aegyptius aliquot simias in-

stituit, vt saltandi rationem perdiscerent. vt enim nullum animal ad figuram hominis propius accedit, ita nec aliud actus humanos aut melius, aut libentius imitatur. Artem itaque saltandi protinus edocta, saltare coeperunt, insignibus induta purpuris, ac personata. Multoque iam tempore maiorem in modum placebat spectaculum, donec e spectatoribus facetus quispiam, nuces, quas clanculum in sinu gestabat, in medium abiecit: ibi statim simia, simulatque nuces vidissent, oblita chorea, id esse coeperunt, quod antea fuerant, ac repente e saltatricibus in simias redierunt. Contritisque personis, dilaceratis vestibus, pro nucibus inter se depugnabant, non sine maximo spectatorum risu.

Morale.

Admonet haec fabula, fortunæ ornamenta non mutare hominis ingenium.

De asino & viatoribus.

290

Duo quidam, cum in desertis locis asinum quempiam forte fortuna nacti essent, contendere inter se coeperunt, vter eorum, vti suum, domum abduceret. Nam vtrique pariter a fortuna videbatur obiectus. Hac interim de re illis inuicem altercantibus, asinus sese subduxit, ac neuter eo potitus est.

Morale.

Quidam a praesentibus commodis, quibus ob inscitiam uti nesciunt, excidunt.

De piscatoribus.

291

Piscatores aliquot, iacto reti, testudines eduxerunt. eas cum essent inter sese partiti, neque sufficerent omnibus comedendis, Mercurium forte accedentem inuitarunt ad conuiuium. At is intelligens se neutiquam humanitatis gratia vocari, sed ut eos fastidito cibo subleuaret, recusauit, iussitque ut ipsi suas testudines ederent quas cepissent.

Morale.

Nonnulli posteaquam inconsulte quippiam adorti sunt, aliorum implorant auxilium, quos suo negotio admisceant.

De asino.

292

Apud Cumanos asinus quispiam pertæsus seruitutem, abrupto loro in syluam aufugerat. illic forte repertum leonis exuium corpori applicabat suo, atque ita pro leone sese gerebat, homines pariter, ac feras voce caudaque territans. Nam Cumani leonem ignorant. Ad hunc igitur modum regnabat aliquandiu personatus hic asinus, pro leone immani habitus ac formidatus, donec hospes quispiam Cumas profectus, qui sæpenumero viderat & leonem & asinum: atque ob id non erat difficile dignoscere, aurium prominentium indicio: neque non aliis quibusdam coniecturis asinum esseprehendit, ac probe fustigatum reduxit, dominoque agnoscanti reddidit. Interim autem risum non mediocrem concitabat omnibus Cuma-

nis asinus iam agnitus, quos dudum creditus leo, metu propemodum exanimauerat.

Morale.

Haud facile tegimus vitia, quæ à puero nobiscum adoleuerunt.

De scarabeo & aquila.

293

Scarabeus aliquando spretus ab aquila, coepit de vindicta quoquo pacto sumenda cogitare. Peruestigauit vbinam aquila nidum collocasset, adrepit scarabeus, & oua simili dolo deiecit. Aquila cum sæpius domicilium commutasset, neq; quicquam proficeret, Iouem patronum adiit, exponit calamitatem suam. Is iubet ut suo in gremio ponat oua, vel istuc in tuto futura. Et huc per vestis lacinias sinusq;, prorepit pertinax scarabeus, haudquaquam sentiente Ioue. Deinde vbi videt oua commoueri Iuppiter, neque satis animaduertit, territus rei nouitate, excusso gremio in terram deiecit.

Morale.

Monet hæc fabula, neminem quantumuis pusillum, contemnendum esse.

De simiis & pardale.

294

In Maurisia simiarum ingens copia. Pardalis autem animal est natura simiis infestissimum, quas tamen viribus assequi non potest; nimium illis in summas arbores subuolantibus. His itaq; dolis in eas utitur. Sternit se supinam sub ramis, ac porrectis cruribus emori fingit sese. Gaudent eo spectaculo simiæ confidentes in ar-

bore . deinde vbi iam mortuam arbitrantur, vnā aliquam emittunt exploraturam , num vere mortuus sit hostis. Illa cautim ac pedetentim accedens, vbi nullum vitæ videt argumentum , pardale nimirum modis omnibus cadauer imitante, demum audet etiam conscendere. Quod simul ac reliquæ simiæ conspexerūt, iam deposito omni metu descendunt, & pardalim omnia ferentem circumsultant . Postremo conculcant insultantes , ludibrii causa, donec sentiens illas iam saltando defatigatas, derepente reuiuiscens, aliam dentibus, aliam vnguibus corripit, dilaniat, ac deuorat.

Morale.

Hostem simulantem vires deficere, summo opere fugiendum esse.

De satyro & rustico Aniani fabula,

Erasmo quoque interprete. 295

Satyrus quidam cū vehementer algeret, hyberno gelu supra modū sæuiēte, à rustico quodam inductus est in hospitium . Admiratus autē cur homo inflaret in manus ori admotas , rogauit cur ita faceret: is respōdit, vt frigidās manus, halitus tepore calefaceret. Deinde vbi exstructo foco, appositā mēsa in pulcrē feruidā rursum inflaret, magis etiam admiratus sciscitatus est, quid hoc sibi vellet, Vti pulcem, inquit ille, nimium feruētem halitu refrigerē. Tum satyrus surgēs à mensa, Quid ego audio, inquit? Tūncodem ex ore pariter & calidū & frigidum ef-

flas? Valebis: neq; enim mihi ratio est cū eiusmodi homine commune habere hospitium.

Morale.

Notantur bilingues, qui eūdem modo laudant, modo vituperant.

Fabella ex Lamia Politiani desūpta. 296

Aues olim propè vniuersæ, noctuā adierunt: rogaruntque eam, ne posthac in ædiū canis nidificaret, sed in arborū potius ramis, atque inter frōdes: ibi enim vernari suauius. Quin eīdem quercū modo enatā pusillā, tenellāque adhuc ostendebant, in qua scilicet molliter (vt aiebant) & fidere ipsa aliquando noctua, & suū sibi construere nidum posset. At illa facturam se negauit. Quin inuicem consilium dedit his, ne arbusculæ illi se crederent: laturam enim quandoque esse viscum, pestem videlicet auiū. Contempnere illæ (vt sunt leue genus, & volaticum) sapientis vnus noctuæ consilium. Iam quercus adoleuerat, iam patula, iam frondosa erat. Ecce ibi aues illæ omnes gregatim ramis inuolitant, lasciuiunt, subsultant, colludūt, cantillant. Interea quercus ea viscum protulerat, atque id homines animaduenterant. implicitæ ergo repente ibi omnes pariter miscellæ, ac frustra eas sera pœnitentia subiit, quòd salubre illud consilium spreuissent. Atque hoc esse aiunt, cur nūc aues omnes, vbivbi noctuā viderint, frequentes eam quasi salutant, deducūt,

sectantur, circumfidunt, circumuolitant. Etenim consilii illius memores, admirantur eam nunc ut sapientem, stipantque densa caterua, ut videlicet ab ea sapere aliquando discant. Sed opinor frustra, immo vero etiam interdum cum magno ipsarum malo. Nam veteres illarum noctuarum reuera sapientes erant: nunc multarum noctuarum sunt, quarum noctuarum quidem plumas habent, & oculos, & rostrum: sapientiam vero non habent.

Morale.

Bene monentis consilia ne spernas, hæc fabula docet.

A P O L O G V S E X S E C V N D O L I -
bro Petri Criniti de honesta disciplina
desumptus. 297

Sata est olim cucurbita iuxta arborem pinum, quæ grandis admodum & ramis patulis extabat: cucurbita vero cum multis pluuiis, atque cæli temperamento creuisset, lasciuire incipit, & ramulos audacius porrigere. Iam serpebat in pinum, iam surgere, iam ramos, & frondes inuoluere audebat, ampliora folia, candentes flores, prægrandia poma, & virescētia ostentans. Itaque tanto fastu atque insolentia intumuit, ut pinum arborem ausa sit aggredi. Et vi-des, inquit, ut te supero, ut amplis foliis, ut vi-rore præsto, & iam iam ad cacumen prosurgo? Tum pinus quæ senili prudentia, & robore pollebat, nihil mirata est cucurbitæ insolentis au-

daciam: sed ita ad eam respondit, Ego hic multas hyemes, calores, æstus, variâsque calamitates peruici, & adhuc integra cōsisto. Tu ad primos rigores minus audaciæ habebis, cū & folia cōcident, & viror omnis abierit.

Morale.

Secundis rebus non esse superbiendum.

FABELLA DE CORVO ET LUPIS, ex Iohanne Antonio Campano desumpta. 298

Coruus lupos per ardua montium iuga commitatur: partem sibi prædæ fieri postulat. qui eos secutus nullo tempore destituisset, sociusque fuisset. Repulsus deinde à lupis, tanquam non eos, sed prædam cibumque; secutus: nec minus luporum si occideretur, quàm cæterorum animalium exta fuisset voraturus.

Morale.

Non quid agamus semper inspiciendum est, sed quo sumus animo, cum agimus.

Altera de partu terræ. Ex eodem. 299.

Turgida olim facta tellus, & mirum in modum tumida, magnum aliquod paritura videbatur. Accurrunt finitimi, stupent agricolæ, terræ partum inter spem, metumque expectant: alii Typhoea illum centimanum, alii montes erupturos putabāt. Aperitur terra, prodiit mus: & quod miraculo fore omnibus arbitrabatur,

N. d.

in risum, atque iocum conuerterunt.

Morale.

Non semper credendum promissis magnificis.

APOLOGVS DE MEMBRIS ET
ventre ex Liuiio desumptus. 300

Humani artus cum ventrem otiosum viderent, ab eo discordarunt, & suum illi ministerium negauerunt. Cum eo pacto & ipsi quoque deficerent, intellexerunt ventrē cibos acceptos per omnia mēbra diuidere, & cum eo in gratiam redierunt.

Morale.

Magnæ res discordia pereunt, concordia valent.

Liuii verba hæc sunt, ex secundo libro
historiarum ab vrbe condita.

Placuit igitur oratorem ad plebē mitti Menenium Agrippam, facundum virum, & quod inde oriundus erat, plebi charum. Is intromissus in castra, prisco illo dicendi & horrido modo nihil aliud quàm hoc narrasse fertur, Tempore quo in homine, non vt nunc, omnia in vnum consentiebāt, sed singulis mēbris suum cuique consilium, suus sermo fuerat, indignitas reliquas partes sua cura, suo labore ac ministerio ventri omnia quæri: ventrem in medio quietum, nihil aliud, quàm datis voluptatibus frui: conspirasse inde ne manus ad os cibum ferrent, nec os acciperet datū, nec dentes con-

ficerent . Hac ira dum ventrem fame domare
vellent, ipsa vnà membra, totumque corpus ad
extremam tabem venisse: inde apparuisse ven-
tris quoque haud segne ministerium esse : nec
magis ali, quàm alere eum, reddentem in om-
nes corporis partes hunc, quo viuimus vige-
musque, diuisum pariter in venas mature con-
fecto cibo sanguinē. Comparando hinc quàm
intestina corporis seditio similis esset iræ ple-
bis in Patres, flexisse mentes hominum.

EX SECUNDO NOCTIVM AT-
ticarum Gellii, apologus AEsopi Phrygis
memoratu non inutilis.

301

Æsopus ille è Phrygia fabulator, haud im-
merito sapiens existimatus est : quoniam quæ
utilia monitu, suasuque erant, non seuerè, non
imperiose præcepit, & censuit, vt philosophis
mos est, sed festiuos, delectabilésque apologos
commentus, res salubriter, ac prospicienter a-
nimaduersas, in mētes animosque hominum,
cum audiendi quadam illecebra induxit, velut
hæc eius fabula de auiculæ nidulo, lepide atque
iucunde præmonet, spem fiduciámque rerum,
quas efficere quis possit, haud vnquam in a-
lio, sed in semetipso habendam . Auicula, in-
quit, est parua, nomen est cassita: habitat, ni-
dulaturque in segetibus id ferme temporis, vt
appetat messis, pullis iamiam plumantibus. Ea

N.ii.

cassita in sementes fortè concesserat tempesti-
uiore: propterea frumentis flauescensibus, pul-
li etiam tūc inuolucres erant. Cum igitur ipsa
iret cibum pullis quæsitum, monet eos, vt si-
quid ibi nouæ rei fieret dicereturve, animaduer-
terent: idq; vti sibi, vbi redisset, nuntiaret. Do-
minus postea segetū illarum, filium adolescen-
tem vocat, & Vidēsne, inquit, hæc ematurui-
se, & manus iam postulare? Idcirco die crasti-
no, vbi primum diluculabit, fac amicos adeas,
& roges veniant, operamque mutuam dent, &
messem hanc nobis adiuuent. Hæc ille vbi di-
xit, discessit. Atque vbi rediit cassita, pulli trepi-
duli circūstrepere, orareque matrem, vt statim
iam properet, atq; alium in locū sese asportet.
nam dominus, inquiunt, misit qui amicos ro-
garet, vti luce oriente veniant, & metant. Ma-
ter iubet eos à metu otiosos esse. Si enim do-
minus, inquit, messem ad amicos reiecit, crasti-
no seges non metetur: neque necesse est hodie
vti vos auferam. Die igitur postero, mater in
pabulum volat, dominus quos rogauerat oppe-
ritur. Sol feruit, & fit nihil, & amici nulli erant.
Tum ille rursus ad filium, Amici isti, inquit,
magnā in partem cessatores sunt, quin potius
imus, & cognatos, affines, vicinósque nostros
oramus, vt adsint cras tēpori ad metendū? Ita-
dem hoc pulli pauefacti matri nuntiāt. Mater
hortatur, vt tum quoque sine metu, ac sine cu-

ra sint: cognatos affinesq; nullos ferme tam esse obsequibiles ait, vt ad laborem capeſſendum nihil cunctentur, & ſtatim dicto obediāt. Vos modo, inquit, aduertite ſi modo quid denuo dicetur. Alia luce orta, auis in paſtum profeſta eſt: cognati & affines operā, quam dare rogati ſunt, ſuperſedent. Ad poſtremū igitur dominus filio, Valeant, inquit, amici cum propinquis. Afferes prima luce falces duas: vnā egomet mihi, & tu tibi capies alterā, & frumentū noſmetipſi noſtris manibus cras metemus. Id vbi ex pullis dixiſſe dominū mater audiuit, Tempus, inquit, eſt cedendi, & abeundi: fiet nūc dubio procul, quod futurum dixit. In ipſo enim iam vertitur cuius eſt res, non in alio vnde petitur. atque ita caſſita nidum migravit, & ſeges à domino demeſſa eſt. Hæc quidem eſt AEſopi fabula, de amicorū & propinquorū leui & inani fiducia. Sed quid aliud ſanctiores libri philoſophorū monent, quā vt in nobis tantum ipſis nitamur? Alia autē omnia, quæ extra nos extrāque noſtrū animū ſunt, neq; pro noſtris, neque pro nobis ducamus. Hunc AEſopi apologum Qu. Ennius in ſatyris ſcite admodum & venuſte verſibus quadratis cōpoſuit: quorū duo poſtremi iſti ſunt, quos haberi cordi, & memoriæ operæpretium eſſe puto,
Hercle hoc erit tibi argumentum ſemper in
promptu ſitum,

N.iii.

Ne quidquam expectes amicos , quod agere tu per te potes.

De Arione & delphino fabula elegantissima ex libro X V I. eiusdem. 302

Vetus & nobilis Ario cantator fidibus fuit. Is loco & oppido Methymnæus , terra atque insula omni Lesbios fuit . Eum Arionem rex Corinthi Periander amicum, amatumque habuit, artis gratia . Is inde à rege proficiscitur, terras inclytas, Siciliam, atque Italiam visere. Vbi venit eò, aurésque omnium, mentésq; in vtriusque terræ vrbibus demulsit: in quæstibus istis & voluptatibus, amoribusque hominum fuit. Is tum postea grandi pecunia, & re multa copiosus, Corinthum instituit redire. Nauem igitur & nautas, vt notiores amiciorésque sibi Corinthios delegit. Sed eo Corinthios homine accepto, nauisq; in altum prouecta, prædæ pecuniæque cupidos, cepisse consilium de necando Arione. Tum illum ibi pernicie intellecta, pecuniam cæteraque sua vt haberent, dedisse: vitam modo sibi vt parcerent, orauisse. Nautas precum eius harum commiserunt esse illatenus , vt ei necem adferre per vim suis manibus temperarent: sed imperauisse, vt iam statim coram desiliret in mare. Homo, inquit, ibi territus spe omni vitæ perdita, id vnū postea orauit, vt prius quam mortem oppeteret, inducere permetterent sibi sibi indumenta, & fides

capere, & canere carmen casus illius sui conso-
labile. Feros & immanes nauitas prolubium
tum audiendi subit. Quod orauerat impetrat.
Atque ibi mox de more cinctus, amictus, or-
natus, stansq; in summæ puppis foro, carmen,
quod Orthium dicitur, voce sublatissima can-
tauit. Ad postrema cantus cum fidibus orna-
tūque omni, sicut stabat canebatque, eiecit sese
procul in profundum. Nautæ haudquaquam
dubitantes quin perisset, cursum, quem facere
coeperant, tenuerunt. Sed nouum & mirum &
pium facinus contigit, delphinum repente in-
ter vndas adnauisse, & dorso super fluctus edi-
to vectauisse: incolumiq; cum corpore, & or-
natu, Tenarū in terram Laconicam deuexisse.
Tum Arionem prorsus ex eo loco Corinthū
petiuisse, talēq; Periandro regi, qualis delphi
no vectus fuerat, sese obtulisse: eique rem, sicut
acciderat, narrauisse. Regem istæc parum cre-
didisse: Arionē quasi falleret, custodiri iussisse.
Nauitas requisitos, ablegato Arione dissimu-
lāter interrogasse, ecquid audissent in iis locis
vnde venissent, super Arionem, eos dixisse: ho-
minē cum inde irēt, in terra Italia fuisse, eū-
que illic bene agitare, & studiis delectationi-
būsq; vrbium florere, atq; in gratia pecuniāq;
magna fortunatū esse. Tum inter hæc eorū ver-
ba, Arionē cū fidibus & indumētis, cū quibus
se in salum eiacularat, extitisse. Nautas stupe-
N.iiii.

factos, conuictosque ire inficias non quisse.

Morale.

Documēto est hæc fabula, plus aliquādo inueniri in brutis animalibus demētīæ, q̄ in his hominibus, qui præter opes nihil habent pensi, præter figuram nihil humanitatis.

NICOLAI GERBELLII PHOR-
censis apologus lepidissimus.

De aranea & podagra.

303

Aranea paululū à texēdo opere quietior, ani-
mi relaxandi gratia commodū deambulabat.
Huic se obuiā præbuit podagra, tametsi passi-
bus ambiguus admodum ægre illam assequere-
tur. Eius diei itinere vtcunq; emenso, non lon-
ge aberant ab oppidulo, cui regionis eius inco-
læ Tyche nomen indiderant. Vtrique consiliū
fuit cōditionis suæ hospitē præuestigare. Ara-
nea non maximè opere data opera, in opulēti cu-
iusdā ciuis ædes diuertit, inibi quaquauersum
telas suas præpandebat, prætendebátque retia.
aderāt ilico nescio qui trygodæmones, qui te-
xtrinā illius demoliebantur. Momentaneū ita-
que erat ipsius quo etiānumcunque se verteret
ædificium. Nusquam etenim scopariorū ocu-
latis scopas poterat effugere. Misera planè quæ
in tanta rerum omniū affluentia, sola egebat,
proturbabaturque. Podagra verò mendicabu-
li instar, vix tandem egestosi cuiuspiam tugu-
riolum impetrarat. In id loci cum decubisset,
nihil non experiebatur miseriarum. Appone-

batur coenaturienti panis cibarius, aridis vix faucibus hianti hydropoteriū. Iamque diurno itinere lassescenti torus ligneus, nullis frondibus, nullo gramine, sed prætenuibus paleis insternebatur. Atqui dicere non est huius instituti, quàm cōuenerint male membris mollibus cuticulæ (vt ita dixerim) holosericæ, stragula tā dura, tam barbari villi. Oriente igitur vix tandē illo augusto sydere, quod exaudit, quod inuictur omnia, conuenere rursū aranea simul & podagra. Prior aranea prætēritæ noctis molestias, tot locorū cōmutationes denarrat, nunc hero exprobrans munditiem, nunc nimiam scopariorum obseruantiam. Podagra cōtrā de hospitii sui egestate compluria comminiscitur. Nec otium habet administrare araneæ liuidas vibices, quas adamantina fulcra tenellæ cuticulæ impresserant. Cōsiliū ineūt, araneam deinceps pauperū tuguria, podagram vero diuitū aulas debere subingredi. In hāc aranea pedibus, podagra animis vadit sententiā. Veruntamen tenebris iamiam increscētibus, vrbi cuipiā sese approximant. Podagra instituti nō immemor, pedetentim se in nūmofi cuiusdam domū illatebrauit. Qua commodum ab hero conspecta, Dii boni, qua beneuolentia, qua humanitate, quibus nominibus excipitur? Supponuntur, substruunturque olorinæ culcitrae, toralia perdicum subalaribus plumis referta. Taceo vinū

dulce, vinum nigrum, Lesbium, Surrentinum. taceo ficedulas, phasianos, atque eas auiculas quæ binis superbiunt cordibus. In summa nihil deliciarum, nihil voluptatum non exhauriebat. Aranea pauperis casam ingressa, telas orditur quaquaversum parietes interpatent, retia suspendit. Orbiculari operi manibus, pedibusque incumbit. Reficit abrupta, perficit intercepta, & ut dicam breuiter, vacua dominatur in aula. Nullas insidias, nullius formidat insultus. Immo vero etiam iam scopis superior omnibus. Non multo post podagra araneam conuenit, delicias suas, foelicitatem, fortunas ampliter exornat. Aranea miris laudibus extollit imperium suum, ædificandi texendique libertatem. Placuit tandem hæc utriusque sententia, quorsumcunque proficiscerentur, podagram in diuitum domos, araneam in pauperum tuguria debere diuertere.

Morale.

Apologus hic tametsi ad usus varios accommodari queat, id tamen in primis declarat, alium alio loco fortunatorem esse. Præterea morborum domicilium esse diuitum aulas: ad ultimum nusquam libertatem maiorem, quam ubi diuitiarum minus.

A P O L O G U S E X M A N T V A N O

traductus.

304

Rusticus quidam ex malo, quam in proximo habebat agello, sapidissima quotannis legebat poma: hero lecta donabat urbano, qui illectus incredibili pomorum dulcedine, malum tandem ad se transtulit. Ea veterrima repente

exaruit, atque ibi poma pariter & malus periere. Quod quum patrifamiliâs nuntiaretur, Heu difficile est, inquit, annosam transplantare arborem. Satis superque fuerat, si frânos meæ nouissem imponere cupiditati, fructus ramo decerpere. Hanc fabulam sic Mantuanus, Rusticus ex malo dulcissima poma legebat, Vnde dare vrbano dona solebat hero.

Ast herus illectus frugum dulcedine, malum Transtulit in laribus proxima rura suis.

At quia malus erat senior, translata repente

Aruit, & proles cum genitrice obiit.

Heu male trâssertur senio quû induruit arbor,

Inquit herus: fuerat carpere poma satis.

Morale eiusdem.

Qui nimium sapiunt, atque inconcessa sequuntur,

Desipiunt: cohibet qui sua vota, sapit.

De opilione & agricola. 305

Puer editiore pratulo oues pascebat, atque per iocum terque quaterque lupum a desse clauitans, agricolas vndique exciebat. Illi sapius elusi, serio auxilium imploranti, dum non subueniunt, fiunt oues præda lupo.

Morale.

Si mentiri insueuerit quispiam, huic, si quando verû narrare occœperit, haud facile habebitur fides. Superiori apologo finitimus est ille apud Horatium de Plano scurra iocus,

Nec semel irrisus triuijs attollere curat

Fracto crure Planum, licet illi plurima manet

Lachryma, per sanctum iuratus dicat Osirim,

Credite, non ludo, crudeles tollite claudum.

Quare peregrinum, vicinia rauca reclamat.

De aquila & coruo.

306

Rupe editissima in agni tergum deuolat aquila. Videns id coruus, imitari, velut simius, gestit aquilam: in arietis vellus se demittit, demissus impeditur, impeditus comprehenditur, comprehensus proiecitur pueris.

Morale.

Non aliorū, sed sua se quisque virtute æstimet. Tuo te pede metire, inquit Horatius. Id velis, id tentes, quod possis.

De leone & vulpecula.

307

Leo ægrotabat, viscebant animalia. Vna officium differente vulpecula, ad hanc legatū mittit leo cum epistola, quæ venire admoneat: gratissimam rem ægroto fore, eius vnus præsentiam. Nec quicquam periculi fore cur vulpecula metuat: leonem enim primum quidem amicissimum esse vulpeculæ, ideoque percipere eius colloquium. Deinde ægrotū esse & decumbere, vt etiam si, id quod nō erat, velit, nocere tamen non queat. Rescribit vulpecula, optare se vt leo conualeſcat, idque oraturam superos. Cæterum minime visuram: terreri enim se vestigiis. Quæ quidem vestigia cum omnia sint antro leonis aduersa, & nulla auersa, eam rem indicium esse, multum quidem animalium introisse, sed exisse nullum.

Horatius in primo epistolarum,
Olim quod vulpes ægroto cauta leoni
Respondit, referam, Quia me vestigia terrent,

Omnia te aduersū spectantia, nulla retrorsum.

Morale.

Caue fidem habeas verbis: ni caueris, sæpe tibi dabuntur verba. Capiēda est coniectura cum ex verbis, tum ex factis, & ex his illa sunt iudicanda.

De vulpecula & mustela. 308

Vulpecula, longa inedia tenuis, fortè per angustiores rimas in cumeram frumētī rep̄sit. In qua cum probè pasta fuit, dein rursus tentantem egredi, distentus impediit venter. Mustela lūctantem procul contemplata, tandem monet si exire cupiat, ad cauum macra redeat, quo macra intrarat.

Morale.

Videas complures in mediocritate letos esse, atque alacres, vacuos curis, expertes animi molestiis. Sin hi diuites facti fuerint, videbis eos mœstos incedere, nunquam frontem porrigere: plenos curis, animi molestiis obrutos. Hanc fabellam sic Horatius canit libro primo epistolarum, Fortè per angustam tenuis vulpecula rimam Rep̄serat in cumeram frumenti, pastaque rursus Ire foras pleno tendebat corpore frustra. Cui mustela procul, Si vis, ait, effugere isthinc, Macra cauum repetas arctum, quem macra subisti.

De equo & ceruo. 309

Equus gerebat bellū cum ceruo. Pulsus tandem è pascuis implorabat opem humanā. Redit cum homine, descendit in campum, victus antea, iam fit victor. Sed tamen hoste victo, & sub iugum misso, ipse victor necesse est seruiat homini. Equitem fert dorso, & frænum ore.

Morale.

Dimicant multi cōtra paupertatem. Qua per fortunam & industriam victa, sæpe victoris, interit libertas. Domini

quidem & victores paupertatis, seruire incipiunt diuitiis,
anguntur auaritiæ flagris, parsimoniæ cohibentur frænis:
nec quærendi tenent modum, nec iusto quidem auaritiæ sup-
plicio, partis rebus audet vti. Horatius de hac fabella libro
primo epistolarum,

Ceruus equum pugna melior communibus herbis
Pellebat, donec minor in certamine longo
Implorauit opes hominis, frænumque recepit.
Sed postquam violens victor discessit ab hoste,
Non equitem dorso, non frænum reppulit ore.
Sic qui pauperiem veritus, potiore metallis
Libertate caret, dominum vehet improbus, atque
Seruiet æternum, qui paruo nesciet vti.

FABVLARVM AESOPI
cûsq; adiunctarum finis.

Aniani fabulæ

QVATVOR, HADRIANO Barlando interprete.

De quercu & arundine. 310

Astus olim atque adeò insolentiæ plena quercus, arundinem aggressa est, Si nunc, inquiens, pectus animosum tibi, procede agetum ad pugnâ, vt noster duarum euentus ostendat, vtra viribus præstet. Arundo, quercus cantum, exultationem, fortitudinisque iactationem vanam nihil mirata, sic respondit, Certamē nunc abnuo, nec meæ fortis me piget. Nam etsi in omnem partem mobilis, tempestates tamen peruinco sonoras: tu, si semel vasto rex AEolus antro luctantes emiserrit ventos, cōcides, & mihi tum rideberis.

Morale.

Declarat hæc fabella, non eos semper fortissimos esse, qui nulla etiam laceßiti iniuria, alijs insultant.

De piscatore & pisciculo. 311

Piscator iacto in aquam hamo, cibus illito, pisciculum eduxit. Orat obsecratque captiuus, se minutulum vti abire sinat & adolefcere, vt postea maiore potiatur. Piscator, Ego, inquit, spem pretio non emo: quippe qui eo fuerim ingenio semper, vt quicquid possem, mal-

lem auferre potius in præsentia.

Morale.

Hæc nos monet fabella, ne certa vnquam incertorum spe vnguibus amittamus. Quid enim stultius (vt est apud Ciceronem) quam incerta pro certis habere?

De formica & cicada. 312

Appetente hyeme frumentum in areolam ad Solem trahebat formica. videt id cicada: accurrit, rogitat granum. Formica, Cur non, inquit, & tu meo exemplo æstate trahis quodcunque potes, atque addis aceruo? Respondet illa, sibi id temporis cantando transigi. Ridens formica, Si, ait, æstate cantitare soles, merito nunc esuris.

Morale.

Monemur hac fabula, dum adhuc robur corporis adest, querere ea, quibus imbecilla sustentetur senectus. Per hyemem, senectutem intellige. Per æstatem, adolescentiam & florem illum ætatis.

De leone & tauro. 313

Leonem fugitabat taurus, in hircum incidit: is cornu & caperata minitabantur fronte. Ad quem plenus iræ taurus, Non tua, inquit, in rugas contracta frons me territat, sed immanem metuo leonem, qui nisi tergo hæret meo, iam scires non ita paruum rem esse pugnare cum tauro, & nostro sequi de vulnere sanguinem.

Morale.

Calamitosis non est addenda calamitas. Sat miser est, qui semel est miser.

ANIANI FABVLAE TRIGINTA octo, Guilermo Hermannno diui Augustini ordinis canonico interprete.

De nutrice & lupo.

314

Nutrix minatur puerum plorantem, ni taceat, dari lupo. Lupus id fortè audit : spe cibi manet ad fores. Puer tandem flescit obrepente somno. Regreditur lupo in syluam ieiunus & inanis. Lupa ubi sit præda sciscitatur. Gembūdus ille, Verba, inquit, mihi data sunt: puerum plorantem se abiicere minabatur nutrix, at fefellit.

Morale.

Fœminæ non est habenda fides.

De testudine & aquila.

315

Cœperat testudinem tædiū reptandi. Siquis eā in cælū tolleret, pollicetur baccas maris rubri. Sustollit eam aquila: poscit præmium. Nō habentē fodit vnguibus. Ita testudo, quæ concupiit videre astra, in astris vitam reliquit.

Morale.

Tua sorte sis cōtentus. Fuere nōnulli qui si mansissent humiles, poterant esse ruti: facti sublimes, inciderūt in pericula.

De cancris matre & filia.

316

Cancrū retrogradū monet mater antrorsū vt eat. filius respōdet, Mater inquit, I præ, sequar.

Morale.

Nullum reprehenderis vitij, cuius ipse queas reprehendi.

De sole & aquilone.

317

Sol & ventus Aquilo certant, vter sit fortior.

O.i.

Conuentum est experiri vires in viatorem, vt palmam ferat, qui excusserit manticam, Boreas horrifono nimbo viatorem aggreditur, ac ille non desistit amictum gradiendo duplicans. Adsunt vices solis, qui nimbo paulatim euicto, emolitur radios. Incipit viator aestuare, sudare, anhelare. Tandem progredi nequiens, captat frigus opacum: atque sub frondoso nemore abiecta mantica, resedit: ita soli contigit victoria.

Morale.

Quicum certes, etiam atque etiam vide. Nam etsi tu fortis es, est forsitan alius te fortior. Aut si non fortior, certe callidior, vt consilio suo tuum vincat robur.

De asino.

318

Asinus venit in syluā, offendit exuias leonis. quibus indutus, redit in pascua, greges armentaque territat & fugat. Venit qui perdiderrat, quæritat suum asinū. Asinus viso hero accurrit, imò cum rugitu suo incurrit. At herus prehensis quæ extabant auriculis, Alios licet, inquit, fallas, ego te aselle mi probe noui.

Morale.

Quod non es, nec te esse simules. Non doctum, cum sis indoctus: non diuitem, non nobilem, cum sis pauper & ignobilis, te iactes. Vero enim comperto rideberis.

De rana & vulpe.

319

Rana egressa paludem, in syluis apud feras medicinam profitetur. Ait se nec Hippocrati, nec Galeno cedere. Cæteris habentibus fidem illusit vulpes. An hæc, inquit, medicinæ habe-

bitur perita, cui sic pallet os? Quin cūret scipsam. Sic illudit vulpes. Est enim ranæ os cæru
leo colore.

Morale.

Stultitia est profiteri quod nescias, & ridiculum.

De cane mordaci.

320

Canis subinde homines mordenti, vt sibi quisque caueret, alligauit dominus nolam. Canis ratus virtuti suæ tributum decus, suos populares despicit. Accedit ad hunc, canum aliquis iam ætate, atque authoritate grauis, monens eum ne erret. Nam ista, inquit, nola data est tibi in dedecus, non in decus.

Morale.

Gloriosus interdū sibi ducit laudi, quod ipsi est vituperio.

De camelo.

321

Camelus sui poenitens, querebatur tauros insignes ire geminis cornibus, se inermem obiectum cæteris animalibus. Orat Iouem donari sibi cornua. Ridet Iuppiter stultitiam cameli: nec modo votum negat, verum & auriculas bestię decurtat.

Morale.

Sit quisque fortuna contentus sua. Etenim multi fortunā sequuti meliorem, incurrere peiorem.

De duobus amicis & vrsō.

322

Duo amici faciunt iter. Occurrit in itinere vrsus. Vnus arbore conscensa, pericula euitat: alter, quum spes fugæ non esset, collidit se humi. Accedit belua, contrectat iacentem, os explorat & aures. Homine spiritum continente

O.ii.

ac motū, vrsus qui mortuis parcit, ratus cadauer esse, innocuus discedit. Percunctanti postea socio, quidnam bestia dixisset iacenti in aurem, hoc monuisse ait, Ne vnquam cum illiusmodi amicis iter faceret.

Morale.

Rara avis in terris, nigròque simillima cygno
Fides est.

Verum amicum res aduersæ & pericula monstrant.

De equite caluo.

323

Eques caluus illigarat pileo comam fictitiā. Venit in campum acri spirante borea: ac dum male obseruat capillatum galerum, subito apparet caluities. Tollit cachinnum corona, necnon & ipse ridet, Quid noui est, inquit, auolare capillos alienos, quum olim defluerint qui fuerant mei?

Morale.

Belle fecit eques qui non est indignatus, sed cum ridentibus risit. Socrates vero cum accepisset in foro alapam, hoc modo respondit, Molestū esse nescire homines, quando debeant prodire cum galea.

De duabus ollis.

324

Duæ ollæ steterē in ripa: altera erat lutea, altera ærea: vtrunque tulit vis fluuii. Luteæ collisionem metuenti, respondet ærea, nequid timeat. sese enim ne collidantur satis curaturam. Tum altera, Seu me, inquit, tecum: seu te mecum flumen colliserit, cum meo vtrūque fiet periculo. Quare certum est à te separari.

Morale.

Satiusest viuere cum socio pari, quàm cum potentiori.

A potentiori enim potest esse periculum tibi, non illi à te.

De rustico & fortuna. 325

Rusticus cum araret, offendebat in sulcis thesaurum : gratias agit telluri, quæ hunc dedisset. Fortuna videns nihil honoris haberi sibi, ita est secū loquuta, Thesauro reperto stolidus mihi non est gratus : at eo ipso thesauro postea amisso, me primam omnium votis & clamore sollicitabit.

Morale.

Beneficio accepto, grati sumus bene de nobis merenti. Ingratitudo enim digna est etiam beneficio, quod iam acceperit, priuari.

De tauro & capro. 326

Fugit leonē taurus: venit ad spelūcam, quærens latibulum. Intranti occurrit cornibus, qui intus erat caper. Tum his verbis bos emugit, Tu quidem cornibus tuis meam excipis fugam. verum si abierit quem fugio, quantum à viribus tauri distet caper, tum senties.

Morale.

Qui nescit miseris esse succurrendum, aut certe non nocendum, caper est. Quisquis enim à miserorum iniuria non tēperauerit, si (vt est fortuna mutabilis) miseris redierit felicitas, nimirum nocuisse miseris eum poenitebit.

De simia & eius prole. 327

Omnes animantes suo conspectui Iuppiter adesse iusserat, cuiusnam soboles esset pulcherrima iudicaturus. Properant feræ, aduolant aues, nec non ad id certamē adnatant pisces. Omniū postrema festinat simia, trahēs secum suam

O.iii.

prolem. Cuius quidem prolis foedas nates cunctis ridentibus, sic inquit, Maneat, cui fauerit Iuppiter, victoria. Meo tamen iudicio, hic meus natus est bellus, & omnium natis iure præferendus. Hoc dicto subrisit & Iuppiter.

Morale.

Et nos & nostra nobis placent. Sed de nobis & de nostris factis, aliorum sit iudicium: ne si ipsi iudicemus, cum similia rideamur.

De pauone & grue. 328

Pauo & grus vnâ cœnât. Pauo se iactat, caudam ostentat, gruem contemnit. Grus fatetur pauonem formosis esse pennis: se tamen dum vix tectis superuolat pauo, animoso volatu penetrare nubes.

Morale.

Nemo alterum contempserit. Sua cuique dos, sua cuique est virtus. Qui tua virtute caret, forsan habet qua careas tu.

De quercu & arundine. 329

Validiore Noto effracta quercus, in flumen præcipitat. Dùmque fluitat, hæret forte ramis suis in arundine: miratur arundinem in tanto turbine stare incolumem. Hæc respondet, cedendo & declinando se esse tutam, inclinare ad Notû, ad Boream, ad omnē flatum. Nec mirum esse quòd quercus exciderit, quæ non cedere, sed resistere concupiuit.

Morale.

Potentiori ne resistas, sed hûc cedendo & ferendo vincas. Quod pulchre docet facundissimus poetarum Virgilius, Nate dea, quò fata trahunt retrahuntque, sequamur.

Quicquid erit, superanda omnis fortuna ferendo est.

De tigride & vulpe. 330

Venator iaculis agitabat feras. Tigris iubet omnes feras abstinere, sese vnam ait bellū confecturam. Pergit venator iaculari, tigris oppidō sauciatur. Fugientem ē prælio, telūque extrahētem, percunctatur vulpes, quisnam valentem beluam tam valde vulnerasset. Respondit se authorem vulneris haud nosse: verum ex vulneris magnitudine capere se coniecturam, aliquem fuisse virum.

Morale.

Fortes plerunque sunt temerarij, & ars vim, ingenij, fortitudinem superat.

De tauris & leone. 331

Quatuor fuere tauri, quibus placuit comune ipsorum esse salutem, & comune periculū. Videt leo simul pascentes: etsi esurit, tamen cōiunctos aggredi metuit. Primū dat operā verbis fallacibus segregare, tum segregatos laniat.

Morale.

Concordia nihil est firmitus, discordia etiam fortes reddit imbecilles.

De abiete & dumo. 332

Fertur olim abies despiciere dumos, iactitat se proceram esse, locari in ædibus, cum velo stare in nauibus: dumos autem humiles, viles, nulli vsui idoneos. Quorum quidē tale fuit responsum, Tu sane abies tuis gloriare bonis, vt nostris insultes malis. Verum nec tua refers mala, & nostra præteris bona. Cum tu sōnanti

O.iii.

de truncare securi, quam velles tum nobis, qui securi sumus, esse te similem.

Morale.

Et summæ fortunæ suæ insunt mala, & humili fortunæ suæ bona. Vt nil aliud nunc dicā, hæc secura est, ac tuta. illa nec extra metū est, nec caret periculo. Horatius canit in lyricis,
-Celsæ grauiore casu-

Decidunt turres, feriuntque summos

Fulgura montes.

De piscatore & pisciculo.

333

Subductus hamo pisciculus, orat piscatorem se dimitti. Ait modo se à matre fusiū, atque mēsam, cum adhuc minutus sit, nō multū iuuare. Si dimittat, postea grandē vltro ad hamū eius rediturū. Piscator negat se dimittere prædā certā, licet exiguā. Quid habeā, inquit, scio: quid sim habiturus nescio. Ego spē pretio non emo.

Morale.

Certum præstat incerto, præsens futuro: etsi nonnūquam exile commodum omissum attulit magnum.

De alite & pullis eius.

334

Ales positos in segete pullos monet, vt dum ipsa abest, diligenter attendant, si fiat sermo de occatione. Redeunti ē pastu matri pulli anxii, narrant dominum agri operam illam mādasse vicinis. Respondet nihil esse periculi. Item alio die trepidi aiunt, rogatos ad metendum esse amicos. Iterum iubet illa vt sint securi. Tertiō vt audiuit ipsum dominum cum filio statuisse postero mane cum falce messem intrare, iam, inquit, tēpus est vt fugiamus. Vicinos & ami-

eos non timui, quia non vêturos sciui. Timeo dominum: illi enim res est cordi.

Morale.

Secordes alienis in rebus plerique sumus. Quod siquid recte curatum velis, alteri ne mandes, sed cures ipse.

De avaro & inuido.

335

Duo homines orabant Iouem, cupidus & inuidus. Mittitur à Ioue Apollo, per hunc, vt eorum votis satisfiat. Dat hic vtrique optandi liberam facultatem ac conditione: vt quodcūque petisset alter, id ipsum alter acciperet duplicatum. Hæret diu cupidus, cum nihil putat fore satis. Petit tandem non pauca. Et duplum accipit socius. Porro inuidus hoc petit, vt ipse vno priuetur oculorum, lætus sociū mulctandum esse vtroque.

Morale.

Auaritiā quid possit satiare? Inuidiā vero demētius est nihil. Quæ dūmodo noceat alteri, sibi met imprecatur malū.

De leone & capella.

336

Vidit leo pendere dumosa de rupe capellam. Suadet descendere, vt in campo thymum, salicēque carpat. Recusat capella descendere: verba quidem eius haud sane mala, sed mētem esse plenam doli reclamans.

Morale.

Cogita quis quid suadeat. Multi suadent vtilia, non tibi, sed sibi.

De cornice & vrna.

337

Sitibunda cornix reperit vrnā aquæ. Sed erat vrna profundior, quā vt posset à corni-

ce aqua cōtingi. Conantur effundere urnā, nec valet. Tū lectos ex harena scrupulos iniecit. Hoc modo aqua leuatur, & cornix bibit.

Morale.

Interdum id, quod non potes efficere vi, efficies prudentia & consilio.

De leone & venatore. 338

Litigat leo cum venatore: suam præfert fortitudinem hominis fortitudini. Post longa iurgia, venator ducit leonem ad Mausoleum, in quo sculptus erat leo, caput deponens in gremiū viri. Negat fera id satis esse indicii: homines enim sculperet quod vellent, ait: quod si & leones forent artifices, iam virum sculptum iri sub pedibus leonis.

Morale.

Quisque quoad potest, & dicit & facit, quod suæ parti & causæ putet prodesse.

De puero & fure. 339

Sedebat puer flens ad puteum. Fur rogat causam flendi. Puer dicit, rupto fune, incidisse in aquas urnam auri. Homo exiit se, insilit in puteum, quærit. Vase non inuento, cōscendit, atque ibi nec puerū nec suam inuenit tunicam. Puer quippe sublata tunica fugerat.

Morale.

Falluntur interdum qui fallere solent.

De rustico & iuuenco. 340

Erat rustico iuuenus, vinculi omnis iugique impatiens. Homo astutus, bestię refecat cornua: cornibus enim petebat. Tum iungit

non currui, sed aratro: ne, ut solebat, herum pul-
saret calcibus. Stiuam ipse tenet, gaudens indu-
stria effecisse, ut iam foret tutus & à cornibus
& ab ungulis. Sed quid euenit? Taurus subin-
de resistens, spargendo pedibus, os caputque ru-
stici opplet harena.

Morale.

Sunt nonnulli sic intractabiles, ut nulla queant arte, nullo
consilio tractari.

De satyro & viatore.

341

Satyrus, qui deus nemorū olim est habitus,
viatorem niue obrutum, atque algore enectum
miseratus, ducit in antrū suum, fouet igni. Spi-
rantem autem in manus percunctatur causam.
Qui respōdens, Ut calefiant, inquit. Postea cū
accumberent, sufflat viator in polenta. Quod
cur faceret interrogatus, Ut frigescat, inquit.
Tū continuo satyrus viatorem eiiciens, Nolo,
inquit, in meo sit antro cui tā diuersum est os.

Morale.

Caue sit in tuo conuictu homo duplici ore, quique in ser-
mone est Proteus.

De apro & rustico.

342

Apro vastanti segetes rusticus præcidit auri-
culam. Iterum deprehēso præcidit alteram. Et
tūc quoque redeuntem capit: captum portat
in urbem destinatū lauitiæ sui patroni. Secta
iam in conuiuio belua nusquam apparet cor.
Excandescēte hero, & flagitante cocos, villi-
cus respondet, Patrone, inquit, non est mirum

non apparere cor : nam credo stultum aprum
nunquam cor habuisse. Nam si cor habuisset,
nunquam in poenam suam ad meas segetes to-
ties rediisset. Sic rusticus, At omnes conuiua
emori risu, cachinnari de stultitia rustici.

Morale.

Multorum hominum tam est excors vita, vt an cor habe-
ant possis ambigere.

De tauro & mure.

343

Mus tauri pedem momorderat, fugiens in
antrum suum. Taurus vibrat cornua, quærit ho-
stem, nusquam videt, irridet eum mus. Quia,
inquit, robustus es ac vastus, non idcirco quem-
uis contempseris. Nunc te, & quidem gratis,
læsit exiguus mus.

Morale.

Tritum est illud verbum, quod significantius nostrate lin-
gua dixerim, Nyemant sal verachthen sinen vyant. Latine
sic, Nemo suum hostem floccipendat.

De rustico & Hercule.

344

Rustici currus hæret in profundo luto. Non
supinus deum Hercule implorat. Intonat vox e
cælo, Inepte, inquit, flagella equos, & ipse an-
nifere rotis, atque tum Herculem vocato: tum
enim aderit Hercules vocatus.

Morale.

Nil profunt otiosa vota, quæ sanè deus non audit. Iuua te-
met, inquit, ipse tum iuuabit te deus.

De anser.

345

Fuit anser qui ponebat oua aurea, singulis
diebus singula. dominus vt subito fiat diues,

anferem iugulat, sperans intus latere gazā. Sed
antere inuēto vacuo, stupet miser, anxieq; de-
hinc suspirat, ac plāgit, & rem & spem perisse.

Morale.

Moderanda sunt vota. Curandum est ne vel præproperi
simus, vel nimij. Nam & festinātia nocet, & qui plura quā
debet querit, interdum acquirit nihil.

De cicada & formica. 346

Cum per æstatem cicada cantat, formica suā
exercet messem, trahit in antrum grana, repo-
nens in hyemem. Sæuiente bruma, famelica ci-
cada venit ad formicam, mēdicat victum. Re-
nuit formica, dictitans, sese dum illa cantabat,
laborasse.

Morale.

Qui segnis est in iuuenta, egebit in senecta: & qui nō par-
cit, olim mendicabit.

De simia & duobus eius natis. 347

Simia, vt ferunt, cum peperit gemellos, alte-
rum diligit, alterum negligit. Erat puerpera cū
gemellis. Atque cum incidisset terror, vitatu-
ra periculum, dilectumprehendit vlnis: quem
dum præceps fugitat, collidit petræ atque ene-
cat: neglectus autem qui in hirsuto hæserat ter-
go fugientis, mansit incolumis.

Morale.

Solet euenire, vt ipsi parentes filio, quē tenerè amant, præ-
nimia indulgentia sint mali occasio, & periculi, eo quem
minus amarunt, præstante se scirenum ac probum.

De boue & iuuenco. 348

Bos iam grandis æuo quotidie trahebat ara-

trum. Iuuenius laboris expers, vicinis exultat
in pascuis, ac tādē insultat fortunæ senioris.
Iactat se iugi, ac vinculi inscium, se liberum, se
otiosum: illi attritū esse labore collum. Deniq;
se glabrū ac nitidum, illum esse hirtū ac squa-
lidum. Senior tum quidem nihil contrā. Sed
breui pōst tempore videt hunc insultorem du-
ci ad aras, ac tum hisce verbis affatur, Quò tua
mollis vita peruenit? securū istud otium red-
iit ad securim. Iam saltem (vt opinor) potius
suades mihi laborem, qui metuetur, quàm otium
quod nunc te traxit ad necem.

Morale.

Ad vitam recte gerēdam opus est labore ac vigilantia. Se-
cors autem & voluptati deditus, suarum rerum, quæ nolet,
fortietur exitum.

De cane & leone.

349

Occurrit canis leoni, iocatur, Quid tu miser
exhaustus inedia percurris syluas & deuia? Me
specta pinguem ac nitidum, atque hæc non la-
bore consequor, sed otio. Tum leo, Habes tu
quidem tuas epulas, sed habes stolidè etiā vin-
cula. Tu seruus esto, qui seruire potes: equidem
sum liber, nec seruire volo.

Morale.

Pulchre respōdit leo. Quibuslibet enim rebus potior est
libertas.

De piscibus.

350

Piscis fluuiialis vi fluminis correptus est in
mare. Vbi suam efferens nobilitatē, omne ma-
rinum genus vilipendebat. Non tulit hoc Pho

ca, sed ait tūc fore iudicium nobilitatis, si cum Phoca captus portetur ad forum : se emptū iri à nobilibus, illum autem à plebe.

Morale.

Multi sic capti libidine gloriæ, vt sese ipsi prædicent & iactent: sed laus sui oris non datur homini laudi, at excipitur cum auditorum risu.

De pardo & vulpecula. 351

Pardus, cui pictum est etiam tergum, cæteris feris etiam leonibus despectis, intumescibat. Accedit ad hunc vulpecula, suadet non superbire, dicens, illi quidem speciosam esse pellem, sibi verò speciosam esse mentem.

Morale.

Discrimen est bonorū & ordo. Bona corporis præstāt bonis fortunæ. Vtrisque illis animi bona præferantur oportet.

Laurentii Abste

M I I V I R I E L E G A N -
tissimi, & amœni ingenii Fabu-
læ elegantiss. nuper per clarissi-
mum poetam & philosophū Gar-
getium emaculatæ.

DOMITIVS PALLADIVS SOVRA-
nus Pollioni Vadio sacerdoti venerando
S. P. D.

Am pridem tuo sermoni de Abstemio frequenti li-
I teratorum confessu Pollio venerande, non inuitus
interfui, cum minime prætextatis (vt ita dicam) lau-
dibus hominem celebrares, adeoque in arcē euasisti, vt nemo
sane (mea sententia) eum cumulatius laudare potuerit. Mox
inde secedens, hæc omnia mecum diu volutabam, vnde tan-
ta conflueret laudationis abundantia, vnde tanta non vulga-
ris obseruatio emanaret, vnde denique amicitia adeo perfe-
cta exoriretur: proculdubio non aliunde mecū tandem col-
legi, quàm ex præclaræ eius virtutis nomine proficisci, cui
quidem vis magna & præpotens est. Quamobrem non pos-
sum profecto nō suspicere ingenium tuum amabile, tuum-
que animum virtutibus fultum diligentius non admirari,
quī neque ambitione, neque inuidia, neque aliquo alio liuo-
re deuincitur. Siquidē omnes, quas meretur Abstemius no-
ster, laudes, non transis silentio, imò ad eas ipsas cumulan-
das, ob eius incredibilem eloquentiam, singularemque do-
ctrinam vltro accedis, idque haud ab re, cum pater omnium
elegantiarum, atque idem leporum omnium merito sit, &
habeatur. Et vt hæc clariora luce non officij gratia, aut teme-
re dicantur, quotidie quemadmodum aliqua eius laborum

monimenta existere videmus, quæ vndique perfecta verborum cōcinnitate, perspicacissimisque sententijs scatēt nam modo dicam de hoc apologorum libello nuper impresso, in quo perspicua, ac insignis eius ingenij amœnitas, non absq; laude maxima redundare videtur. Quare non vereor, vt is remisso cuiuscunque animo pessum eat, Abstemioque (absit inuidia verbo) omnium quàm iucundissimo detrahatur. Cui & te & me & tanti nominis celebritatem, nulla vnquā in re defuturos esse liquido constabit. Vale.

L A V R E N T I V S A B S T E M I V S

Octauiano Vbaldino comiti Mercatelli

S. P. D.

Editurus hunc apologorum libellum, quem de numero fabularum hecatomithium nuncupauī, multum diūq; dubitauī Octauiane princeps inclyte, tuōne eum nomini potissimum dedicarem. Nam cum tuam in me non sine plurimis beneficijs perspicerem beneuolentiam, nō aliquid mearum vigiliarum tibi deuouere, ingratis hominis esse videbatur. Rursus cum tuorum in me officiorum numerum, diuināq; virtutes tuas mecum ipse reuoluerem, indignum tantis meritis, tantāque sapientia munusculum hoc esse cernebam. Hanc tandem dubitationem meam amouit humanitas & prudentia tua, qua non tam res tibi dono datas, q̃ offerētium voluntatem soles inspicere. Addidit quoque mihi animum Guidus Vbaldus clarissimus dux, & princeps meus omni laude maior, qui opusculum meum de nonnullis locis obscuris, superiori anno ei dedicatū, vultu ita placido, & ferena fronte suscepit, vt sperare merito possem hoc tibi qualecunque fore non ingratum. Nō mediocriter etiam me incitarunt Georgius Emus pro Venetis hic agens legatus, non solum patricia nobilitate, verum etiam bonarū artium studijs clarus, & Carolus Verardus Cæsenas Archidiaconus Cæsena, & Alexandri Pōrificis maximi cubicularius, vir omni literarum genere præstans, necnon Renatus Melioratus, & Robertus Vrfus Ariminenses iuris consulti clarissimi: nec minus, qui humanitatis vacant studijs, eruditi. Hi enim aliique complures optimi harum rerum censores, cum hūc libellum legissent, multis me verbis sunt ad editionem

P. i.

exhortati. Nō putavi igitur tam humano principi hoc munus ingratum futurum, quod tot eruditis antē viris placuisse cognoueram. Accipe igitur hoc quicquid est libelli, ab Abstemio tuo, cuius mētem animūmq; si penitus posses inspicere, in hac tenui re, magnū tibi iudicares oblatum. Nequis autē inutilem, & inanem hunc meum scribēdi laborē existimaret, præfatiūculā quandā præponendā cēfui, qua intelligeretur doctos etiam & claros viros in magnis rebus huiusmodi fabellis, nō voluptatis tantū, verū etiam vtilitatis gratia delectatos. Sedulo dedimus operā, vt seria potius quā iocos saperent, vnde ridiculas multas, quæ inter componendum sese mihi offerebant, cōsulto præterij, quia nimis lasciuæ, & tanti principis grauiamine mihi videbātur indignæ. Non tamen ita agrestis esse volui, quin eas aliqua vrbānitate aspergerem, maxime ad principem scribens, cum principes curarum mole pressī, soleant interdum recreādi animi gratia, iocos appetere. Vale.

EIVSDEM ABSTEMII PROOEMIUM.

Cogitanti mihi varia scriptorum genera, qui vt humanæ vitæ prodesse, cogitationes suas literarū mandauere memoria: qui apologos scripsere, non postremo loco digni esse videntur. Non enim modo mortalium animos incredibili quadam afficiūt voluptate, verū etiam ad res honestas, vtilēque peragendas suis fabellis, magis quā philosophi suis præceptis, alliciunt. Nam ita in legētium animos quadam iucunditate penetrant, & quibusdam similitudinibus quæ maxime ad commouendos animos valent, quid vitandum faciendūque sic ostendunt, vt omnes etiam inuiti, illis assentire cogātur. Sensus enim audiēdi fastidiosissimus, res etiam vtilēs honestasque haud facile admittit, ni fuerint aliqua vrbānitate conditæ. Testis quidam orator Atheniensis, qui ad Athenienses verba faciens, cum eos minus attentos videret, rogauit vt saltem fabulam audire dignarentur. Quo impetrato, Ceres, inquit, & Hirundo, & Anguilla simul iter facientes, ad quendam fluuium peruenierunt. Hirundo quidem superuolauit: Anguilla autem amnem transiit. Quod cum dixisset, obticuit. Interrogantibus autem illis quid Ceres egisset, Vobis, inquit, dea vestra succēssit, qui eos, qui vobis vtilia suadēt, audire nolētes, tam attētis aurbus confabulantes auditis. Quantā vim apologi habent ad

animos commouēdos, quum multis possem, tribus ero cō-
 tentus exemplis, ostendere. Samijs rectorem populi morti
 addicere volentibus, AEsopus hac fabella dissuasit, dicens,
 Vulpem quandā fluuium transeuntem, in lacunam fuisse
 propulsam. Vnde quū exire non posset, tenaci limo retenta,
 mulcarū affligebatur aculeis. Quod Herinaceus cōspicatus,
 misericordia motus est, interrogauitq; an vellet vt ab ea mu-
 scas abigeret. At illa abnuuit, dicens, Hæ meo sanguine iam
 plenæ, paruā mihi possunt inferre molestiam: si autem has
 abegeris, aliæ famelicæ superueniēt, quæ quicquid mihi su-
 perest sanguinis, exhauriēt. Ita ô viri Samij vobis eueniet.
 si enim hūc rectorem vestrum iam locupletem occideritis,
 alios eligatis necesse est, qui dum se opibus volēt implere,
 quicquid hic vobis reliquit, eripiēt. His verbis moti Samij,
 ab incepto destitere. Hac ratione adduct⁹ Tiberius Cæsar,
 diurnos magistratus dabat: vnde, vt refert Iosephus, sub
 eo, per viginti annorum spatia, per duos tantum præsides,
 Gratum scilicet & Pilatum, est gubernata Iudæa. Non par-
 cit populis regnū breue, vt inquit Statius. Himerenses Pha-
 laridem Agrigentinarum tyrannum ducem exercitus sui
 eligere volentes, Stefichorus poeta hoc apologo deterruit,
 Equus, dicens, solus pascebat in prato. Adueniente autē cer-
 uo, & pascua corrumpente, consuluit hominem qua posset
 illum arte punire. Cui homo, Si frænū, inquit, acceperis, &
 me armatum dorsum tuum ascendere permiseris. Quum
 huic consilio esset obsequutus, ceruum quidem hominis au-
 xilio victor abegit. sed non amplius hominem dorso, non
 frænū depulit ore. Ita inquit Stefichorus, Viri Himerenses
 vobis eueniet, si Phalaridē ducem efficietis. Hostes quidem
 vestros punietis, sed huic tyrāno perpetuo seruietis. Quib⁹
 verbis territi Himerēses, huiusmodi ducis eligendi consiliū
 deposuere. Quum populus Romanus ab senatu secessisset,
 quod tributū & militiā toleraret: nec vllō pacto reduci pos-
 set, nōne Agrippa Menenius eum hoc apologo reuocauit
 Olim, inquit, Quirites, humani artus ventrem otiosum
 & desidem intuentes, ab eo discordarunt, nec amplius illi cū-
 bum ministrare decreuerunt. Sed quum ipsi quoq; alimen-
 ta illi denegando, quæ per omnia membra deferuntur, de-
 ficerent, cum eo in gratiam redierunt. Eodem, inquit, mo-

do, Senatus & populus, quasi venter & membra alterum alterius auxilio indigent: & ut discordia intereunt, ita concordia valent. Qua fabula populus reuocatus, cum senatu in gratiam redijt. Non immerito igitur non solum Græci & Latini poætæ, ut Hesiodus & Horatius, huiusmodi fabulas suis operibus inseruerunt, verum etiam maximi & celeberrimi philosophi, ut Plato, Aristoteles, Plutarchus, & multi alij eas plurimum commendauerunt, & ad institutionem moralis & ciuilis vitæ non minimū facere arbitrati sunt. Quocirca Omnibonus Leisicenus, & Laurentius Valla, viri ætatis nostræ doctissimi, paucos AEsopi apologos è Græco in Latinū vertere sibi laudi, cæteris vero voluptati & vtilitati fore non dubitarunt. Et iure quidem. Leguntur enim, & in doctissimorum virorum manibus quotidie versant. Non video igitur, cur has componendo fabulas laude fraudari debeam, quam cæteri Latini ex translatione consequuti sunt: nisi adeo inuidi sumus, ut Latinis licere non putemus, quod Græcis est cum summa omnium laude concessum.

De mure in cista nato.

352

Mus in cista natus, omnem fere ibi duxerat ætatem, nucibus pastus, quæ in ea seruari solebant. Dum autem circa oras cistæ ludens decidisset, quæreretque ascensum, reperit epulas lautissime paratas: quas quum gustare coepisset, Quam stultus, inquit, hætenus fui, qui toto in terrarum orbe nihil melius cistula mea esse credebam. Ecce quam suauioribus vescor hinc cibis.

Hæc fabula indicat, non patriam diligendam, si ignobilis sit, ut alia non adeamus loca, quum alibi beatiore esse possimus.

De rustico impetrante ut triticum absque aristis nasceretur.

353

Impetrauerat à Cerere rusticus quidam, ut triticum absque aristis nasceretur, ne metentium tri-

turantiumq; manus læderet: quod vbi inaruit,
à minutis auibus depastum est. Tum rusticus,
Quàm digna, inquit patior, qui parua cōmo-
ditatis causa emolumenta q̄ maxima perdidit?

Fabula indicat, parua incōmoda maiori vtilitate pēfāda.

De accipitre colūbam insequeñte. 354

Quum accipiter columbam præcipiti inse-
queretur volatu, villam quandam ingressus, à
rustico captus est: quem blande vt se dimitte-
ret obsecrabat, Non enim te læsi, dicēs. Cui ru-
sticus, Nec hæc, respondit, te læserat.

Fabula indicat merito puniri, qui innocentes lædere co-
nantur.

De aranea & hirundine. 355

Aranea in hirundinem exandescens, quæ
muscas, qui suus est cibus, capiebat, retia in fo-
ribus per quas volitare solebat, vt eam caperet,
suspenderat. Hirūdo vero aduolans, retia cum
textrice per aera portabat. Tunc aranea in aere
pendens, & sese iamiam perituram intelligens,
Quàm iuste hæc patior, dicebat, quæ minima
volatilia magno labore vix capiēs, credidi tam
magnas aues posse comprehendere.

Hac admonemur fabula, ne viribus maiora aggrediamur.

De rustico amnem transcunte. 356

Rusticus torrentem trásiturus, qui forte im-
bribus excreuerat, quærebat vadū. Et quum pri-
mum eam fluminis partē tentasset, quæ quie-
tior placidiórq; videbatur, reperit eam altiorē
quàm animo erat opinatus. Rursus ibi breuior-

P.iii.

rem tutioremq; adinuenit, vbi maiori aquarū strepitu fluuius decurrebat. Tunc secū, Quam tutius, inquit, clamoris aquis, quam quietis & silentibus vitam nostram credere possumus.

Hac admonemur fabula, vt minus verbosos & minaces, quam quietos extimescamus.

De columba & pica.

357

Columba interrogata à pica, quid eam induceret, vt in eodē semper loco nidificaret, quā eius pulli inde sibi semper surriperentur. Simplicitas, respondit.

Hac indicat fabula, facile esse viros probos sæpe decipi.

De cuculo & accipitre.

358

Irrisus ab accipitre cuculus, quod quum sibi & corpore par, & colore nō absimilis esset, præ angustia animi potius vermib⁹ terrenis, quam suauibus aliarū auium carnibus vesceretur: vidit paucis post diebus accipitrem à rustico, cuius columbas insectabatur, captū, ad metum cæterorum ex alta turre pendere. Cui cuculus, Quam melius tibi, inquit, amice fuisset vermes venari, quam alienas aues impetere.

Hæc fabula indicat, eorū vitam tutiorem esse, & magis probandā, qui suis rebus sine periculo cōtenti sunt, q̄ illorum, qui aliena appetentes, adeunt magnæ vitæ discrimina.

De asino & vitulo.

359

Asinus & vitulus in eodem pascentes prato, sonitu campanæ hostilem exercitum aduentare præsenferant. Tum vitulus, Fugiamus hinc ô sodalis, inquit, ne hostes nos captiuos abdu-

cant. Cui asinus, Fuge tu, inquit, quem hostes occidere & esse consueverunt. Asini nihil interest, cui vbiq; eadem ferendi oneris est proposita conditio.

Hæc fabula seruos admonet, ne dominos magnopere mutare formidēt, modo prioribus deteriores futuri non sint.

De vulpe & mulieribus gallinam edentibus. 360

Vulpes iuxta villam quādam transiens, conspexit cateruam mulierum, plurimas gallinas opipare assatas alto silentio comedentem: ad quas cōuersa, Qui clamores, inquit, & canum latratus contra me essent, si ego facerem quod vos facitis? Cui respondens quædam anus, Pessima animalium, inquit, nos quæ nostra sunt comedimus, tu vero aliena furaris.

Hæc fabula nos admonet, ne putemus nobis in aliena licere, quod proprijs dominis licet.

De caponibus pinguibus & macro. 361

Vir quidam cōplures capones in eodem orithobosco inclusos, largo nutricauerat cibo, qui pingues effecti sunt omnes præter vnum, quē vt macilentū irridebant fratres. Dominus nobiles hospites lauto & sumptuoso accepturus conuiuio, imperat coco, vt ex his interimat coquātque, quos pinguiore inuenerit. Hoc audientes corpulenti, sese afflictabant dicentes, Quanto præstitisset nos macilentos esse.

Hæc fabula in pauperum solamen conficta est, quorum vita tutior quā diuitum.

P.iiii.

De trabe & bobus eam trahētibus. 362

Trabs vīnea de bobus cōquerebatur dicēs,
Ingrati, ego multo tēpore meis vos frondibus
alui, vos verò me nutricem vestram per saxa &
luta trahitis. Cui boues, Gemitus, suspiriāq; no-
stra, & stimulus quo pungimur, te docere pos-
sunt, quòd te trahamus inuiti. Ignouit trabs.

Hæc nos docet fabula ne in eos excandescamus, qui non
sua sponte nos lædunt.

De arborib⁹ pulchris & deformib⁹. 363

Arbores complures in eodem creuerant lo-
co proceræ, rectæ, enodēsque, præter vnā hu-
mitem, paruam, nodosāque, quam vt defor-
mem pusillāq;, cæteræ ludibrio habere soli-
tæ erant. AEdificaturus domū loci dominus,
iubet omnes excidi, præter eam, quæ breuitate
& deformitate sua ædificium indecorum red-
ditura videbatur. Cæteris excisis, deformis hæc
secum dicebat, De te nō amplius querar natu-
ra, quòd me turpem genueris, quum formosis
tam magna videam imminere discrimina.

Hæc fabula nos admonet, ne doleamus nos natos esse de-
formes, quum multis formositas sæpe nocuerit.

De cygno in morte canente comprehen-
so à ciconia. 364

Cygnus moriens, interrogabatur à ciconia,
cur in morte, quā cætera animalia adeò exhor-
rēt, multo suauiores, quàm in omni vita emit-
teret sonos, quum potius mœstus esse deberet.
Cui cygnus, Quia, inquit, neque cibi quæren-

di cura amplius cruciabor, neque aucupum laqueos extimescam.

Hæc fabula nos admonet, ne mortem formidemus, quæ omnes vitæ præsentis miseriæ præciduntur.

De muliere virum morientem flente, & patre eam consolante. 365

Mulierem adhuc iuuenem, cuius vir animam agebat, parens consolabatur, dicens, Ne te afflictes, ne tantopere filia. Alium enim virum tibi inueni isto longe formosiores, qui prioris desiderium facile mitigabit. At mulier doloris impatiens, ut quæ maritum ardenti amore prosequeretur, non modo verba parentis non admittebat, sed intempestiuam alterius mariti mentionem accusabat. At ubi maritum defunctum videt, inter lachrymas & luctus parentem interrogat, an adsit iuuenis ille, quem sibi in virum dare velle se dixerat.

Fabula indicat, quam cito defunctorum maritorum amor ex vxorum animo excidere solet.

De muliere amatoris discessum flente. 366

Mulier impudica amatorem suum abeuntem, quem omnibus fere rebus spoliauerat, multis lachrymis prosequeretur. Interrogante autem eam vicina, cur ita inconsolabiliter fleret, Non discessum eius, sed pallium quod ei reliqui, fleo.

Hæc fabula indicat, non amatores, sed eorum bona à metetricibus amari.

De musca quæ quadrigis insidens, pul-
uerem se excitasse dicebat. 367

Quadrigæ in stadio currebant, quibus mu-
sca insidebat. Maximo autem puluere tum e-
quorum pedum cursu, tum rotarum voluta-
tione exorto, dicebat musca, Quàm magnam
vim pulueris excitaui.

Hæc fabella ad eos spectat, qui cum ignaui sint, alie-
nam tamen gloriam suis magnificis verbis in se transfer-
re conantur.

De anguilla conquerente quòd magis
quàm serpens infestaretur. 368

Anguilla interrogabat serpētem, quare cum
similes essent atque cognati, homines tamen
se potius, quàm illum insequerentur. Cui ser-
pens, Quia rarus, inquit, me lædit impune.

Fabula indicat, minus lædi solere, qui sese vlciscuntur.

De asino, simia, & talpa. 369

Conquerenti asino, quòd cornibus careret,
Simiæ vero, quòd cauda deesset, Tacete, inquit
talpa, cum me oculis captam esse videatis.

Hæc fabula ad eos pertinet, qui non sunt sua forte conten-
ti, qui si aliorum infortunia considerarent, æquiori animo
tolerarent sua.

De nautis sanctorum auxilium implo-
rantibus. 370

Nauta quidam in mari, subita & atra tempe-
state deprehensus, cæteris eius sociis diuerso-
rum auxilium implorātibus, Nescitis, inquit,
quid petatis. Antè enim quàm sancti isti ad
Deum pro nostra liberatione se conferant, hæc

imminēte procella obruemur. Ad Deum igitur confugiendum censeo, qui absque alterius adminiculo, à tantis malis nos poterit liberare. Inuocato igitur dei omnipotentis auxilio, ilico procella cessauit.

Fabula indicat, vbi potentioris auxilium haberi potest, ad imbecilliores non fugiendum.

De piscibus è sartagine in prunas desiliētibz.

371

Pisces adhuc viui in sartagine feruenti oleo coquebantur, quorum vnus, Fugiamus hinc fratres, inquit, ne pereamus. Tunc omnes pariter è sartagine exilientes, in ardentē prunas deciderunt. Maiori igitur dolore affecti, damnant consiliū quod ceperant, dicentes, Quāto atrociori nunc morte perimus!

Hæc nos admonet fabula, vt ita præsentia vitemus pericula, ne incidamus in grauiora.

De quadrupedibus societatem aduersus aues cū piscibus ineuntibus.

372

Quadrupedes cū bellum sibi ab auibus esset indictum, cum piscibus foedus inierunt, vt eorum auxilio, se ab auium furore tuerētur. Cum autem optata expectarent auxilia, pisces negāt per terram ad eos accedere posse.

Hæc nos admonet fabula, ne eos nobis socios faciamus, qui cum opus sit, nobis adesse non possint.

De legato auaro tubicines decipiente.

373

Quidam avarus pro patria legatus, in aliam

urbem profectus erat, cui tubicines præsto affuerunt, ut illius aures tubarum clangore, loculos autem suos pecunia implerent. Quibus ille renuntiari iubet, non esse nunc locum cantibus, se in summo luctu & moerore constitutum: matrem enim suam obiisse. Tubicines autem spe frustrati, & moesti abeunt. Amicus quidam legati audiens luctum, ad eum visendum consolandumque accedit, interrogatque quandiu mater eius obiisset. Quadraginta iam anni sunt, inquit. Tunc amicus intellecta legati strophæ, in risum effusus est.

Hæc fabula ad avaros facit, qui omni arte student conservare pecuniam.

De viro qui ad cardinalem nuper creatum gratulandi gratia accessit. 374

Vir quidam facetus admodum & urbanus, audiens amicum suum ad cardinalium, quos vocant, dignitatem assumptum, ad eum gratulandi gratia accessit. qui honore tumidus, amicum veterem agnoscere dissimulans, quisnam esset interrogabat. Cui ille, ut erat ad iocos promptus, Miseresco, inquit, tibi, cæterisque qui ad huiusmodi honores perveniunt. Quam primum enim dignitates eiusmodi estis assecuti, visum auditumque, & cæteros sensus ita amittitis, ut pristinos amicos amplius non cognoscatis.

Hæc fabula eos notat, qui in altum sublati, veteres despiciunt amicitias.

De iuvene senis curuitatē ridēte. 375

Iuuenis quidam conspīcatus senem in arcus
tensi similitudinem curuum, interrogauit an
sibi arcum vellet vendere. Cui ille, Et quid, in-
quit, est tibi opus pecuniam amittere? Si enim
ad meam perueneris ætatem, absque pecunia
arcum tibi natura concedet.

Hæc fabula indicat, minime irridenda vitia senilis ætatis,
quam nemo viuendo effugere potest.

De sene puellā in vxorē accipiēte. 376

Vir quidam imprudens exacto septuagesimo
vitæ anno puellam duxerat in vxorem,
qui ad id tempus in cœlibatu permāsisset. Cui
cum debitum soluere non posset, dicere sole-
bat, Quam male vitam meam disposui. Iuue-
ni enim mihi vxor deerat, nunc autem senex
desum vxori.

Hæc fabula innuit, omnia suo tempore peragenda.

De aquila & pica.

377

Pica aquilam rogabat, vt se inter suos fami-
liares & domesticos acciperet, quando id me-
reretur cū corporis pulchritudine, tum ad mā-
data peragēda linguæ volubilitate. Cui aquila,
Hoc facerem, respondit, ni vereretur, ne quæ in-
tra regulā fiunt, tua loquacitate cuncta efferres.

Hæc fabula monet, linguaces & garrulos domi non ha-
bendos.

De turdo amicitiam cum hirundine
incunte.

378

Gloriabatur turdus se amicitiam contraxif-

se cum hirūdine. Cui mater, Stultus es fili, inquit, si credis cum ea posse conuiuere, cū vterque vestrum diuersa soleat appetere loca. Tu enim frigidis, illa tepidis delectatur locis.

Hac monemur fabula, ne eos nobis faciamus amicos, quorum vita à nostra dissentit.

De rustico & mure.

379

Rusticus quidam erat admodum pauper, sed adeò facetus, vt ne calamitatis quidem tempore, natiui leporis obliuisceretur. Is cum villam suam, casu igne iniecto, ita ardentem videret, vt aliquo modo ignem extinguere posse diffideret, moestus spectabat incendium. Interim cernit murem quendam, qui villa egressus, periculum quàm ocysissime fugiebat. Oblitus dānorum rusticus cucurrit, & murem corripiens illum, in medium iecit incendium, dicens, Ingratum animal tempore foelicitatis mecum habitasti: nunc quia fortuna mutata est, villam meam deseruisti.

Fabula indicat, eos non esse veros amicos, qui aridente fortuna, à latere tuo non discedunt: turbata autem, præcipiti abeunt cursu.

De diuite quodam & seruo.

380

Vir erat diues, seruum habens tardi ingenii, quem regem stultorum solebat nuncupare. Ille his verbis sæpius irritatus, statuit hero par referre. Semel enim in herū conuersus, Vtinam, inquit, rex stultorum essem: in toto enim terrarum orbe, nullum meo latius esset imperiū,

& tu quoque meo subesses imperio.

Fabula indicat omnia plena esse stultorum.

De canibus vrbanis villaticū insequen-
tibus. 381

Canes complures vrbani, quendam villaticū præcipiti inseguebantur cursu, quandiu ille fugit, nec repugnare ausus est. At vbi in sequentes cōuersus subsistit, & dentes ipse quoque ostendere cœpit, omnes pariter substiterunt, nec aliquis vrbano illi propinquare audebat. Tunc imperator exercitus, qui ibi aderat, ad suos conuersus milites, Commilitones, inquit, hoc spectaculum nos admonet, ne fugiamus, cum præsentiora fugientibus, quàm repugnantibus videamus imminere pericula.

De anu dæmonem accusante. 382

Volunt homines vtplurimum quando sua culpa aliquid sibi acciderit aduersi, in fortunam vel in dæmonem culpam conferre, vt se crimine exuant, adeò omnes sibi indulgent. Hoc dæmon ægre ferens, cum videret anum quandam, arborem ascendentem, ex qua illam ruituram, & in se culpam collaturam præuiderat, accitis testibus dixit, Videte anum illam absque meo consilio arborem ascendentem, vnde eam casuram esse prospicio. Estote mihi testes, me ei non suasse, vt soleata illuc ascenderet. Mox anus cecidit: & cum interrogaretur cur soleata arborem ascendisset, Dæ-

*Ex h. d. gna
notum*

mon, inquit, me impulit. Tunc dæmon, addu-
ctis testibus, probauit id ab anu absque suo fa-
ctum esse consilio.

Fabula indicat, homines minime venia dignos, qui, cum
libere peccent, fortunam vel dæmonem accusant.

De testudine & ranis.

383

Testudo conspicata ranas, quæ eodem sta-
gno pascebantur, adeò leues agilisque, vt fa-
cile quolibet prosilirent, & longissime salta-
rent, naturam accusabat, quòd se tardum ani-
mal, & maximo impeditum onere procreas-
set, vt neque facile se mouere posset, & magna
assidue mole premeretur. At vbi vidit ranas an-
guillarum escam fieri, & cuiuscunque vel le-
uissimo ictui obnoxias, aliquantulum recrea-
ta dicebat, Quanto melius est onus, quo ad om-
nes ictus munita sum, ferre, quàm tot mortis
subire discrimina?

Hæc fabula indicat, ne ægre feramus dona naturæ, quæ
maiori nobis cōmodo sæpe sunt, q̃ nos intelligere valeam⁹.

De gliribus quercum eruere volenti-
bus.

384

Glires quercum arborem glandiferam den-
tibus eruere destinauerant, quo paratiorem ha-
berent cibum, ne victus gratia toties ascen-
dere & descendere cogerentur. Sed quidam
ex eis, qui ætate & vsu rerum ac prudentia
cæteros longe anteibat, eos absterruit, dicens,
Si nutricem nostram nunc interficiemus, quis
futuris annis, nobis ac posteris nostris alimen-

ta præbebit?

Fabula hæc monet, virum prudentem debere non modo præsentia intueri, verum etiam futura longe prospicere.

De cane & hero.

385

Canem quidam habens, quo magis ab illo diligeretur, semper eū suis pascebat manibus, ligatūque soluebat. Ligari autem & verberari lubebat à seruo, vt beneficia à se, maleficia autē à seruo in illum viderentur esse collata. A Egre autem ferens canis se assidue ligari verberari-que, aufugit. Et cum increparetur à domino vt ingratus, & tantorum beneficiorum immemor, qui se fugisset, à quo semper dilectus pastusque fuisset, ligatus autem verberatusque nunquam, respondit, Quod seruus tuo iussu facit, à te factum puto.

Hæc fabula indicat, eos malefactores habendos, qui maleficiorum causa fuere.

De auius scarabæos timētibus.

386

Magnus timor aues incesserat, ne scarabæi arcu pilari eos occiderent, à quibus magnam pilarum vim in sterquilinio, summo labore fabricatam audierunt. Tunc passer, Nolite, inquit, expauescere. Quomodo enim pilas in nos per aera volantes iacere poterunt, cum eas per terram magno molimine vix trahant?

Hæc fabula admonet, ne hostium opes extimescamus, quibus deesse videmus ingenium.

De vrsō & apibus.

387

Vrsus ictus ab ape, tanta ira percitus est, vt

Q.i.

aluearia, in quibus apes mellificauerant, tota vnguibus discerperet. Tūc apes vniuersæ, cum domos suas dirui, cibaria auferri, filios negari viderent, facto impetu aculeis vrsus inuadentes penè necauere. Qui ex earum manibus vix elapsus, secum dicebat, Quanto melius erat, apibus vnus aculeum tolerare, quàm tot in me hostes mea iracundia concitare!

Hæc fabula innuit, longe melius interdum esse iniuriam vnus sustinere, quàm, dum vnum punire volumus, multos nobis inimicos comparare.

De aucupe & fringilla. 388

Auceps tetenderat volucris retia, largamque illis in area effuderat escam: pascentes tamen aues non capiebat, quia sibi videbantur paucæ. Quibus pastis ac auolantibus, aliæ pastu adueniunt, quas quoque propter paucitatem capere neglexit. Hoc per totum diem ordine seruato, ac aliis aduenientibus, aliis abeuntibus, illo semper maiorem prædam expectante, tandem aduersperascere coepit. Tunc aucups amissa spe multas capiendi, cum iam tempus esset quiescendi, attrahens retia, vnam tantum fringillam, quæ infœlix in area remanserat, cepit.

Hæc fabula indicat, qui omnia comprehendere volunt, sæpe pauca vix capere posse.

De duobus equis. 389

Miles equum habens optimum, emit alium nequaquam illi bonitate parem, quem multo diligētius, quàm priorē nutrabat. tunc prio-

ri sic ait, Cur me dominus quàm te impensius curat, cum tibi neque pulchritudine, neque robore, neque velocitate comparandus sim? Cui ille, Est hæc, inquit, hominum natura, vt semper in nouos hospites benigniores sint.

Hæc fabula indicat hominum amentiam, qui noua etiã si deteriora sint, solent veteribus antepone.

De sue & cane.

390

Sus irridebat canem odorisequum, qui domino murmure & cauda adularetur, à quo ad artem aucupatoriam multis verberibus, auriumque vellicationibus fuerat instructus. Cui canis, Nescis, inquit, insane, nescis quæ ex verberibus illis sim cõsecutus. Per ea enim suauissimis perdicũ, coturnicũmq; carnibus vescor.

Hæc fabula nos monet, ne iniquo feramus animo præceptorum verbera, quæ multorũ bonorũ causã esse cõsueuer.

De trabe bouũ pigritiã increpãte. 391

Trabs, quæ curru vehebatur, boues vt lentulos increpabat, dicẽs, Currite pigri, onus enim leue portatis. Cui boues, Irrides nos, responderunt: ignara, quæ te pœna maneat. Onus hoc nos cito deponem⁹, tuum autẽ tu quoad rumparis, sustinere cogẽs. Indoluit trabs, nec amplius boues cõnuitiis laceßere ausa est.

Hæc fabula quemlibet monet, ne alium insultet calamitatibus, quum ipse possit maioribus subiacere.

De carduele & puero.

392

Carduelis aus interrogata à puero, à quo in deliciis habita, & suauib⁹ & largis cibis nutrita

Q.ii.

fuerat, cur cauea egressa regredi nollet. Vt mſeo, inquit, me arbitrato, non tuo, pascere possim.

Hæc fabula indicat, vitæ libertatem, cunctis delicijs anteponendam.

De scurra & episcopo.

393

Scurra quidam Calēdis Ianuarii ad episcopum quendam diuitem quidem, sed auarum accedens, numisma aureū strenæ nomine petiit. Antistes insanire hominem dixit, qui crederet tantam pecuniam sibi in strenam dari. Tunc scurra nummum argenteum efflagitare coepit. Sed quum ille hoc quoque nimium sibi videri diceret, æreū quadrantem vt saltem sibi traderet orabat. Sed quum ne hunc quoque posset ab episcopo extorquere, Reuerende, inquit, pater, saltem benedictione tua me pro strenâ imperti. Tunc episcopus, Flecte, inquit, genua fili, vt te benedicam. At ego, inquit scurra, benedictionem istam tuam tam vilem nolo. Si enim nūmum æneum valeret, eam mihi nunquam profecto concederes.

Hæc fabula contra eos episcopos & sacerdotes conficta est, qui diuitias & opes pluris faciunt, quam cuncta ecclesiæ sacra atque mysteria.

De vpupa indigne honorata.

394

Inuitatæ fere omnes aues ad aquilæ nuptias, indigne ferebāt vpupam cæteris præferri, quia corona insignis esset, & versicoloribus pennis ornata, quum semper inter stercorea & sordes solita esset volutari.

Hæc fabula stultitiam eorum arguit, qui in hominibus

honorandis potius vestitum, nitorem, præstantiamque formæ, quam virtutes morésque soleant attendere.

De sacerdote & pyris.

395

Sacerdos quidam gulosus extra patriam ad nuptias proficiscens, ad quas fuerat inuitatus, reperit in itinere pyrorum aceruum, quorum ne vnum quidem attigit, quanuis magna affectus fame: quin potius ea ludibrio habēs, lotio consperfit. Indignabatur animi huiusmodi cibos sibi in itinere offerri, qui ad lautas accedebat epulas. Sed quum in itinere torrentē quendam ita imbribus auctum offendisset, vt sine vitæ periculo eum transire non posset, domum redire constituit. Reuertens autem ieiunus, tanta est oppressus fame, vt nisi pyra illa, quæ vrina consperferat comesset, quum aliud non inueniret, extingueretur.

Hæc fabula monet, nihil esse contemnendum, quū nihil sit tam vile & abiectū, quod aliquando vsui esse non possit.

De mulo & equo.

396

Mulus conspiciens equum, aureo fræno c-
hippitiōque insignem, & purpureis opertum
phaleris, rumpebatur inuidia, illum beatum re-
putans, qui continue optimis vesceretur cibis,
& decoro amiciretur ornatu: se autem præ il-
lo infortunatum, qui clitellis male dolatis oppres-
sus, quotidie maxima onera ferre cogeretur.
At vbi vidit equum pugna redeuntem, multis
affectum vulneribus, præ illius calamitate se
fortunatum appellabat, longe melius esse dicens,

Q.iii.

quotidiano labore durum victum quæritare,
& turpiter vestiri, quàm post optimos & deli-
catos cibos, & tantos ornatus, mortis adire dis-
crimina.

Hæc fabula monet, regibus & principibus minime in-
videndum, quia diuitijs & opibus abundant, vt qui vitam
eorum longe pluribus periculis, quàm pauperû, videamus
esse subiectam.

De porco & equo.

397

Porcus conspiciens equum bellatorem, qui
cataphractus ad pugnam prodibat, Stulte, in-
quit, quò properas? In pugna enim fortasse mo-
rieris. Cui equus, At tibi inter lutum sordésque
impinguato, quâuis nihil dignum laude gesse-
ris, cultellus adimet vitam: mortem vero meam
comitabitur gloria.

Hæc fabula innuit, honestius esse rebus præclare gestis
occumbere, quàm vitam turpiter actam protrahere.

De coriario emente pellem vrsi à ve-
natore nondum capti.

398

Coriarius ad venatorem accedens, emit ab
eo pellem vrsi, pecuniâque pro ea protulit.
Ille sibi in præsentia pellem vrsi non esse, cæte-
rum postridie venatum profecturum, vrsoque
interfecto, pellem illius ei se daturum pollice-
tur. Coriarius animi gratia cū venatore in syl-
uam profectus, altissimam arborem ascendit,
vt inde vrsi venatorisque certamen prospiceret.
Venator intrepidus ad antrum, vbi vrsus late-
bat, profectus, immixtis canibus illū exire cō-

pulit: qui euitato venatoris ictu, cum prostrauit humi. Tunc venator sciens hanc feram in cadauera non scire, anhelitu retento, se mortuū simulabat. Vrsus naribus admotis olfaciens, quum illum nec naso, nec corde spirantem deprehenderet, abscellit. Coriarius quum feram abesse prospiceret, ac nihil amplius adesse periculi, ex arbore se deducēs, & ad venatorem, qui nondum surgere audebat, accedens, illum vt surgeret monebat. Interrogauit deinde, quid ad aurem ei vrsus locutus esset. Cui venator, Monuit me, inquit, ne deinceps vrsi pellem vendere velim, nisi eum prius ceperim.

Hæc fabula indicat, incerta pro certis non habenda.

De eremita & milite.

399

Eremita quidam vir sanctissimæ vitæ militē hortabatur, vt relicta seculi militia, quam absque dei offensa, & animæ discrimine pauci exercent, tandem se corporis traderet quieti, & animæ consuleret saluti. Cui miles, Faciam, inquit, quod mones. Pater enim verum est, quod hoc tepore milites, neque stipēdia exigere valeant, licet exigua sint, neque prædari possint.

Fabula significat, multos vitijs renuntiare, quia illa amplius exercere non possunt.

De viro & vxore bigamis.

400

Vir quidam defuncta vxore, quam valde dilexerat, duxit alteram, & ipsam viduam, quæ assidue ei prioris mariti virtutes, fortiaq; facinora obiiciebat. Cui vt par referret, ipse quo-

Q.iiii.

que defunctæ vxoris mores probatissimos pudiciamque insignem referebat. Quadam autem die viro irata, pauperi eleemosynâ petenti, partem caponis, quem in cœnam vtrisque coxerat, dedit, dicens, Do tibi hoc pro anima prioris viri. Quod audiens maritus, accersito paupere reliquū caponis dedit, dicens, Et ego quod tibi hoc pro anima vxoris meæ defunctæ. Sic illi, dum alter alteri nocere cupiunt, quid cœnarent tandem non habuerunt.

Hæc fabula monet, non esse contra eos pugnandum, qui se possint optime vindicare.

De leone & mure.

401

Leo laqueo captus in sylua, cum se ita irretitum videret, vt nullis viribus se inde posse explicare confideret, murem rogauit, vt abroso laqueo eum liberaret, promittens tanti beneficii se non immemorem futurum. Quod cum mus promptly fecisset, leonem rogauit, vt filiâ eius sibi traderet in vxorem. Nec abnuuit leo, vt benefactori suo rem gratâ faceret. Noua autē nupta ad virum veniens, cum eum non videret, casu illum pede pressit atque contriuit.

Hæc indicat fabula, matrimonialia, & cætera consortia improbanda, quæ ab imparibus contrahuntur.

De vlmo & filere.

402

Vlmus in ripa fluminis nata, filer sibi proximum irridebat, vt debile & inualidum, quod ad omnem vel leuissimum vndarum impetū flecteretur, suam autem firmitatem & robur ma-

gnificis extollebat verbis , quòd multos annos assiduos amnis impetus inconcussa pertulerat. Semel autem maxima vndarum violentia, vltimus perfracta trahebatur ab aquis . Cui sileridens, inquit , Cur me deseris vicina ? vbi est nunc fortitudo tua?

Fabula significat, sapientiores esse, qui potentioribus cedunt, quàm qui resistere volentes, turpiter superantur.

De cera duritiem appetente. 403

Cera ingemiscebat se mollem, & cuicunque leuissimo ictui penetrabilem procreatam . Videns autè lateres ex luto multo se molliori factos, in tantam duritiem ignis calore peruenisse, vt multa perdurarent secula, se iecit in ignē, vt eandem duritiem cōsequeretur . Sed statim igne liquefacta consumpta est.

Hac admonemur fabula, ne appetamus, quod est nobis natura denegatum.

De agricola militiam & mercaturam affectante. 404

Agricola quidam ægreferebat se assidue terram voluere, nec perpetuis laboribus ad magnas diuitias peruenire, cum nonnullos videret milites , qui actis præliis ita rem auxerant, vt bene induti incederent, & lautis epulis nutriti beatam agerent vitam . Venditis igitur ouibus, capris ac bobus, equos emit & arma, & in militiam profectus est: vbi cum ab imperatore suo male pugnatū esset, non solum quæ habebat perdidit , sed etiā pluribus vulneribus affe-

ctus est . Quare damnata militia, mercaturam exercere statuit, vt vbi maius lucrū, & minorem laborem existimabat. Prædiis igitur venditis, cum nauē mercibus impleuisset, nauigare cœperat. Sed cum in alto esset, tēpestas subito coorta, nauis submersa est, & ipse cum cæteris qui in ea erant, ad vnum omnes periere.

Hæc fabula monet, quemlibet debere sua arte esse contentum, cum vbique sit parata miseria.

De asino & scurra.

405

Asinus indigne ferens scurram quēdam honorari, & pulchris vestibus amiciri, quia magnos ventris edebat sonos, ad magistratus accessit, petens ne se minus quàm scurram honorari vellent. & cū magistratus admirantes eum interrogarent, cur se ita honore dignum duceret, inquit, Quia maiores quàm scurra crepitus ventris emitto, cōsque absque foetore.

Hæc fabula eos arguit, qui in rebus leuissimis suas pecunias profundunt.

De amne suum fontem conuitiis lacef-
sente.

406

Amnis quidam suū conuitiis fontem lacef-
sebat vt inertem, q̃ immobilis staret, nec vllos haberet pisces: se autē plurimum cōmendabat, quòd optimos crearet pisces, & per valles blando murmure serperet. Indignatus fons in amnem velut ingrātū, vndas repressit. Tūc amnis & piscibus & dulci sono priuatus euauit.

Hæc fabula eos notat, qui bona, quæ agunt, sibi arro-

gant, non deo attribuunt, à quo largo fonte nostra bona procedunt.

De viro maligno & dæmone. 407

Vir malignus, quum plurima perpetrasset scelera, & sæpius captus, & carcere conclusus, arctissima & peruigili custodia teneretur, dæmonis auxilium implorabat, qui sæpenumero illi affuit, & è multis eum periculis liberauit. Tandem iterum deprehenso, & solitum auxilium imploranti, dæmon magnum calceorum pertusorum fascem super humeros habens apparuit, dicens, Amice amplius tibi auxilio esse non possum: tot enim loca pro te liberando hætenus peragraui, vt hos omnes calceos contriuerim. Nulla mihi superest pecunia, qua alios valeam comparare. Quare pereundum est tibi.

Hæc admonet fabula, ne existimemus nostra semper impunita fore peccata.

De auibus plures reges eligere volentibus. 408

Aues consultabant de pluribus regibus eligendis, cum aquila tantos volucrum greges sola regere non posset, fecissentque voto satis, nisi cornicis monitu à tali consilio destitissent. quæ cum causam rogaretur, cur non plures reges duceret eligendos: Quia difficilius, inquit, plures, quàm vnus saccus, implentur.

Hæc fabula docet, longe melius ab vno, quàm à multis principibus rem gubernari.

De muliere quæ pro viro se mori velle
dicebat.

409

Matrona quædam admodum pudica, & viri amantiſſima, ægreſerebat maritum aduerſa valetudine detineri. Lamentabatur, ingemiſcebat: & vt ſuum in virum amorem teſtaretur, rogabat mortem, vt ſi maritum ſibi eſſet ereptura, ſe potius quàm illum vellet occidere. Inter hæc verba mortem cernit horribili aſpectu venientem. cuius timore perterrita, & iam ſui voti pœnitens, Non ſum ego, inquit, quem petis. iacet ibi in lecto, quem occiſura veniſti.

Hæc fabula indicat, neminem eſſe adeo amantem amici, qui non malit ſibi bene eſſe, quàm alteri.

De adolescente in funere matris canente.

410

Vir quidam defunctam vxorem, quæ ad ſepulchrū efferebatur, lachrymis & fletibus proſequēbatur. Filius vero eius canebat. qui cum à patre increparetur, vt amens & inſanus, qui in matris funere cantaret, cū vnà ſecum mortuus eſſe, & flere deberet, inquit, Pater mi, ſi ſacerdotes vt canerent, conduxiſti, cur mihi iraceris gratis cōcinenti? Cui pater, Non tuum, inquit, & ſacerdotum, eſt idem officium.

Fabula indicat, non omnia omnibus eſſe decora.

De viro zelotypo qui vxorem dederat
cuſtodiendam.

411

Vir zelotypus, vxorem, quam parum pudice viuere compererat, cuidam amico, cui plurimū

ſidebat, dederat cuſtodiendam, ingentem pollicitus pecuniã, ſi eam ita diligenter obſeruaret, vt nullo modo coniugalem violaret copulam. At ille vbi aliquot dies expertus, cuſtodiã hanc nimis difficilem, & ingeniũ ſuum verſutia mulieris vinci comperiſſet, ad maritũ accedẽs dixit, ſe amplius nolle hãc tam durã gerere prouinciam, quandoquidẽ ne Argus quidẽ, qui totus oculus fuit, mulierẽ inuitam poſſet cuſtodire. Addidit præterea, ſi neceſſe ſit, malle ſe anno integro ſaccũ plenum pulicibus quotidie in pratũ deferre, ſolutoque ſacco eos inter herbas paſcere, veſperẽq; factò omnes domũ reducere, quàm vna die impudicam mulierẽ ſeruare.

Hæc fabula indicat, nullos cuſtodes ita eſſe diligentes, qui impudicas mulieres valeant cuſtodire.

De viro clyſteria recusante. 412

Vir quidam natione Germanus, diues admodum ægrotabat: ad quem curandum plures acceſſerãt medici (ad mel enim cateruatim conuolant muſcæ) quorum vnus inter cætera dicebat opus eſſe clyſteribus, ſi vellet conualeſcere. Quod cum vir huiusmodi inſuetus medicinæ audiret, furore percitus, medicos domo ei ci iubet, dicẽs, eos eſſe inſanos, qui cum caput ſibi doleret, podici vellent mederi.

Hæc fabula innuit, etiã ſalutaria inſuetis & inexpertis, aſpera & obſutura videri.

De aſino ægrotãte, & lupis viſitãtib?. 413

Aſinus ægrotabat, famãque exierat, cum ci-

to moriturum. Ad eum igitur visendum, cum lupi canesque venissent, peterentque à filio, quomodo pater eius se haberet, ille per ostii rimulam respondit, Melius quàm velletis.

Hæc indicat fabula, quòd multi fingūt molesteferre mortem aliorum, quos tamen cupiunt celeriter interire.

Quòd nuci, asino, & mulieri profunt verbera. 414

Mulier quædam interrogabat nucem secus viam natam, quæ à prætereunte populo saxis impetebatur, quare esset ita amens, ut quò pluribus maioribusque verberibus caderetur, cò plures præstatioreque fructus procrearet. Cui iuglans, Esne, inquit, prouerbii immemor ita dicentis,

Nux, asinus, mulier, simili sunt lege ligati:
Hæc tria nil recte faciunt, si verbera cessent.

Hæc fabula innuit, sæpe homines proprijs iaculis se solere confodere.

De asino laborum finem non inueniente. 415

Asinus hyberno tempore plurimumangebatur, quòd nimio afficeretur frigore, & durum palearum haberet victum. Quare vernam temperiem, & teneras herbas optabat. Sed cum ver aduenisset, cogereturque à domino, qui figulus erat, argillam in aream, & ligna in fornacem: indeque lateres, imbrices, tegulas ad diuersa loca deferre: pertæsus veris, in quo tot labores tolerabat, æstatem omnibus votis expe-

tebat, vt dominus melle impeditus eum quiescere pateretur . Sed tunc quoque cum messis in aream, & inde domum triticum ferre compelleretur , nec quieti locus sibi esset, autumnū saltem laborum finem fore sperabat . Sed vbi ne tunc quoque malorum terminū adesse cernebat, cum quotidie vinum, poma, ligna portanda essent , rursus hyemis niues & glaciem efflagitabat, vt tunc saltem aliqua sibi requies à tantis laboribus concederetur.

Hæc fabula indicat, nulla esse præsentis vitæ tempora, quæ non perpetuis sint subiecta laboribus.

De mure qui cum fele amicitiam cōtrahere volebat. 416

Mures complures in cauo parietis commorantes, contēplabantur felem, quæ in tabulato capite demisso, & tristi vultu recūbebat. Tunc vnus ex eis, Hoc animal, inquit, benignum admodum, & mite vīde. Vultu enim ipso sanctimoniam quandam præfert, volo ipsum alloqui, & cum eo indissolubilemnectere amicitiam. Quæ cum dixisset, & propius accessisset, à fele captus, & dilaceratus est. Tūc cæteri hæc videntes, secum dicebant , Non est profecto, non est vultui temerè credendum.

Fabula innuit, nō ex vultu, sed ex operibus homines iudicandos: cum sub ouili pelle, sæpe atroces lupi delitescant.

De asino, qui hero ingrato seruierat. 417

Asinus, qui viro cuidam ingrato multos an-

nos inoffenso pede seruierat, semel, vt fit, dum sarcina pressus esset, graui & salebrosa incedit via, sub onere ceciderat. Tunc dominus implacabilis, multis verberibus surgere compellebat, pigrum animal & ignauum nuncupans. At ille miser inter verbera hæc secum dicebat, Infœlix ego quàm ingratum fortitus sum herû! Nam quanuis ei multo tēpore sine offensa serui-
erim, tamen non hoc vnum delictum tot meis pristinis beneficiis compensat.

Hæc fabula in eos conficta est, qui beneficiorum sibi collocatorum immemores, etiam minimam benefactoris sui in se offensam, atroci poena prosequuntur.

De lupo suadente histrici vt tela deponeret. 418

Lupus esuriens in histricem intenderat animum: quem tamen, quia sagittis vndique munitus erat, inuadere nō audebat. Excogitata autem cum perdendi astutia, illi suadere cœpit, ne pauco tempore tantum telorum onus tergo-
re portaret, quandoquidem ne aliquid sagittarii, nisi cum prælii tempus instaret, portarent. Cui histrix, Aduersus lupum, inquit, semper præliandi tempus esse credendum est.

Hæc fabula innuit, virum sapientem oportere aduersus inimicorum & hostium fraudes semper esse munitum.

De mure liberante miluum. 419

Mus cōspicatus miluum, laqueo aucupis im-
plicitum misertus est. Aui quanuis sibi inimi-
cæ, abrosis dente vinculis, euolandi viam fecit.

Miluus tanti immemor beneficii, vbi se solum vidit, murem nil tale suspicantem corripiens, vnguibus & rostro lacerauit.

Fabula indicat, malignos viros huiusmodi gratias suis benefactoribus solere rependere.

De cochlea petente ab Ioue, vt suam domum secum ferre posset. 420

Cum Iuppiter ab exordio mudi singulis animalibus munera, quæ petissent, elargiretur, cochlea ab eo petiit, vt domum suam posset circumferre. Interrogata à Ioue, quare tale ab eo munus exposceret, quod illi graue & molestum futurum erat. Malo, inquit, tam graue onus perpetuo ferre, quàm cum mihi libuerit, malum vicinum non posse vitare.

Fabula indicat, malorum vicinitatem omni incommodo fugiendam.

De herinacio viperam hospitem eiicente. 421

Herinacius hyemem aduentare præsentens, blande viperam rogauit, vt in propria illius caerna aduersus vim frigoris locum sibi concederet. Quod cum illa fecisset, herinacius huc illic se prouoluens, spinarum acumine viperam pungebat, & vehementi dolore torquebat. Illa male secum actum videns, quado herinacium suscepit hospitio, blandis cum verbis vt exiret, orabat, quandoquidē locus ambobus esset angustus. Cui herinacius, Exeat, inquit, qui hinc manere non potest. Quare vipera sentiens sibi

R.i.

locum ibi non esse, illinc cessit hospitio.

Fabula indicat, eos in consortia non admittēdos, qui nos possunt eijcere.

De lepore sese vulpi præferente ob pedum velocitatem. 422

Lepus sese dignū reputabat, qui vulpi præferretur: quoniam longe illam pedum pernicitate superabat. Tunc vulpes, At ego, inquit, ingenium sum sortita præstantius, quo sæpius, q̃ tu pernicitate tua, canes eludo.

Hæc indicat fabula, corporis velocitatē & vires, ab ingenio longe superari.

De agricola & poeta. 423

Agricola quidam ad poetam accedens, cuius agros colebat, cum eum inter libros solum offendisset, interrogavit eum quo pacto ita solus vivere posset. Cui ille, Solus, inquit, tantum esse cœpi, postquam te huc contulisti.

Hæc indicat fabula, eruditos viros, qui doctissimorum virorū turba continue stipantur, tunc solos esse, cum inter illiteratos homines fuerint.

De lupo ovis pelle induto, qui gregem deuorabat. 424

Lupus ovis pelle indutus, ouium se immiscuit gregi, quotidieque aliquam ex eis occidebat. Quod cum pastor animaduertisset, illū in altissima arbore suspendit. Interrogantibus autem cæteris pastoribus, cur ouem suspendisset, aiebat, Pellis quidem, ut videtis, est ovis: opera autem erant lupi.

Hæc indicat fabula, homines non ex habitu, sed ex operi-

bus esse iudicandos: quoniam multi sub vestimentis ouium, lupina faciunt opera.

De patre filium ad virtutes frustra hortante.

425

Pater quidam filium vitiis deditum, multis hortabatur verbis, vt derelicta vitiorum via, virtutibus inuigilaret, quæ ei laudē & decus erant paritura. Cui filius, Frustra, inquit, pater ad hæc facienda hortaris. Multos enim prædicatores (vt aiunt) audiui, qui longe te melius ad virtutum hortabantur viam, nunquam tamen eorum admonitionibus obsecutus sum.

Fabula indicat, viros malignæ naturæ, nullius hortatu à vitijs velle desistere.

De cane oues domini sui occidente, à quo suspensus est.

426

Pastor quidam cani oues suas dederat custodiendas, optimis illum pascēs cibus. At ille sæpe aliquam ouem occidebat. Quod cū pastor animaduertisset, canem capiens, eum volebat occidere. Cui canis, Quid me, inquit, perdere cupis? sum vnus ex domesticis tuis: interfice potius lupum, qui cōtinue tuo insidiatur ouili. Imo, inquit pastor, te, quàm lupum morte dignum magis puto. Ille enim palam se meum hostem profitetur: tu vero sub amicitia specie, quotidie meum imminuis gregem.

Hæc innuit fabula, longe magis puniendos, qui sub amicitia specie nos lædūt, quàm qui aperte se nostros inimicos profitentur.

R.ii.

De ariete cum tauro pugnâte. 427

Aries quidam inter lanigeros greges erat tanta cornuum & capitis firmitate, vt cæteros arietes statim facileque superaret. Quare cum nulum amplius arietem inueniret, qui occurfanti sibi auderet obfistere, crebris elatus victoriis, taurum ausus est ad certamen prouocare. Sed primo congressu, cū in taurinam frōtem arietasset, tā atroci ictu percussus est, vt ferè moriēs hæc diceret, Stultus ego, quid egi? cur tam potentem aduersarium ausus sum lacerare, cui me imparem creauit natura?

Fabula indicat, cum potentioribus non esse decertandū.

De vidua & asino viridi. 428

Vidua quædam cœlibatū exosa, nubere cupiebat: sed non audebat, verita vulgi irrisiones, qui maledictis eas solet incessare, quæ ad secundas transeunt nuptias. Sed cōmater eius, quàm contēnendæ essent populi voces, hac arte monstrauit: iussit enim asinum album, quem vidua habebat, viridi colore depingi, & per omnes vrbis vicos circunduci. Quod dum fieret, tanta admiratio ab initio omnes inuaserat, vt non solum pueri, verumetiam senes hac re insolita moti, asinū animi gratia comitarentur. Deinde cū huiusmodi animal quotidie per vrberem duceretur, desierunt admirari. Itidem, inquit ad viduam cōmater, eueniet tibi. Si enim virum acceperis, per aliquot dies eris fabula vul-

gi. deinde hic sermo conticescet.

Hæc fabula indicat, nullam rem esse tanta dignam admiratione, quæ diuturnitate temporis non desinat esse miraculum.

De aquila filios cuniculi reperiētē. 429

Aquila in altissima arbore nidulata, catulos cuniculi, qui longe inde pascebantur, in escam pullorum suorum rapuerat. Quam cuniculus blandis orabat verbis, ut suos sibi filios restituere dignaretur. At illa cum ut pusillum & terreste animal, & ad sibi nocendum impotens arbitrata, eos in conspectu matris vnguibus dilacerare, & pullis suis epulandos apponere non dubitavit. Tunc cuniculus filiorum morte commotus, hanc iniuriam minime impunitam abire permisit: arborem enim, quæ nidum sustinebat, radicibus effodit. Quæ leui impulsu ventorum procidens, pullos aquilæ adhuc implumes & inuolucres, in humum deiecit: qui a feris depasti, magnum doloris solatium cuniculo præbuerunt.

Hæc indicat fabula, neminem potentia sua fretum, imbecilliores despicere oportere, cum aliquando infirmiores potentiorum iniurias vlescantur.

De lupo pisce fluvii, maris regnum affectante. 430

Lupus erat piscis in amne quodam, qui pulchritudine, magnitudine, ac robore cæteros eiusdem fluminis pisces excedebat. Unde cum et cum admirabantur, & tamquam regem præ-

R.iii.

cupuo prosequerentur honore. Quare in superbiam elatus, maiorem principatum cepit appetere. Relicto igitur amne, in quo multos annos regnauerat, ingressus est mare, ut eius regnum sibi vendicaret: sed offendens delphinum miræ magnitudinis, qui in illo regnabat, ita ab illo infectatus est, ut aufugiens vix amnis ostium ingrederetur, unde amplius non est ausus exire.

Hæc fabula nos admonet, ut rebus nostris contenti, ea non appetamus, quæ nostris viribus sunt longe maiora.

De oue pastori conuitante. 431

Ovis conuitiabatur pastori, quod non contentus lacte, quod in usum suum, filiorumque ab ea mulgebat, insuper illam vellere denudaret, Tunc pastor iratus, filium eius trahebat ad mortem. Ecquid, inquit ovis, peius mihi facere potes? Ut te, inquit pastor, occidam, & lupis canibusque proiciam deuorandam. Siluit ovis, maiora adhuc mala formidans.

Hæc fabula indicat, non debere homines in deum exanescere, si diuitias, si filios ipsis permittat auferri, cum etiam maiora & viuentibus & mortuis possit inferre supplicia.

De auriga & rota currus stridente. 432

Auriga interrogabat currum, quare rota, quæ erat deterior, strideret, cum cæteræ idem non facerent. Cui currus, A Egroti, inquit, semper morosi & queruli esse consueuerunt.

Hæc indicat fabula, mala solere homines ad querimoniam semper impellere.

De viro amicos experiri volente. 433

Vir quidam diues admodum & liberalis, magnam habebat amicorum copiâ, quos ad cœnam sæpissime inuitabat, ad quam libētissime accedebant. Volens autem experiri, an in laborib⁹ & periculis sibi fideles essent, omnes pariter conuocauit, dicens obortos sibi inimicos, ad quos perdendos ire statuerat. Quare correptis armis secum irent, vt illatas sibi vlciscerentur iniurias. Tunc omnes præter duos, sese excusare cœperunt. Cæteris igitur repudiatis, illos tātum duos in amicorum numero habuit, quos deinde singulari amore prosecutus est.

Hæc indicat fabula, aduersam fortunam amicitix experimentum esse quàm optimum.

De vulpe carnem leporis canilaudante. 434

Vulpes cum fugaretur à cane, & iamiam esset capienda, nec vllam aliam euadendi viâ inuenire posse se cognosceret, Quid me, inquit, ô canis perdere cupis, cuius caro tibi vsui esse non potest? Cape potius leporem illum (non procul enim lepus aberat) cuius carnem suauissimam mortales esse commemorant. Canis igitur motus consilio vulpis, omissa vulpe, lepore insecutus est: quem tamē ob incredibilem eius velocitatem capere non potuit. Paucis post diebus, lepus conueniens vulpem, vehementer eā accusabat (verba enim eius audiuerat) quòd

R.iiii.

se cani demonstrasset. Cui vulpes, Quid me accusas lepus, quæ te tantopere laudaui? Quid diceres si te vituperassem?

Hæc indicat fabula, multos mortales sub laudationis specie alijs perniciem machinari.

De lepore calliditatem, & vulpe celeritatem à Ioue petentibus. 435

Lepus & vulpes à Ioue petebant: Hæc ut calliditati suæ pedum celeritatem: Ille ut velocitati suæ calliditatem adiungeret: quibus Iuppiter ita respondit, Ab origine mundi, è sinu liberalissimo singulis animantibus sua munera sumus elargiti. Vni autem omnia dedisse, aliorum fuisset iniuria.

Hæc innuit fabula, deũ singulis sua munera ita esse æquali lance largitum, ut quisq; esse debeat sua sorte contentus.

De equo inculto, sed veloci, & cæteris eum irradientibus. 436

Equi complures ad Circenses ludos fuerant adducti, pulcherrimis phaleris ornati, præter vnum quem cæteri, ut incultum, & ad eiusmodi certamen ineptum irridebant, nec vnquam victorem futurum opinabantur. Sed ubi currendi tempus aduenit, & dato tuba signo, cuncti è carceribus exilire: tum demum innotuit, quanto hic paulo antè irrisus, cæteros velocitate superaret. Omnibus enim aliis post se longo intervallo relictis, palmam assecutus est.

Fabula indicat, non ex habitu, sed ex virtute homines iudicandos.

De rustico per vocem hœdi ad iurif-
consultum admissio. 437

Rusticus quidā graui lite implicitus, ad quē-
dam iurifconsultū accesserat, vt eo patrono se-
se explicaret. At ille aliis negotiis impeditus,
renuntiari iubet se non posse nunc illi vacare:
quare abiret, aliàs reditur⁹. Rusticus qui huic,
vt veteri, fidōque amico, plurimum fidebat, sã-
pius rediens, nunquam admissus est. Tandem
hœdum adhuc lactentem & pinguem secum
deferens, ante ædes iurisperiti stabat, & hœdum
vellicans, illum balare cogebat. Ianitor qui ex
præcepto heri dona portantes statim admittere
solebat, audita hœdi voce, ianuam ilico aperi-
ens, hominem introire iubet. Tunc rusticus ad
hœdum conuersus, Gratias inquit, ago hœdu-
le mi, qui tam faciles mihi has effecisti fores.

Fabula indicat, nullas res tam duras difficilésq; esse, quas
munera non aperiant.

De adolescente ex coitu infirmo, &
lupo. 438

Adolescens quidam vxorem duxerat, & ip-
sam quoque adolescentulam, formosam ad-
modum & libidinofam: cuius effrænæ libidi-
ni dum satisfacere cupit, ita lumbos exhaustit,
vt paucis diebus macilentus fieret, & mortuo
magis, quàm viuo similis videretur: nō ingre-
di, non stare, non aliquod opus facere poterat:
vt senex quidam apricatione gaudebat. Dum

ergo in aprico stans loco, calore solis sese cale-
 faceret, accidit vt venatores, qui lupum fuerant
 insectati, illac iter haberent. Quos cum adole-
 scens interrogaret, cur lupum nō ceperant, Ob
 incredibilem, inquit, illius velocitatem, illum
 assequi non potuimus. Tunc ait adolescens,
 Vxorem profecto hic lupus habere non debet:
 si enim vxori iunctus esset, nūquam tanta pe-
 dum pernecitate polleret.

Hæc indicat fabula, neminē esse adeo robustum & fortē,
 quem nimius Veneris vsus, nō infirmum & debile reddat.

De sene iuuenem poma sibi surripien-
 tem, saxis deliciente. 439

Senex quidam iuuenem sibi poma surripie-
 tem blandis orabat verbis, vt ex arbore descen-
 deret, nec res suas vellet auferre. Sed cum in-
 cassum verba funderet, iuvene eius ætatem, ac
 verba cōtemnente, Non in verbis tantum, in-
 quit, verumetiam in herbis audio esse virtutem.
 Herbas igitur vellere, & in illum iacere
 cœpit. Quod iuuenis conspiciatus, in vehe-
 mentem risum effusus est, & senem delitare ar-
 bitrabatur, qui crederet eum ex arbore herbis
 posse depellere. Tūc senex omnia experiri cu-
 piens, Quando, inquit, verborum & herbarum
 vires, aduersus raptorem mearum rerum nullæ
 sunt, lapidibus agam, in quibus quoque dicunt
 esse virtutem: lapidēsque quibus gremium im-
 pleuerat, in iuuenem iaciens, illum descendere

& abire coegit.

Hæc fabula indicat, omnia prius sapienti tentanda, quàm ad armorum confugiatur auxilium.

De lusciniâ cantum accipitri pro vita pollicente. 440

Lusciniâ ab accipitre famelico comprehensa, quum se ab eo deuorandâ intelligeret, blande eum rogabat, vt se dimitteret, pollicita pro tanto beneficio ingentem mercedem sese relaturam. Cum autem accipiter eam interrogaret, quid gratiæ sibi referre posset: Aures, inquit, tuas mellifluis cantibus demulcebo. At ego, inquit accipiter, malo mihi ventrem demulceas: sine tuis enim cantibus viuere, sine cibo verò non possum.

Hæc fabula innuit, vtilia iucundis anteponenda.

De leone porcū sibi sociū eligēte. 441

Leo cū socios asciscere sibi vellet, multaque animalia sese illi adiungere optarēt, idque precibus & votis exposcerent, cæteris spretis, cum porco solū societatem voluit inire. rogatus autē causam respondit, Quia hoc animal adeò fidum est, vt amicos & socios suos in nullo quātumuis magno discrimine vnquam relinquat.

Hæc fabula docet eorum amicitiam appetendam, qui aduersitatis tempore à præstando auxilio non referūt pedem.

De culice cibum & hospitium ab appetente. 442

Culex hyberno tempore, cum & fame & frigore se periturum coniiceret, ad apium accessit.

fit aluearia, ab eis cibum & hospitium petens. Quæ si ab eis fuisset consecutus, promittebat filios earū se artem musicam edoctrum. Tunc quædam apes, At ego, inquit, artem meam malo liberi mei discant, quæ res à famis & frigoris periculo eximere poterit.

Fabula nos admonet, vt liberos nostros his artibus erudiamus, quæ eos ab inopia valeant vindicare.

De asino tubicine, & lepore tabellario. 443

Leo rex quadrupedum aduersus volucres pugnaturus, suorum acies instruebat. Interrogatus autē ab vrsō quid ei asini inertia, aut leporis timiditas, ad victoriam cōferre possent; quos ibi inter cæteros milites adesse cernebat: respondit, Asinus tubæ suæ clangore milites ad pugnam concitabit. Lepus vero ob pedum celeritatem, tabellarii fungetur officio.

Fabula significat, neminem adeo contemptibilem, qui aliqua re nobis prodesse non possit.

De accipitribus inter se inimicis, quos columbæ pacauerant. 444

Accipitres inuicem inimici quotidie decertabant, suisque odiis occupati, alias aues minime infestabant. Columbæ eorum vicem dolentes, eos missis legatis composuere. Sed illi vbi inter se amici effecti sunt, cæteras aues imbecilliores, & maxime columbas vexare, & occidere non desinebant. Tunc secum columbæ, Quam vtilior accipitrū discordia, quam con-

cordia nobis erat!

Hæc monet fabula, malorum inter se ciuium odia alenda potius, quàm extinguenda, vt dum inter se digladiantur, viros bonos quiete viuere permittant.

**De muliere ignem in mariti domum
ferente. 445**

Vir quidam prudēs vxorem ducebat. Interrogatus autem ab amicis, quid sibi vellet facula illa, quam noua nupta accensam à paterna domo efferret, rursumque mariti domum ingressura accendit, & introfert. Significat, inquit, me hodie ignē è soceri mei ædibus ablatum, in domum meam inferre.

Fabula significat, sæpenumero mulieres ignem quendam esse, qui mariti bona comburit.

De prætore repetundarū dānato. 446

Prætor qui prouinciā, cui præfuerat, expilauerat, repetundarum accusatus fuerat. Cūmq; ægre ablata restitueret, dicebat quidam è prouincialibus, Hic noster prætor mulieres imitatur, quæ foetus concipientes, mira voluptate afficiuntur: cum autem eos emittunt, incredibili dolore torquentur.

Fabula significat, aliena non esse furripienda: ne illa depocere coacti, mœrore conficiamur.

De sene mortē differre volente. 447

Senex quidam mortem, quæ eum è vita raptura aduenerat, rogabat vt paululum differret dum testamentum conderet, & cætera ad tantū iter necessaria præpararet. Cui mors, Quur nō, inquit, hætenus præparasti, toties à me admo-

nitus? Et quum ille eam nunquam à se visam
 amplius diceret: Quum, inquit, non æquales
 tuos modo, quorum nulli fere iam restant, ve-
 rumetiam iuvenes, pueros, infantes, quotidie
 rapiebam, nō te admonebam mortalitatis tuæ?
 Quum oculos hebescere, auditum minui, cæ-
 terosque sensus in dies deficere, corpus ingra-
 uescere sentiebas, nōne tibi me propinquam
 esse dicebam? Et te admonitum negas? Quare
 ulterius differendum non est.

Hæc fabula indicat, ita viuendum, quasi mortem semper
 adesse cernamus.

De viro auaro sacculum nummorum
 alloquente. 448

Vir quidam auarus, qui ingentem aureorum
 aceruum male partum relicturus, moriebatur,
 interrogabat sacculum nūmorum, quem mo-
 rienti sibi iusserat afferri, quibus voluptatē es-
 set allaturus. Cui sacculus, Hæredibus, inquit,
 tuis, qui nummos à te tanto sudore quæsitos,
 in scortis & conuiujs profundent & dæmo-
 nibus, qui animam tuam æternis supplicijs
 mancipabunt.

Hæc indicat fabula, stultissimum esse in his laborare, quæ
 alijs gaudium, nobis autem sint allatura tormentum.

INDEX FABVLARVM

iuxta earum numerum.

A

Abies & dumus	321	tijs laceffens	406
Accipiter columbam infe-		Anguilla conquerens, quod	
quens	354	magis quàm ferpēs infe-	
accipitres inter fe inimici,		ftaretur	368
quos columbæ pacauerāt.		anser	185.345
444		anferes & grues	44
Admorfus à cane	24	annus dæmonē accufans	382
adolescens & catus	158	anus & ancillæ	181
adolescens quidam & hiru-		Aper & afinus	119
do	258	aper & ruflicus	342
adolescens ex coitu infirmo		apes & Iuppiter	256
& lupo	438	apiarius	67
adolescens in funere matris		apologus AEſopi Phrygis	
canens	410	307	
adolescentes duo	6.154	Aquila	107
adolescentes duo & cocus	221	aquila filios cuniculi rapiens	
AEgrotus & medicus	11.	429	
183.259		aquila & cornicula	121
æſopi vita	3	aquila & coruus	188.306
æthiops	58	aquila & homo	203
Agnus & lupo	23.157	aquila & pica	377
agricola	64	aquila & ſcabro	189
agricola & canes	23.165	aquila & vulpes	187
agricola & ciconia	168	Aranea & hirundo	355
agricola & filij	159.217	aranea & podagra	303
agricola & pelargus	229	arbores pulchræ & defor-	
agricola & poeta	423	mes	363
agricola militiam & merca-		aries cū tauro pugnās	427
turam affectans	404	ario & delphinus	302
Alcedo	68	arundo & olea	8
ales & pulli eius	334	Aſini	94
Amici duo & viſus.	7.220	afinus	180.292.318
322		afinus ægrotans, & lupi eum	
amnis ſuum fontem conui-		viſitantes	413

I N D E X.

afinus & coruus	97	cancer & vulpes	77
afinus & equus	160.182.263	cancrī	316
afinus & Iuppiter	261	canes duo	74
afinus & leo	49	canes vrbani villaticum in-	
afinus & upus	12.261	fequentes	38x
afinus & ranæ	96	canis ad coenā vocatus	202
afinus & scurra	405	canis carnes portans	243
afinus & scutores	290	canis & asinus	124
afinus & vitulus	359	canis & gallus	36
afinus & vulpes	95.98	canis & hemus	38.385
afinus laborā finem non in-		canis & lanius	10.155
ueniens	415	canis & leo	349
afinus qui ingrato seruierat		canis & lupus	24x
417		canis & ouis	156
afinus, simia & talpa	369	canis & vmbra	115
afinus syluestris	93	canis inuidus & bos	170
afinus tubicen, & lepus tabel-		canis mordax	320
larius	443	canis oues domini sui occi-	
Auarus	43	dens	426
auarus & iuvidus	335	canis venaticus qui ab hero	
auceps	26.162.237	contemnitur	133
auceps & fringilla	388	capones pingues & macer	
auceps & merula	29	361	
aues & noctua	296	carbonarius & fullo	161
aues & quadrupedes	145	carbonarius & lotor	205
aues plures reges eligere vo-		carduelis & puer	392
lentes	408	castita	4x
aues scarabeostimentes	386	castita & dominus	30x
auriga & rota currus stri-		castor	27.238
dens	432	cata & Venus	3
B		cata in foeminā mutata	213
Bos & iuuenus	348	catus & gallus	193
Bubulcus	106	Cera duritiē appetens	403
buccinator, seu tubicen	263	cerua	46
butalis	60	cerua & leo	47
C		cerua & vitis	48
Calamus & oliua	213	ceruus	147
caluus quidam	33	ceruus & boues	153
camelus	100.321	ceruus & leo	228

INDEX.

cervus & ouis	156	equus incultus, sed velox, &c	
Cicada & formica	346	cæteri eum irridentes	439
citharædus	78	Eremita & miles	399
Cochlea petēs ab Ioue, vt suam domum secū fer- re posset.	420	F	
cochleæ	61	Faber & canis	235
columba	102	Filius & mater	31
columba & cornix	103	filius & pater	32
columba & pica	357	Formica	90.175
columbæ, &c earum rex acci- piter	129	formicæ & cicada	285.312
coriarius emens pellem	398	formica & columba	254
cornix & canis	61	Fur & canis	130
cornix & coruus	80	fures & gallus	79
cornix & ouis	171	G	
cornix & vrna	337	Galli duo inter se certan- tes	252
coruus ægrotans	242	galli & perdix	199
coruus & lupi	198	gallina auripara	209
coruus & serpens	82	gallina & hirundo	99
coruus & vulpecula	122.240	gallina & vulpes	274
Cuculus & accipiter	358	gallus & catus	169
cucurbita & pin⁹ arbor	197	gallus & perdix	205
culex cibum & hospitium ab ape petens	442	gallus gallinaceus	112
culex & leo	111	Glires quercum eruere vo- lentes	384
Cygnus	57	Graculus	146
cygnus in morte canens, cō- prehensus à ciconia	364	H	
D		Herinacius viperam ho- stem eiiciens	421
Diues quidā & servus	380	Hinnulus	42
diuitis filia & mater	194	hirūdo & aliæ auiculæ	127
E		hirundo & cornix	59
Eques caluus	313	Hoedus & lupus	76.
equi duo	389	135.185	
equus & asinus	144	homo à cane morsus	219
equus & ceruus	309	homo & Apollo	19
equus & leo	143	homo & ligneus deus	201
		homo & satyrus	23
		homo gloriosus	18

S.l.

INDEX.

I		lepus & testudo	174
Impossibilia praestans	34	lepus sese vulpi praefere ob	
Inimici duo	212	pedum velocitatem	412
Iuppiter	181	Lignator quidam	160
Iuppiter & coruus	231	Lupus & agnus	13, 251
Iuppiter & pudor	86	lupus & canis	164
Iuppiter & simia	186	lupus & caput pictum	139
Iuppiter & testudo	87	lupus & grues	117, 250
Iuuenis curuitatem senis ri-		lupus & vetula	110
dens	375	lupus & ouis	88, 149
L		lupus & fucula	131
Leena & vulpes	249	lupus & vulpes	146
legatus auarus tubicines de-		lupus ouis pelle indut ⁹ . qui	
ciens	373	gregem deuorabat	414
leo, asinus, & vulpes	247	lupus piscis fluuij, maris re-	
leo cuiusdam rustici filiam		gnum affectans	430
amans	248	lupus suadens histrici vt te	
leo & alia animalia	184	la deponeret	418
leo & capella	336	lusciniā cātum accipitri pro	
leo & capra	183	vita pollicens	440
leo & homo	270	M	
leo & lupus	55	Maritus & vxor	75
leo & mus	125, 401	Medicus quidam	238
leo & quaedam oues	116	membra & venter	151, 311
leo & rana	174, 250	mercurius & statuarius	72
leo & taurus	246, 313	mercurius & sutor	85
leo & venator	338	mercurius & Tiresias	73
leo & vrsus	37	Milvus ægrotus	126
leo & vulpecula	307	Monedula	84
leo porcum sibi socium eli-		monedula & columbæ	83
gens	441	Mula quaedam	234
leo senex	245	mulier	56
leo senectute confectus	123	mulier amatoris discessum	
lepores	89	flens	366
lepores inaniter timētes	134	mulier & ancillæ	62
lepores & ranæ	262	mulier & gallina	218, 265
lepos calliditatem, & vul-		mulier & medicus	215
pes celeritatem à Ioue pe-		mulier ignem in mariti do-	
tentes	435	rum ferens	445

INDEX.

mulier quæ pro viro se mori velle dicebat	409	stra hortans	425
mulier, venefica	63	pauo & grus	328
mulier virum morientem frens, & pater eam confo- lans	365	pauo & lusciniæ	172
mulus & equus	396	pauo & monedula	39
mures & catus	226	pauo & pica	182
mus & rana	114	Philomena & accipiter	190
mus in cista natus	352	Piscator	69
mus liberans miluum	419	piscator & cinaris	20
mus qui cum fele amicitia contrahere volebat	416	piscator & pisciculus	311
mus vrbanus, & mus rusti- cus	120	piscator & smarini piscicu- lus	195
musca	257	piscator quidam	207.214.211
musca & formica	141	piscatores	208.291
musca, quæ quadrigis infi- dens, puluerem se excita- se dicebat	367	piscis	350
muscæ	71	piscis è sartagine in prunas desilientes	371
mustela & mus	173	Porcus & equus	397
N		Prætor repetundarum dâ- natus	446
Nautæ sanctoni auxilium implorantes	370	Puer & fortuna	236
Nutrix & lupus	314	puer & fur	339
O		puer & scorpio	272
Olitor & canis	50	puer oues pascens	239
ollæ duæ	324	puer quidam fur	276
Opilio & agricola	305	pulex	283
Ovis cõuitiâs pastori	431	pulex & homo	284
P		punica & malus arbores	278
Pardus & vulpecula	351	Q	
partus montium	132	Quadrupes societatem aduersus aues cum pisci- bus ineuntes	372
partus terræ	299	Quercus & arundo	310
pastor & lupus	54	R	
pastor & mare	13.277	Rana & bos	142
pastor & oues	109	rana & vulpes	266.319
pater filiũ ad virtutes fru-		rana	35
		rana, & earum rex	128
		rana duæ	66

S.ii.

INDEX.

ranæ regem petentes	212	simius & delphis	70
Rex & simiæ	289	singularis animal & vul-	
Rusticus	304	pes	40
rusticus amnē transiens.	356	Sol & aquila	317
rusticus & anguis	137	Sus & canis	51.52.390
rusticus & coluber	118	Sylva & rusticus	150
rusticus & fortuna	325	T	
rusticus & Hercules	344	Talpa & mater	279
rusticus & iuuenus	340	taurus & caper	326
rusticus & mus	379	taurus & leo	331
rusticus impetrans vt triti-		taurus & mus	343
cum absque aristis nasce-		Testudo & aquila	45
retur	352	testudo & ranæ	383
rusticus per vocē hoedi ad		Thūnus & delphinus	235
iuriscōsultū admissus.	437	rhynnus & delphinus	25
S		Tigris & vulpes	330
Sacerdos & pyra	375	Trabs & boues eam tra-	
salix & securis	275	hentes	362.935
satyrus & rusticus	295	Tubicen quidam	9.235
satyrus & viator	341	turdus amicitiam cum hirū	
Scarabeus & aquila	293	dine iniens	378
scurra & episcopus	393	V	
Senex iuuenem poma sibi		Vates quidam	253
surripientem, faxis dei-		vaticinator	28
ciens	439	Venator & perdix	273
senex mortem differre vo-		quod Verbera nuci, & asino,	
lens	447	& mulieri profunt	414
senex mortem vocans	214	vermis & vulpes	108
senex puellam in vxorē ac-		vespæ, perdices, & agricola	
cipiens	376	280	
serpens	110	vespertilio & mustela	91
serpens & agricola	267	vespertilio, & rubus, & mer-	
serpens & cancer	53	gus	38
Simia	281	Viator	269
simia & duo eius nati	347	viatores duo	65.92
simia & eius proles	327	viator & Iuppiter	1.30
simia & vulpecula	152.213.	vidua & asinus viridis	428
227		vipera & lima	148
simiæ & pardalis	91	viragricola	204